


बुंगद्योया रथ यात्राखँ



चवम्ह:- रत्न राज वज्राचार्य

रवि शाक्त्य, इखाछँ,यल

बुंगद्योया रथ यात्राखँ

चवह्म

रत्न राज बज्राचार्य

चुकः बहाल

रुक्मिणी तथा प्रकाशक

रत्न राज बज्राचार्य

लग्नख्यल, माजुसिमा न्होने ।

(रुक्मिणी सफूया सर्वाधिकार लेखक पाखें सुरक्षित)

प्रथम संस्करण- १,००० द्वितीय

बुद्ध सम्बत्:- २५२३

नेपाल सम्बत्:- १०९९

विक्रम सम्बत्:- २०३६

मुद्रक:-

रत्न प्रिन्टिङ्ग प्रेस

इखाछें, यल । फो. न. २१६७५

तप

जिगु छत्वाच्चा खँ :- थ्व सफूया अध्ययने वि
विभिन्न दृष्टि ज्वीफु जिगु दृष्टि छगू थथेदु, थुक्किया छँ
सत्यताया आधार रूपं संक्षेपं छगू थथे खः । गुह्यसँ ज्य
ज्यास थःगु ज्यू परार्थे वलिदानयाःपिं शाधकि शिद्धिबाब
गुरु बन्धुदत्त, राजा नरेन्द्र देव, ललितचक्रपिं मुख्यपि
हागू शहिदत खनेदु, दके न्हापालाक पुसाप्यगुखँ गोरख-
सार्थ याकनं थःगुरु ह्येकेगुलि नव नाग आशन यात तपस्वा
खनेदु, तधंग्हा सहयोग सहायक कर्कोटकया थःह्य ता छुवा
व्यूगु व शशीया प्वाथे दुविना रोगं केकाः वंगु तोताम्पूगु
मोहनी किकः वंगु मेमेगु नं सहाय व्यूगु तधंगु उपकार
खनेदु, हानं द्योयात ज्वी माःगु मजुस्मं मतोतु धाःथे
गुह्य बुंगद्योया नं मुख्य ज्या थथे खनेदु- गन नेपाळ
मंडले लोकजन रक्षा उध्दार यार्येनिर्ति गुगु अनादृष्टि
व वाया दुने जाकि सय्केगु कारणं कामरू कामाक्षा
धिपतियाकोषे अवतीर्ण (जन्म) जुसां गुगु थासे मवो-
सें मगाः । अकिं कोठाय्कुनां लोखाँपिने लोखाक्वे सं
धापलां धापलां तया लोखा पिवाभां च्वंगुली सँ हाचां
मगाक्क छपु छपुसँ चीका पिक्वां वलं वये मफु । मां
बौया चीधीकह्य मतिनाह्य काय् त्याग यायेगुली गवले

फै, लीपाया खुसिनं वोगुलीं लिदाया यंकल, फुक्क प्र-
यत्न विफल । अन्त्ये थःगु छगू हंस भमर रूप जुया क-
लसे दुने चवना तकनं वल्लतल्लं नेपाल मंडल थ्यंक
वोगु खनेदु ।

द्वनीगु अस्वभाविकमखु- थथे हे च्वेया धापु
अनुसार थुकिनं गोरखनाथ आसनं दना वल धं थाय्
छकुचा खँ “ अवलेनसें वानंगात ” खँ च्वये माःगु
तो फ्यूगु व थथेहे द्योयासंमुखे च्वना पस्परे हषं खँ
जू थासे छकुचा खँ “ उवलसंली वा प्यूगुली वाया दुने
जाकि नं सःगु जुल “ खँ च्वयेमाःगु तोफ्यूगु खनेदु ।
मेमेगु ठीक जू । थुलि जिगु खँ च्वया दिना छवया ।

कौला श्वः १।७।१०९९

संशोधक आदिबज्र

घःभा

प्रति वर्षं क्रियाय ललितपुरे प्रचलित जुयाबया च्वंगु श्री करुणामय लोकेश्वर (श्री मच्छीन्द्रनाथ) व श्री जटाधारीलोकेश्वर (चाकावाहाद्यो) यागु रथ यात्रा समस्त लोकजनं पिसं श्रद्धा भक्ति तथा मानेयाना वया च्वंगु अन्दाजी १५००-१६०० दं दये धुंफल । अऊ, श्री चकवाहाद्यो यागु रथ यात्रा याःगु चलन थ्व स्वयानं न्हापा हे दुगु खनुदु । आश्चर्यं खँ थथे जुयानं जुगविते जुया वना च्वनं थ्व जात्रा थौं यागु दिन तकनं कीसं पुलांगु परम्परा धका सुरक्षित याना वया च्वना ।

तर थ्व परम्पराया दुने गुलि ऐतिहासिक खँ तथ्व सुत्ता च्वन उकियागु यर्थाथ खँ कीसँ सीकेगु वा अन्वेषण यायेगु आवश्यक खः । श्री करुणामय व चा कवाहालद्यो विषय कया विदेशी विद्वान पिसं अनेक खो ज निति बाना च्वन, अनेक तथ्य लेईका वयना च्वन तर थुकियागु विषेय कीसँ अऊ छुं याये मफया च्वन ।

चक्रवाहाद्योया विषय कया १०२५ सं साखिलं
चक्रवर्ष चुकवाहा महाविहार ल०पु० याम्ह नांदिमह श्री
रत्नराज दज्जाचार्यजु सफु छगू पिकया विज्यात । फीगु
प्राचीन बौद्ध परम्परा विषये वसपोल छह्य गहन अध्य
यन दुह्य जुया निति वसपोलं मीन नाथको वंशावली
नामक सफू छगु प्रस्तुत याना विज्यागु प्रसंशायोग्यद्वः
शुकि याना श्री करुणामय विषये अन्वेषण यायेत नं
अवश्य सहायक ज्वीफू ।

२०। श्रावण २०३६

करुणाकर वैद्य
लगनखेल ।

न्हैखँ

बाधद शास्त्रया धापुथें हीला च्वंगु थ्व संसारे
अष्टादश लक्षणयुक्त जुया मनुष्य जन्म ज्वीगु अति दुर्लभ
खः। थुजोगु मनुष्य जन्म अमुल्य रत्नतुल्य खः। गुम्हेसिनं
थ्व मनुष्य जीवनयात अनित्य, दुःख, अनात्म, खंका थ्वी
का सदुपयोग यायेगु कोशिश यायेगु तधंगु मौका खः।
यदि थ्वजीवने यायेमफुसा तधंगु हानी जूवनी। थ्व
विचारनीय खँ खः। थुगु मानवता यात महानताय च्व
न्ह्याकेगु व भिंगु लँ (सुगति) लायेगु लोकोत्तर मार्ग
(मोक्षमार्ग) कायेगु परमावश्यकता दु। धर्मछगू
जक इहत्र परत्रया तधंगु साधन खः थ्व विचारनीय।

थुगु आर्यावर्त्तया मूलगु देव भूमि, पुण्यभूमि,
नेपाल मंडले श्री स्वयंभू चैत्यया प्रभावं श्री महामंजुश्री
यो पाखें थ्व देश मिर्नाण जूगु खँ स्वयं सिध्दगु खँ खः।
थ्वसपोलया उत्पत्तियां लोपा श्री हेवजू नैरात्मा आदि
अनेक देव देवतानं प्रादुर्भाव जुगु खनेदत। धाजा स्वी
निकोटि ३२ देवतापि थनदु थ्व मध्ये दकलें तधंगु रथ-
जात्रा यलया मुख्य देवता बुंगद्योयागु खः। थ्व बुंगद्योनं
नेपाल मंडले सदा सहकाल अन्न दाताया रूपे विज्याह्य
खः। थ्वैत करुणामय, आर्यावलोकितेश्वर, वच्छीन्द्रनाथ

नं धाः थ्वैगु महिमा अपार दु । थ्वसपोलया गुण वर्णन
सकस्यनं न्ह्याक्व प्रशंसा याःसानं ह्यजक ज्वी । थ्वसपोल
कलिगत वर्ष ३६०६ विक्रम संवत् ५६२ नेपाले आगम-
ण जुगु खः । थ्व ज्यायाःपि शाधक्य शिधिदवानपि
गुरु बन्धुदत्त, राजा नरेन्द्रदेव, ललितचक्र पिंगु गुगु
महान ज्या थुकी बांलाक दर्शे ज्वी । जिं स्यूथें खंथें थःगु
संगूहालय्स मुना तयागु वंशावलीया च्वयातःगुया आ-
धारे थ्व खँ च्वया थन सज्जनपाठक वर्गया न्ह्योने छुं
खँ व्वयागु जक खः । थुकीगुलिं द्वं स्यं दःसा क्षमा वी
धैगु छगू विश्वःसनं दु । थुगु ज्यास माःमाःगुसल्ला सहयोग
व्यूपि संशोधक आदिबज्र व चिकं वहीया करुणाकर
वैद्यजु पित जिगु दुनुगलनसें अपालं धन्यवाद विया
चवना ।

श्रीमानदेव संस्कारित चक्र वर्ण महाविहारो-
पन्न श्री रत्न राज वज्रार्चाय णोयं पुस्तिका पूर्व प्राचीन
पुस्तकाणि प्रविलोक्य स्वबुध्यदानु सारेण शोधयित्वा स्व
यमेव परिश्रमेण मुद्रयित्वा अस्मि पुस्तके यत्रतत्र अशु
द्ध्यादि मस्ति तत्रतत्र ज्ञानि जनै शोधयितव्य मिति
ने प्रार्थनास्ति ॥

लेखक—

(४)

नमो आर्यावलोकितेश्वराय

बुंगद्योया रथ यात्राखँ

पद्मो परिगतं नाम, पद्म हस्तं जटाधरं !

आर्यावलोकितेश्वरं, बोधिसत्व गणंतथा !!

गवले खपया गुणकामदेबया पूत्र श्रदालु
भक्तिमान राजा नरेन्द्रदेवया राज्यकाल खः । उबले
नेपाल मण्डले माःगु बेला बखते वा (वर्षा) मजुया
दुर्भिक्ष अनिकाल जुल । वा प्युसां वाया दुने जाकि
मरु, स्याफःगु कली जकगु जुल । थ्व जूगु समस्या तंके
न्हंकेगुलि लोक जनया अनेक बिचार बिमर्ष जुल, थुकी
छप्पाः म्हतुं थें थ्वया छगु जक उपाय थ्व खः । थ्व
भाबी बुंगद्यो (आर्यावलोकितेश्वर) थन गुगु नेपाल
मण्डले विराजमान याके ह्येगु । बिना थ्व ज्या याये
मफेकं जुया च्वंगु समस्या तनी न्हनी अवश्यं मखु धंगु
बिश्वास व धारणा जुल ।

थ्व भाबी बुंगद्यो (आर्यावलोकितेश्वर,
मच्छेन्द्रनाथ) गुगु आसाम देशया छगू कामरु कामाक्ष

नगरे छगू राक्षषिया कोषे गुगु नेपाल मण्डले वया
तधंगु चरित्र सहितं अपालं विभिन्न लोक जन रक्षा उद्धार-
या खातीर अवतीर्ण (जन्म) जुवोगु खँ सर्वबिदित सकल
प्रसिद्ध प्रख्यातगु थ्व खँ खः । अथेसां थ्व ज्या यायेत
थ्व छो हयेगु छगू खँ गुखतं गथे गुगु बिधि यायेगु थ्व
सुयां सामर्थ मरू, शक्ति मरू ।

छन्हु थ्व ज्या याये नितिं खप देशया अति
श्रद्धालु भक्तिमान धर्म प्रेमी प्रजावत्सल राजा नरेन्द्र-
देव व शांतिकराचार्यया शिष्य सिद्धिबंत, शाधकी
अं तेवाहाया वन्धुदत्त बज्राचार्य, यल देशया बुद्धिमान
समाज सेवि, धर्म प्रेमी, ललित चक्र ज्यापु स्वम्ह जाना
स्वम्ह सियागुगुया बारे आपालं छगू थथे खँल्हा व
ल्हा जुलः—

न्हापा न्हापा मल्ल कालया छगू समय
नेपाल मण्डलया छथाय् उबले छम्ह लोकेश्वर भक्त आर्य
उपोषद ब्रतचारी लखपति महाराजन छम्ह दु । थ्वया
कलाःनं दु, थुपिं तिरीत्यपू नं अति वांलाःपिं भिगु शील
स्वभावपिं, सकतांया सुखिपिं खःसां छता पाखें दुःख दु
थ्व ख, संतान मरुगुया ।

दयेकेत अनेक जतन जुगती यात्त ज्योतिष
बैद्य क्यना, अनेक दान, धर्म पाठ, पूजा, यात । माः थासे

माःमाःगु फक्व सतः फलिचा, पकुचा, लँ, हिति, बंगाः
तुं, पुखू, दयकल, दिन दुखियात दान प्रदान यात ।
अथेनं सन्तान मरु ।

छन्हुया दिने श्री लोकाेश्वर नां काकां द्यन,
छगू स्वप्न जुल श्री लोकाेश्वरया दर्शण व छगू उजोनं
थथे जुल— हे ! महाजन छं सन्तान मरुगुया छगू
कारण खः पूर्व जन्मया अपराधं छं कलाःया पाखें सन्ता-
न दैमखु । तर छगू उपाय थ्व दु थनिं प्यन्हु छंत
सन्तान दैगु बर बीम्ह फकिर छम्ह वै, थ्वैगु उजों थें
छं ज्या या । अलेतिनि छं सन्तान दै धका खँ कन ।

महाजनया छकोतलं थारानुया न्हचलंचाल।
थ्व स्वप्न गुप्त याना थ्व खँ थः कलाःयातनं मकसैं छुं
मधासैं च्वन । वरावर थःगु ऊयाले च्वना गुम्ह फकिर
या प्रतिक्षा यानाच्वन । च्वं च्वं स्वचा स्वन्हु तक च्वन
नं मवो । प्यन्हु खुन्हु अचानक फकिर छम्ह वल । खने
वं थः छें थँत हया माःगु सम्मान सत्कार याना स्वप्न
अनुसार भोजन याका फकिर यात संतोष यात ।

हे ! महाजन छन्त जिं सन्तानया वरदान
वी । थ्व वरयात सा यागु गोबर छगोरा हीं । वाता
निगो नं हिति । छं थ्व निगो थल थपू क्वपू याना

तोपुया तयागु गोवरे थनि नी छन्हु दैवले थुकें छम
 कायमचा जन्म ज्वी थुका, थव वांलाक छगू क्वथास
 सह्याले याना ति धका धाल । थव फकीरया वचन थें
 माःगु सामान हया तालाका विल । थव थल लःल्हाना
 फकीर पिहांवन ।

थनंलि प्यन्हु च्यान्हु दसेलि महाजनया
 कलाःया छगू संखा जुल । जि स्वामि या जिगु पाखें
 सन्तान मदया जकं थौं म्हिगः तँ चाल थें च्वं । न्हापा
 न्हापाजा मखु आः थव छेंया व्याक्क ताःचा क्वें हर्ता कर्ता
 जित लःल्हाना तल । छगू कोठाया धाःसा ताःचा लः
 मल्हासें गुप्तयाना तःगुया कारण छगू अवश्य दै थव जरुल
 छगू हेतु दै पक्का धका अनेक संकाल्वीका च्वन, जि छ-
 न्हु ताके लाका थव गुप्त कोठास मस्वसें गन तोते धका
 संयोगया प्रतिक्सा यान्वं च्वन । छन्हु संयोग वश २०
 नीन्हु दु खुनु महाजनया छें पिने हतपतं वने माःगुलि
 पिहांवन । थव गोप्य कोठाया ताःचा फुंग तले तुं तो-
 फित । महाजनीनं दावे लाका हथासं कोठासं दुहांवना
 ताः खना वास्स फस्स व्याक्क भनं मालाः स्वत गननं
 छुं खंके मफु।छथाय ध्याक्वे च्वंगु खीउँथाय् लाकध्याक्वे
 वाता निगोले थपू क्वपू याना तःगु खन । उला स्वत

गोबर का स्वथना तःगु धका छिछि धुरधुर यानाः जि
मिजं या ज्ञान बुद्धिनं हिँन जुया वने धुंकल खनिका ।
काचाक कया ऊयालं हाफुतिना सागःले वांछ्या बिल ।
तमं तले थांहां वना माःगु ज्या याना च्वन ।

महाजनया ताःचा माल मरु । गुगु कोठास
खापा चाला च्वन । वाता निगोलं मडु । आःजक धुन
का मखुथे लात धका थारा नुया तले थांहा वना थः
कलाः याके खँ न्यो वन ।

कलाः नं धाल, खः जि छुयाय्त छु प्रयो
जन दु धका छुं ख्यले मडु धका काचाक ऊयालं पिने
साः गःले हाकुतिना छ्वया धका खँकन ।

महाजनं धाल धिकारका छ मिसा निर्बुद्धि
कर्मे मरुगु सुयां छुं लगे मजूखनी । वाँछ्वयेहे माःलाः?
फकीर वैवले छु धयागु छु धाईगु खः ? गुम्हसें फीत
सन्तान वर विया थकुगु का थ्व चीज तचोतं अपशोच
याना भुग्लुं च्वन्च्वन् । २१ नीछन्हु दुखुनु फकिर
वया छंत विया थकागु चीज गन दु हिं स्वये धका
धाल ।

महाजनं थरर खाखां ख्यूँ ख्वालं विन्तियात जि
थथे याना तयागु जिमिकलातं खापा चायका ऊयालं पिने

साःगाले वां छ्वया विल धका वृतांत खँ कन, हे प्रभू
क्षमायाना दिसँ ।

मखु आम चीज फुके मज्यूगुखः । गन दु गन वां
छ्वयागु खः क्यना ब्यूनुधका लिसें ब्वना स्वोवन ।
गुगु गोवर पाँचे प्वला स्वत । थुकी अत्भूतम अति वां
लाःम चीधीचाम ह्याउँमचाम बालक छम जन्म जुया
च्वन । थ्व क्यना फकीरं धाल-हे ! महाजन छं कर्म
मंत उके थ्व बालख छंत वी मखु जिं जंकेगु जुल धका
उजो जुया बालख ज्वना पिहां ङाल । थ्व फकीरं छगू
थासे तया प्रति पालन याना कथहनं तधिक जुसैं वल ।
थ्व गोवर नं जन्म जूगुलिं थ्वैगु नाम गोरख नाथ नामा
करण याना तल । कमाकथं ह्लिया ह्लियं तधिक जुया
वसैंलि थ्व गोरख नाथया ह्लियं चहक चमत्कार प्रभाव
प्रताप शाली जुजुं वल । छन्हु जिं गुगु नेपाल मंडले
छधू वनेमाल जिह्म आराध्य गुरू श्रीआर्यावलोकेश्वर गुगु
कामरुकामक्षे जन्म जूम थ्व नेपाले अवश्यं विज्याय
माःम खः । थ्व जिं याकनं विज्याक्रेया नितिं जिं गन
छगू अनेक जत्न जुगिति छको तत्कालं याःवनेमाल धका
मनेतया छन्हु नेपाल स्वस्सैं विज्यात । गन थ्यंका गुम
गोरखनाथं कानफट्टाया योगीया भेषधारीरूप कया
गुगु थनया छगू स्थानया सुलिनीयाछें दुहांवनाः छगू खँ

थथेधाल-हे ! सुलिनीं जित्त छं छुं संतोष ज्वीक नके
 तोंके फुला ? धका न्यन । थ्व कान फट्टाया खँ न्यना
 सुलिनीं थ्वखँ न्यना भति ग्यात थ्वया स्वरूपनं छगू
 वेधंगः भयभीत जूगुलिं जिं फुथें नके तोकेगु छगु कराल-
 जुल । बरू थौं छुं जोरजाम मज्जनि कन्हे कासँ ।

रात्रीस छगू गणेश स्थानवना तचोगु एकचित्तं
 भक्तिभाव याना च्वन । थनंलि रात्रीया छगू प्रहरे श्री
 गणेश प्रतक्ष दर्शण विया छगू थथे उजो जुल । हे !
 भक्तिजन छं छुं कामना थन भावभक्ति याःवयागु खः ।
 जिं छ प्रति प्रशन्न जुल माःगु फो धका उजो जुसेलि
 सुलिनीं थथे हे ! प्रभो कन्हे जिछेँस जिगु परिक्षाया
 निंति छम योगो पुरुष वेंगु दु । थ्वैत जिं माक्व कन्हे नके
 त्वंके धका छगू कराल याना थ्वैगु संतोषं नके तोकेगु
 खातारे थ्व भावभक्तियाः वेंगु खः । थ्वैत संतोषं
 नके त्वंकेगु उपाय वर विज्याहुं जित । थ्व न्यना श्री
 गणेश हर्ष पुर्वक हतासं वाथाक्क दना जिनं आम योगी
 पुरुष छको स्वये धकं धया । छगू मनुष्यरूप धरेयाना गुम
 सुलिनीया छें योगी पुरुष स्वोवल । हे ! सुलिनीं थ्व
 योगी पुरुष छम गोरखनाथ खः थ्वं छगू कानफट्टायारूप
 धरेयाना जक वःम थ्व खः । थ्वैत संतोष ज्वीक नके
 त्वंकेसा छगू उपाय थथे छगू दु, गुगु धटस नव नागर्षि

शाधन यासैं वीत, श्व धटं माक्व छंत स्वादिस्त पान (मद)
उत्पति यायु । हानं गुपिं नवनाग गुगु क्वनेत्यपे स्वना
तया छगू ढकिं गाछें नं तोपुया ति, गुगु थल चिले मज्यू
थिने मज्यू, क्वलुना जक कायमाः । थथे छगू अर्ति
विया गुह्य श्व थासं पिहाँ विज्यात ।

करालथें सुथे जुसैंलि कानफट्टा योगी सुलिनीया छें
थ्यंकवल। नये त्वनेत थासे चवन। सुलिनीयात गुगु विया
बंगु अर्तिथें व्याक्क शाधनादिज्या सिद्ध ज्वीका श्व
कानफट्टा योगीयात छगू तगोगु थले गुगु स्वादिस्त मद्य
हायका तोंकल । अपालं तोंतो यक्व तोने धुंकल ।
अथेनं भपि भपि धका कुला कुला हाला मद्य धाराहे
तोका चवन । श्व सुलिनीनं वियमफेक्क तो कुतल्ले त्वने
धैगु ईच्छायानागु भंग ज्वीथें ज्वीथें जुल । तर आःथथे
मखुत, श्वैगु गुगुकोठा छक परीक्षायाये धका मनजुया
छगू मौका बशेलाका सुलिनीं नं मखंक कोठाया ढकिं
उला स्वोगु बखते, गुगुक्वने त्यते दुने नवनाग शाधन
याना तःगु खन । श्व खने साथ थःत माःगु गुगु “अगचा
मालां द्योगचा लुल” धाःथेंतुं थःगु मतलव या चीज
नवनाग व्याक्कं ज्वना हतपतं सुलिनी यात छगू तधंगु
धन्यवाद बिया छें पिहाँवल । थःगु माःगु थाय् गुगुमृम
स्थली (काहाद्वं) थ्यंका गुपिं नवनाग गुह्य आशनयाबा

छगू नियत सफल यायेत गुगु तपस्या यात । गवले तक
जि आराध्य गुरु आर्यावलोकितेश्वर मच्छिद्र नाथ थ्व
नेपाल मंडले विमज्यातले थन थ्व आशन दने मखु धका
छगू भगीरथ आशिकायाना विज्यातं । थ्व गोरखनाथ
कानफट्टा योगींयाःगु गुगु योगया प्रभावं अवलेनसें
गुगु नेपाल मंडले माःगु बेला बखते जल(वा) बर्षा ज्वी
माःगु मजुल । स्वाँ,सिमा,फलमुल, वाउंचो इत्यादि छसि
कथं सित । गुलिं प्यूगु सिनां तुंवन । हिति, बुंगा,
पुखू, खुसि सुके जुयावन । हानं अनेक रोग उपद्रव जुल
नयेत्वने मखना हाहाकार जुल । दँवदं मखु प्यदँ खुदँ
दत । गवलें गवलें म्वाःले बृष्टि जुल । माःवले बृष्टि-
मजुल । अनावृष्टि जुल । थ्व जूगुया कारणखः योगी
गोरखनाथ पाखें खःधैगु सकसिनं निश्चय यात । बिना
थ्व योगी योगं मदिक्कं बृष्टि ज्वीमखु । आः थ्व योगी
योगं दिक्केगु छु उपाय दुःछु याःसा जी, गथे याःसा जीधका
हानं छुछु याये माल धैगु तचोगु बेबे जुल । अले सक-
सिगु छप्वाः म्हुतुंथें धाल — गुम गोरखनाथया गुरु
आर्यावलोकितेश्वर नेपाल मंडले विज्याके हयेमाल, योगी-
या योगं दिक्केगु छगू जक वासः थ्व खः लोकेश्वर हयेगु ।
गुरु नेपाले विज्याःसा अले गुरु दर्शनया निंति आशनं
दनावै ।

छन्हु थ्व ज्या थायेत तत्पर जुया गुगुज्या या निति
ललित पुरस गुम ललितचक्र ज्यापुयात माःगु व्याक्क
सामो ज्वलं कलं कुबिका गुगु लगमाख्य क्षत्र संलि छगू
आश्रमस च्वना द्वलछि ल्याखं कोटि जप याना सर्वप्रथम
पुरश्चरणयाना आराध्य देवता प्रशन्न याना शिद्धिवर सर्व
प्रथम प्राप्त यात ।

छन्हु थुगु थासंनं दक्षिण दिशा लिना प्रस्थानयाना
वन । लें वैं लैया छगू थासे छह्य महापुरुष छह्य ले छना
च्वंगु खन । थ्वैत राजानं दँदँ धकं थन । निको स्वोको
तक थननं मदनां छिद्रबचनं हकलं, थनंलि महापुरुषया
रुप तोता नागराजा मूर्ती धरेयाना धाल- हे ! राजन, छं
जि ह्यस्यूला ? थ्व नेपाल क्षेत्र जिगु अधिकार छिपि गन
बने त्यना धकं न्यन । थ्व बेलस राजा ग्याना व सुमुकं
च्वन । थन बंधुदत्त गुरुं नम्र निवेदनयात- हे ! महानाग
छलपोल बहुरूपी, ह्लाचःधाःसा मनुष्यरूप, आःहाकनं
तधिह्य नागजुया क्यन । आव फक्कनं चिधिगु रूप छको
दर्शन बिथा बिज्याहुँ धकं धाल । थ्वते बचन न्यना
चिधिगु रूपजुया सँगु थेंगु रूप क्यन, थ्व बेलस गुरु
बंधुदत्त नं तारण मन्त्र प्रयोग याना काचाक ज्वना थव
कलंचासं बत्ता छगले कुनां यंकल । थन नागराजा कर्को-
टकया प्याहाँ वयेमजिया तधंगु दुःख जुयाव धाल ।

हे ! मानवगण छिमिगु शास्त्र विद्याखना जि कृतार्थ
 जुयेधुन । जितः पिकयाव्यु, छिमित ग्वाहाली जिनं बीफु ।
 जित शास्ती यायेमते । तोताव्यु धकं सत्य वाचा यात
 थन तारण लीकया बिल कलंचासं दुने चवना बं वनं
 ववं २ छगू पर्वतया कोसं थन । थुगु थास शीला नदी
 खना गुरुँ धाल । भो राजन ! थव नदी यागु लखं थोक्व
 त्वहं ज्वीगु आवगथे वनेधकं आज्ञा दयकल । थवतेखँ
 न्यना कलंचासँ चवंह्य कर्कोटकनागनं धाल— भो गुरु!
 जिमदुला धंदा कया बिज्याये मते धकं धयाव कलचां
 प्याहांवया ईता थीतासं धुछि थव शरिर तापु दयका
 बिल । थन गुरु प्रमुखँ थुगु नदी पारयाना व बिज्यात ।
 थनंलि ताफु लिकाःगु वेलस नागया ह्लिपं छकुचा लंखें
 दुना ल्होहँ जुया कुतुंवन । थुखुन्हु निस्सें नाग दक्कयां
 ह्लिपं थुथा जुयावनं । थननं ववं व कामरु देश थ्यस्थेंलि
 गुरु बधु दत्त नं जुलसा माय छगः जाप याना म्येः दोछि
 १००० श्रृष्टि यात । हाकुनुस्या छग्वः मंत्रयाना दुगु
 १००० दोछि श्रृष्टि यात । स्यावजि छग्वः मंत्र प्रयोग
 याना कै १००० दोछि उत्पतियात । थन कर्कोटक नाग-
 राजा यात कलंचानं पिकयाव आज्ञा दयकल—भो नागेन्द्र
 छ जुलसां तत्कालनं वनाव शशी धैह्य यक्ष राजाया
 प्वाथस दुबिना चवं हँ धकं धयाव छगू गोसाग्वया

तोलताव छ्वोतं । कर्कोटक निमेष मात्रणं क्षम रूपं
 जुयाव यक्ष राजाया प्वाथसं चवनाव पिडा यानाव चवनं ।
 थनंलि शशी नाम यक्ष राजाया प्वाथस व्यथा लगे जु-
 याव नये त्वने मययाव अति दुःख नया चवन जुल ।
 थनंलि यक्ष राजाया प्वाथस चवंगु व्यथा खना माया
 राक्षषीया नुगःमछिनाव, अनेगू वासः नकाव चवनं
 अथेनं मजियाव बैद्य पनि सलताव क्यनं । अनेक उप-
 कर यातनं मजियाव सकल यां नुगल मछिना चवन जुल ।
 र्थथिगु अवशरस राजा नरेन्द्र देव गुरु वंधु दत्त आचार्य
 ललित चक्र ३ स्वह्मं अन थ्यन कलवयाव शशी राजा
 छको दर्शन यायेत वया धकं धयाव चवन । थ्व वेलस यक्ष
 लोकपनिसेनं खनाव हतासनं परदेशी थुपि अवश्य वैद्य
 ज्वीफु धकं सलताव दरबारस दुने ब्वना यंकल । थन
 शशीराजा दर्शन यानाव नादि स्वयाव फारेयानाव बीलं ।
 थनयक्ष राजाया रोग भति २ शांत जुजुं वनं । हानं
 ललित चक्र ज्यापु नं लखं दायका व नरेन्द्र देवनं वास-
 ल मिलेयानाव वंधु दत्त नं मंत्र जल तोनकाव बिल ।
 तुरंत नं प्वाथस चवंह्य कर्कोटक नं सियकाव तोलताव
 थव थासे चवन बल । थनंलि शशी राजाया व्यथा शांत
 जुयावनं, थन राजा शशीया हर्षमान जुयाव धालें भो
 परदेशी वैद्य पनि छिकिपनिस्सनं यागु उपकारणं जिगुरोग

शांतजुल। आव छपनिस्त जिनं फुगु चाःगु उपकारयाये
 छपनिस्त छुछु माःगुखः जिनं बिये धा २ धकं धयाव
 च्वन । थन परदेशी पनिस्वनं भो! यक्षराज छपित जि-
 मिसं थव म्ये, फै, दुगु कोस्यालि हयागु पोसं कया
 बिज्याहुँ अलेतिनि जिमिसं माःगु चिज वीज फवने धकं
 धाल, थवते खँ न्यनाव म्ये, फै, दुगु ह्वाति २ जोना स्याना
 ला नया हि तोना संतोष जुयाव च्वन । थव बेलस छन्हु
 छगू मौकाय् गुरु बंधु दत्त, नरेन्द्र देव राजा नं बिति-
 यात भो! यक्षराजा, जिमिसं फवनागु बीगुखःला मखु-
 ला? बीमफुगु जुसा छु जिमिसं वितियाये। उकेंजिमि मने
 अंडोल जुयावच्वन । धकं बिति यात । थवते खँ न्यनाव
 यक्ष राजा अति हर्षमान यानाव सत्य २ जिमिके दुगु
 जूसा बियेगु जुल । मदुगु जुसा जिनं गथेवी धा २ धकं
 सत्य बोलेयानाव धाल । थव बेलस परदेशी पनि स्वम्हं
 हर्षमान यानाव बितियात -भो! यक्षराजा छपिनि न्यास-
 ह्य काय मचा मध्ये दकसिवं चिधिह्य लोकनाथ छह्य
 फवने प्रशन जुया बियाबिज्याहुँ धकं बितियात । थवते
 परदेशी वैद्य पिगु बचन न्यनाव शशी राजां धाल हे हे
 परदेशी वैद्य थुह्य लोकनाथ जिगु यथ्येमखु चिधिकाय
 माँया हक जुइ हानं थव मचां वा सुथे पिना ह्तिने पाके

याना बहनी नका लोर्कपित लहिना च्वंहा उक्थें थुगु
 वस्तु छता जित धायेमते मेमेपि न्यासःहा यंकेगु जूसा
 जि बिये आम छता जित धायमते धकं आज्ञा दयकलं ।
 थ्वते खँ न्यना माया राक्षषी आदि यक्षलोक सकलें
 मुना वया हतकाव धाल । भो ! परदेशो छिमिसं
 मखुगु वस्तुक क्वन आमगु वस्तु यंकेत जिपिनाप जुद्ध
 याना त्याके फतसा जक यंके फँ मखुसा छिमिसं यंके फँ
 मखु धकं हतकाव च्वन । थ्वते माया राक्षषी या कडागु
 वचन न्यना परदेशोपि स्वह्मं निराश जुया प्याहां-
 वन । थलं नं प्याहांवया छगू स्थानसं च्वना स्वह्म सिया
 सल्हायात । राजा नरेन्द्र देवनं आज्ञा दयकलं— भो !
 गुरु वंधुदत्त थ्व यक्षलोक दक्कं संग्राम यायेत कींगु देशे
 वना चतुरगवल, सल, किसि शैन्य ज्याभ (हाथ
 हथ्यार) ज्वना वया थुपि दक्कं हतेयाना लोकनाथ
 कींगु देशे विज्याके माल धकं उजों जुल । थ्वते राजाया
 उजोंव न्यना गुरु वंधुदत्त आचार्य नं आज्ञा दयकलं—
 भो! राजन छलपोलं धयाथ्यें लसकलयकों गनयने—
 फँमखु, छुँभोजन याना नया जिविका ज्वी, किपि स्वह्म
 सियाजा थुलित कस्त, यको लसकल वै च्वनिबले गुलि
 जक दुःख ज्वी, उकें आव जिनं जत्त जुक्ति शास्त्रं मंत्र

तंत्रबलं जिनं जत्न जुक्ति याये धकँ धयाव छगू स्थानसा
 च्वना कलश पुजा यानाव लोकनाथया जीव शाधन
 याना व्वनं । कर्कोटक नागराजां गुरुयाके मोहनी कया
 लोकनाथ बगीचास म्हिता च्वंगु बखते ह्मे कीकाव
 थकलं । थनंलि लोकनाथयात मोहनी लगे जुयोव
 नेपालेगुपिनाप वनेगु इच्छा याना थव माँ बौपिके वना
 धाल भो! माता पिता जि नेपाल छधु वने धकं बराबर
 धाःगु न्यना पुनार्वार यक्षराजनं धाल हे ! जक्षगण थव
 मचा याकचा गणं पितव्छये मते । परदेशी वंद्य तस्यें यंकी
 उक्थं गणं छ्वयेमते धकँ धयाव कोठासँ कुना बाँलाक
 प्रति पाल यानाव तलँ । थन चाँह्लि माया राक्षषीनं
 भतिचा हे मतोतुस्यँ कोठासँ कुना नका त्वंका लुखासँ
 द्यना पिवा च्वना द्यनाव च्वन । अनेक उपाय यातनं
 ह्येगु असफल जुल । आखिरे बृंगद्योया छगू हँस कलशे
 शाधनयाना ह्येगु उपाय छगू खँ जुल ।

छन्हु उक्त खँ अनुसार गुरुबन्धु दत्तं योग याःगु
 या प्रभावं लोकनाथया मन नेपास वनेगु जक ध्याउना
 जुल । रात्री दना स्वोगु बेलस थव माँ लुखा तुँ सँफँ
 तथा द्यना च्वँगुलि माँया सेवा भक्ति दुगुलि माँया सँ
 छपु २ हाचाँ मगाँक्यो नितिं थव व्याकं चीका थःगु

पुर्व बासनांया महत्व सीका थःगु आत्मया हंस छगू भ्रमर
या रूप जुया ब्वायावया गुगु शाधन कलसस दुहाँ बि-
ज्यातं । थ्व खना थःपिंगु ज्या सिद्ध जुल धका छगु
हर्षयाना हतासं थःगु देश लिहां वयावंच्वन ।

वं वं छगू चिभाय भूमी थ्यस्यैलि सुथ जुल । छुं
भति आरामं च्वन ।

उखे माया राक्षषीया न्ह्योलँचायेवं दना थःकाय्
स्वोगु बेलस निर्जोवर सीन्हयो वैच्वंगु खना अति शोक
याना खवखवँ च्वनँ थ्व घटना व्याक्क राक्षषीगण
सभास कना अवश्यं थ्व परदेशी वैद्यपिंगु थ्व ज्याखः ।
कीस! थुमित तत्तकालँ थुमित ल्यूवने माल । तच्चोगु
बेगं ल्यूवया नापलाना गुम माया राक्षषी मं लोकनाथया
जीव दुगु कलश लिदाया यंकल । थ्वहे कलश यागु जल
तींकाव विलं । लोकनाथ वाथाक दनाव वल । मानं
काय् बुया चुपा नया थव मुले तया हर्षमान यानावं
च्वनं । थन परदेशी पनि स्वम्ह विस्युंवया छगू थासे
च्वना विश्राम यान सल्हायात, आव गथे याये की की
वयागु कार्य ध्वंस जुल धकं मति धंदा कया सेंसैं फुंफुं
मिकाव च्वनं । खछि लनकाव गुरु वंधुदत्त नं भति
तिचना यानाव पुनवार समाधि योग यानाव विज्यात

श्व समाधि यागु बल पुरुषार्थनं भैरव गणपतिं बिज्यात
 थनंलि भैरव गणपि साथ यानाव गुम यक्ष राजा या
 थासंन वनाव थथे बिति यात भो ! यक्षराज छलपोलं
 सत्यवाचा यानागु वीलाःमवीला? मवीगु जूसा युद्धयाना
 जिमिसं यंकेगु जुल धकं धाल । थथे परदेशी पिंगु
 वचन न्यना यक्ष राजां वितियात भो! परदेशीं वैद्य पनि
 जिमिगु स्यें, स्वं, ल्होया यंकेला? श्व वालख छम्ह जक
 छाया जिपि नं ब्वना यंकी धकं धाल । श्वते राक्षशीया
 वचन न्यना भैरव प्यंम्हसेनं अति क्रोध यानाव धाल भो!
 भो! यक्षगण छिमिसें वियागु खःसा ननानं विव मखुसा
 छिमित थथें फुतकाव विये धक भैरव प्यंम्हसेनं धाव-
 गु वचन न्यना ग्याना आव छुयाये थुपि नाप ल्वाना
 च्वनां छुयाये धकं मति अंदोल चित्तयाना विवश पूर्वक
 थव पूत्र लोकनाथ यात धालं भो! प्रिय पूत्र छ छछिख
 चाजक नेपाले बिज्याना लोकयात उद्धार यानी ननानं
 लिहां बिज्याहुं । लें श्व थसि मां पुसा होला हुं छ त्याहां
 वयेबले श्व थें सिमाबुया वोगु स्वया लिहांवा, थसिमायापु
 फछि न्हयोने तयाबिल । थन गुरु बंधुदत्त नं वछि थला
 मंत्र प्रयोग याना सिया बुका बिल । लोकनाथ न्हयोने
 तया भैरव प्यम्ह जवं खसं तया गुरु बंधुदत्त राजा नरे-

न्द्रदेव, ललित चक्र भरिया ल्यु ल्यु च्वना दक्क यक्ष
गण लोक पनिलस्वका कामरु क्षत्र नं प्रस्थान यानाव
बिज्यात । थन लोकनाथ पनि नागगण पनि सेतं
भाव भक्ति याकाव नेपाल मंडलवने धकं प्रस्थान जुल ।
बूःगुथसि पु हव्येका व हलं । लिपा कचिगु पु ह्वय्का
हल । व वं अनेगु पर्वत जंगल नदि गाम पुलाव व वं
को दुवाल थ्यन । आः फीगु नेपाल मंडल थ्यनिन धकं
मन हर्ष मान यानाव विश्राम याक जुल, थन आपालं
यक्ष लोक पिसं ज्या यात पंगल बाधाबिया च्वन । थूमित
भ्रम यायेमाल धका गुरु वंधुदत्त नं चितना यानाव वि-
भुति कयाव तारण तया लँ भूल यानाव बिल ।

थ्व वेलास यक्षगण गुलि लखेसं न्यायागू रूप गुलि
ब्यां यागु रुप कया लंख धारा लिसें स्वसेवया च्वन ।
थन भैरव प्यम्हं खिचा यागु रुप कया व च्वनं, थनंलि
आव नेपाल थ्यन । लोक पनित उद्धार यायेगु मतितया
ईश्वर बिज्याकेत्यनागुखःतर थ्व ईश्वर बिज्याके मफैगुजुल
बंधुदत्त चितनायात थनजा शशी यज्ञराजा माया राक्ष-
षीनं पनाव तल आःव ईश्वर थुगुरूपनं बिज्याके फेमखु
त धकं मनं चितनायाना विश्व तिर्थस किनारासं च्वना
लोकनाथया जीव आकर्षण याना व बिज्यात थन

नरेन्द्रदेव राजायात जजमान यानाव दिग वंधनयाना
 योग समाधि याना व बिज्यात । प्रथम पादस ईश्वर
 भ्रमर रुप जुया व बिज्यात राजाया न्ह्योल वया व
 चवन लोकनाथ भ्रमर कलसे द्वाहां बिज्यात किसलि
 देमछागुलिं प्याहां बिज्यात । पुनर्वार द्वितीय पाद
 आवाहनयाना बिज्यात । भ्रमर प्यहां तुं बिज्यात
 थन राजायात गुरुं आज्ञा दयकल भो राजन् छलपोल
 या न्ह्योलवयका बिज्यात लोकनाथ भ्रमर रुप जुया
 कलसे द्वाहां बिज्यात किसलि दे मछागुलिं प्याहां
 बिज्यात निको जुल आः छको बिज्याई तिनि थुकि नं
 पुसा मतःसा कीगु ज्या निस्फल ज्वी धकं आज्ञा दयका
 तृतीय पाद आवाहन याना व बिज्यात मंत्र जाप यायां
 भ्रमर रुप बिज्यात राजाया न्ह्योल वलं, श्व वेलास
 भ्रमर रूप बिज्याना व कलस स्वचा चाहुला कलसे
 द्वाहां बिज्यात । श्व वेलास राजा न्ह्योल व वगु स्वया
 गुरु वंधुदत नं राजायात पुलिनं घवसानकाव ईसारा
 बिया बिज्यात । राजाया न्ह्योलं चाल किसलि देख्या
 व बिल । थन राजाया मने लुलकि श्व वंधुदत नं जि-
 थिम्ह राजायातहे पुलिं घवसानका बिल, श्वैत छको जा
 गनबांकी तये छन्हु जिं श्वहे खङ्ग प्रहार याना बि

धका चत्त मत्ति लुल, थुगु खँ पर चित्त ज्ञान लाना
 बिज्याम्ह गुरुं सियेका बिज्यात थुगुखें लिपा श्वयात
 धाये धका सुंमुकं चवन । थनलिं खिचा रूप प्यम्ह स्वयं
 लोकनाथया जीव दुगु कलस खतेसन्तुतया कुबुया
 हल, ह हँ २ थान थाना तर पुलाः व वँ वलं, हानं छगू
 थन थानस शुद्ध भूमि खनाव देव खत दिका व विश्राम
 यात थन भैरव प्यम्ह सिनं बु धका हाल थुगु थास
 सकल देवलोक बिज्याना, लस्व वोगु जुया निति
 अमरापुर धैगु नां प्रसिद्ध जुल श्वहे थासे देग दयका
 तःगु जुल श्व देशया नाम अमरापुर धकं प्रख्यात जुल ।
 थननं प्रस्थान यानाव ह हँ २ ईगः त्यागः धैगु छगू थासे
 थेसैलि थुगु थानस विश्राम यात । गोर्खनाथनं नव नाग
 आशन तोता श्री करुणामय दर्शन या वल । थन
 राजा नं उजों जुल थुगु थासनं भक्तपुर जिगु देशे वनेगु
 धकं उजों जुल । थुगु राजाया उजों न्यना गुरु वंधुदत्त
 नं आज्ञा दयक मखु राजन् जिगु शास्त्र मंत्रतंत्रया वलं
 हयाम्ह जुया निति जें देशे यंकेगु धकं धाल । श्वते
 गुरुपा आज्ञा न्यना राजा नं आज्ञा दयकल भो गुरु छल्पो-
 लयात गुरु दक्षिणा शिलल्पा जक ज्वी ईश्वर जा जिगु
 हक ज्वी धकं थि थि दादविवाद जुया व देव ल्यहें थने

मफया व च्वन । थनंलि स्वम्हसिया चित्त मिले मजुया
 थ्व देशे थकालि म्ह बुढां धाथ्यें ज्वीका धका सल्हा
 जुल । अथेजुसॅलि कन्हें न्हापानं ललितपुर सहरया
 देशे थकालिम्ह सें धाथ्यें याये धैगु जमान जुया च्वन ।
 सखुंन्हु न्हापानं ललित चक्र दना वना ललित पुरया वर
 देवराजाया थास फेराज वया व गुरु व राजा व निम्ह
 सिया वादविवाद जुगु खँ जम्मा जाहेरयाना व वन ।
 थन राजा वरदेवनं देशे थकालिया छें ची दुगु धौ छगः
 बियेके छ्वत मचातसैं कया नकल नयेधुसॅलि थ्व धौ ले
 चीयागु रस दु सुनां हवगु धका न्यंसॅलि मचातसे धाल ।
 यो ? आजु २ फिगु देशया राजा वरदेवनं बियेके हवगु
 धकं धाल । थ्वते मचा तय्गु खँ न्यना बुढाया मने धंदा
 कया व धाल । आवजि नुंनया सेवाया याये मालीगु जुल
 छु जुई गुगु ज्वी धकं धंदा कया चोंगु बखते माहां त
 वया सःतवःल, लिसैं ब्वना यंकल ईखालखुस तया व
 सल्हा जुल । राजा नरेन्द्र देव गुरु वंधुदत निम्हेस्यनं
 सत्य बाचायाका उगः न्हयःगःया देवने च्वना देशे थका-
 लिम्हसैं नोवात हे हे लोकपनि राजा नरेन्द्रदेव यागु
 उजों नं बिज्याकुगु खः अथे जूसानं भक्तपुर सहर मखु
 उक्ये खोपंदेशे यंकेंगु मखु हानं गुरु वंधुदतया शास्त्र

मन्त्र प्रयोग याना हवगु जूसा नं सिल्पा व दक्षिणा
 जक ज्वी जें देशे बिज्याकेगु नं मखु ललितपुर सहर नं
 खः ललित चक्रया परिश्रम नं बिज्याकुम्ह ईश्वर जुया
 निंति ईगः त्यागः मंगल भक्त देव त्रि त्रिभुवनया जुल
 यल देशे अति नं लक्षण युक्त जुगु जुया निंति देवता थनं
 यंके मफया चवगु उक्ये यल देशे तव बाहालसं बिज्या-
 केगुमाः न्हां धकं उगः७ न्हेगः न दवे जुया वनं। श्वहान
 बुढा मृत्यु जुया वन जुलं । श्व वेलाश राजाव गुरु व
 निह्यस्यां थि थि परस्पर खं जुल । जीसं असत्य खतें
 न्हापा ले वनावले कर्कोटक नाग राजा यात छले याना
 यंका । हानं राक्षषी राजा माया राक्षषी यात हेयका
 हया या निंति कीतः श्व बुढां छले याना सत्य वाचा
 कया अन्याय खँवोल याना वन । आब छु याये धकं धया
 व आब ईश्वरया मूर्ती दयके मानी मेमेगु नं यायेमानि
 जि गुरूं कंगु थें ह्यसद्वल पीठयागु याचा कयाहयामूर्ती
 दयेके माल धका समाधान याना ह्यसद्वल पीठे योगांवर
 पुजा याना चाकया हया यंपी बिहारे बिज्याम्ह सुनय
 श्रि मिश्र ब्रम्हण ब्राम्ह चर्य भिक्षु सःताः हया देवया
 मूर्ती दयकेगु वंदीवस्त याना व मालको सामाग्री तयार
 याना विलं । थन नवरत्न सहितगु सूवर्ण कलसे गर्भं

सतया यंपि बिहार देवया मूर्ती दयकलं । अति नेम
पूर्वक नं देवता दयका सिधसैलि अमरापुरस यंका दश
कर्म समेतं याना वैसाख शुक्ल या प्रति पदा खुन्हु रथे
तया ललितपुर थें कं रथ जात्रा यायेगु वंदोबस्त याना
रथ दयकेगु, सिया जात स्वया रथ या लक्षण प्रमाण
नं दयके विल ।

थुगु बखते ललितपुरे जात्रा जम्मा न्ह्यगु दया च्वन।
थुलि मध्ये तधंगु जात्रा श्री जटाधारी लोकेश्वर मीम-
नाथ यागु जुया च्वन । थ्वहा देवता गथि ह्य धालसा
लगंखेले श्रीमति धैगु देशे वृष वर्मा राजाया यम द्वारे
स्वया वया थेंतुं चोंक दयकाव हानं ईश्वर वांलार्चनं
धैम्ह वृष देवराजा या किजा गुह्य सें लगंखेले च्वने
मफया चक्रवर्ण महाबिहारे थापना याये हल । थ्व ईश्व-
र संक्षेप क्यन ज्येष्ठ बर्ण महाबिहार दयका वैशाख
शुक्ल पक्ष चौठी खुन्हु निसें देश जात्रा याना तवहा
जटाधारी लोकेश्वर यागु रथ जात्रा ह्यासे याये धका
वसपोलया न्ह्योने चैत्य थापना याना वलिपुजा याना
आवाहन याना बिज्यात । प्रथम, द्वितीय, तृतीय स्वंगू
पाद थ्यसैलि ईश्वर कोप जुया क्रोढ दृष्टि स्वया
बिज्यात । न्ह्योने चोंगु चैत्य तवज्यात । थन गुरु वंधु-

दत्त ग्याना वाथाक दन थुहा ईश्वर यागु रथ ह्यासे
याये जिईमखु धकं मति तथा मे मेगु जात्रा गुगु खः
जात्राय् दु पवाना फुक्क ह्यासेयाना मीननाथयागु रथ
यागु रथ जात्रा थौया अद्यापि चले याना तल ।

श्व बेलस गुरु बंधुदत्त राजा नरेन्द्र देव राजा
नं मालको पुजा विधि सकटां सिधयेका रथ प्रतिष्ठा
यात श्री स्वयंभु व श्री बज्रसत्त्व चाय्का बिज्याकल ।
पलेस्वांया स्वरूप वायमो जलया स्वरूप लुंयागु वाय-
मो पलेसकिया स्वरूप पौयागु ग्वरा वायमो त्रयोदश
भुवनया स्वरूप, रथयात-ककोटक स्वरूप घमाः भैरव
स्वरूप प्यहाया प्यचा घःचाः सिंघिनि ब्याघिनिया
स्वरूप घः कु तयेगु सिं४ घंमाः पासाः हितिमंङ्ग नागया
वाहां, प्येगु धोखा प्येगु चतुर्द्विप जवे ब्रह्मा लिउने विष्णु
खवे महेश्वर लिउने चवंहा भुजिमाद्यो सुकुंदल
देव पुत्र पूर्व जन्मे दस्येनं दान मयाना सुकुंद देव पुत्र
जुया नं नये त्वने मखना दुःख सिया चवंहा श्री करुणा-
मयनं उद्धार याना तवहा श्व देवता नं रथे नःगुइ
थुगु प्रकारं नं लक्षणनं संयुक्त यानाव स्वयंभुया
पुजावारी व बंधुदत्त गुरुया खःलत ह्या श्री करुणा-
मययात पुजा यापि पांजु तथा व बुंग देश नं यल देश
थ्यंक रथजात्रा याना वल ।

श्व रथ यात्राय् आचार्य बन्धुदत्तया पुरोहितत्वे
व राजा नरेन्द्र देवया आज्ञा कायेमाःगु इत्यादि रिति-
थिति यलया महाराज वरदेवं दय्कुगु खः । श्व हे
राजाया पाले सर्व प्रथम यात्रा जुगु खः । श्व हे दिनसँ
चोभा द्योया रथ यात्रा दातिगाले रथ तुंगुलि खत
खतया देव देगलस तयेहःगु खः । दें दें बुंगंनिसँ रथ यात्रा
यायेगु प्रथा कठोर गुलि १२ फिनि दें छकोजक जुगु खः ।
यले फुक्क याः प्यंगू न्यायेकेगु व श्री लोकेश्वरया थःगु छँ
दे दें वये धैगु धापू तूजं व दक्षिणायन प्रमाणं बुंगः यने-
गु व उत्तराक्ष्ण प्रमाणं यलया तःबहाले हयेगु व दें दें
बैशाष शुल्कया पारूखुनु रथे तयेगु वन्देज नं वरदेव
महाराजां दय्कुगु खः ।

छन्हूया दिने राजा व आचार्य निहसियां छगू
हर्ष पूर्वक द्योया संमुखे चवना परस्परे न्हापा जुया वंगु
खँ न्हेथना थिथि खँ ल्हात । थबले आचार्यं छगू खँ
धालः— हे? महाराज की ज्या सकतां सिधल । तर छगू
ज्या जक बाँकी दनि । व खः महाराज छन्हू छगू मनं
कल्पना याःगु । श्व छगू ज्यानं याकनं यायेमाःगु दु ।
छगू तथ्य खतं बिचार याःसा मनथा कल्पनानं यानागु
तुल्य हे खः । श्व कल्पना गबले कामरू कामाक्षे श्री
लोकनाथया हंस साधन यानाबले वोह्य भ्रमर रूप लोक-

नाथ निक्व तक्क लिहाँवन । स्वकःगु खुशीनं लिहां
वनी धका संकेत महारायात जिं चुल्या ख्वाना इशारा
बियाबले गुकि महाराजया छगू गर्ब मने ल्वीकलकि थबैत
छक्क गन मस्यासँ तोते । छगू मनं थव कल्पना याःगु दु,
थव ज्या सिद्ध यायेगु बाँकी दनि । थव ज्या थौं हे याय्
दःसा ज्यू, आःहे जित स्याना बिज्याहुँ धकाः राजायागु
छगू काल्पनिक तोःह ज्वना खँ ल्हात ।

थव खँ राजा कृतार्थ व शरम जुल । थव छगू
जिगु भूलगु कल्पना खः अपराध समायाना बिज्याहुँ
धका राजां प्रार्थना यात । थव खँ स्वकोतक राजा व
आचार्यया जवाः सवाः जुल । आखिरे आचार्यं एसा आः
जिगू छगू प्रति रुपया स्वरूपं गुगुँ छगू चीजयात जक सं
प्रहार यायेजा अबश्य मंजुर मजुसँ मगाः धका तस्सकं
जिक्कर याःगुलि आचार्यया बचन हारे यायेगु बेठीक खना
बिबशपूर्वक छुँ छगू पदार्थ त्वाथला छुँ अनर्थ ज्वी मखु
अले छुं थव ज्या यायेगु मंजुर यात । आचार्यं कूश पूत-
लीका छम्ह न्ह्योने तयाबिल । राजां पूतलीयात खड्गं
छु प्यंथल ज्वी, थुत्ते आचार्यया गःप नं प्यंदन । आचार्य
थव पूतलीकाय् थःगु हँस शाधन याना थुकी तयाःहगु व
थथे शाधन यायेगुली अतिनिपून धैगु खँ राजाया लोमन

राजाया सोहत्र मनं ज्या याःगु अःख जुल । थुकिं राजां
तस्सकं अपशोच यात । थ्व अपशोचं थःनं खड्ग प्रहार
याना प्राण तोता वन । आचार्य व राजा निम्हं लोक
नाथ या जःखः पाली लोन जूवन । जात्राय् खपया
राजाया नेतृत्वनं मंत । थ्वया प्रतिनिधिस्वरूपं खपं खड्ग
हयेगुया स्वरूपं थौं तक यलय छे भडेल अडा द्वारा हया
चवंगु दु हानं थथे हे गुम ललित चक्र ज्यापुनं थुजोथु-
जोपिंजा मदन वन धासेली जि तक म्वाना चवनेगु छु
प्रयोजन दु धका छगू प्रण व ध्याउन यायां गुम्हं बुंगं
द्योया पालीया पद्मे लीन जुया प्राण तोता वन ।

बुंगद्योया रथ यात्राय् प्वाक लँया प्रदर्शन
गुगु यलय वरदेव महाराजया राज्यकाले यागु खः ।
थ्व खँ छन्हु तःदहया कर्कोटक नागया कलाः नागिनी-
यात मिखा स्याःगु छगू रोगं थियाजुया चवन । थ्व पीडा
नागयातनं तस्सकं सुख मंत । अनेक उपचार यातनं छुं
थ्यूगु हे मखु । अले मिखा स्याः रोगया वैद्य मालेगु निंति
नागराजा छम्ह ब्राम्हणया भेष धरेयाना वल ।

संयोगबश थुबलेलाक प्रख्यात किसान वैद्य
छम्ह लेँ हे त्वाक्क नापलात । थ्व वैद्य धंगु सीका भेष
धारी ब्राम्हणं रोग क्यनेया निंति वैद्ययात तस्सकं आ-

ग्रहयात । वैद्ययात थःनापं तु तःदहने ब्वनाहल ।

भेष धारी ब्राम्हणं धाल हे वैद्य ? जि ब्राम्हण
मखु, कर्कोटक नागराज खः जिगु थाय् थ्व पुखुली दुने
खः । छि संदेह व धंडा काय्स्वा । यदि थ्व रोग लाय्-
के फुसा छित भारी छगू शिरपाः नं बी । थथे धया
वैद्ययात छुं छगू तोह तया मिखा तिसिके बिल । नागं
वैद्ययात हुत्ते ज्वीका साला निम्हं दहने दुव्वाये जन ।
क्वथ्यंसैलि वैद्यया मिखा ख्वले याये जिल । थःत छगू
तधंगु भूवने हैतःगु खन । नागिनीया थाय् क्यने जन ।
वैद्यं वासलं पाकल । नागिनीया तत्कालं मिखा स्याःगु
रोग लाल । नाग-नागिनी छगू तस्सकं लय्ताल । वैद्य
पवंगु शिरपा बियेगु छगू बचन नं बिल । शिरपा खतं
माःगु धन रत्न बिल । अले नाग म्हे तैतःगु रत्न दुगु
प्वाकलं छपा खना वैद्यया तस्सकं लोवन । थ्व चीज नं
पवंगु मबी मजिया थ्वनंविद्या क्वबिया छें थ्यंक तये हल ।

छुं समय लीपाया छन्हुया दिने संयोगवश
किसान वैद्यया बुं ज्या याःवंबले तांन्वया गुगु लँ फिना
ज्यासने थाकुया लँ तोता ज्या सनाच्चं बले बुंया छगू
द्यागिमे तोता तःगु लँ छम्ह भूतं खन । लँ यात लोवना
थ्वं लँ खुया ब्वाय् वना चवंगु खन । लँ खुया अंगु वैद्य

खना भूत घात लिना जन । लिलाके मफु । लँ जंगु जन
जुल ।

छुं समय लीपा छन्हु बुंगद्योया रथ यात्रा
ज्यावला जात्रा स्वोवोम्ह मनुष्य रुप धारी भूत व वैद्य
निम्हं धोदुल । लँ नं फिना वोगु खन । थःगु दसि खँ-
गुलिं निम्हसिया लाका लुकु जुया तस्सकं ल्वापु जुल ।
संयोग बश थन थाय् लाक मनुष्य रुप धारी कर्कोटक
नागनं वोगु पाःलात । ल्वापु जुया च्वंगु सीका खंका
निम्हसिगु ल्वापुयात शान्त यानां बिल । थमं बियागु
लँ कया थ्व निखल यात बिघेगु मखु । थ्व जि शिरपा
खतं बियागु खः । थ्व सिर्फ श्री लोकनाथ यात योग्य
थनहे दुन्ता याये बह खः धक धया द्योयात दुन्तायात ।
थ्व खँ दर्शक वर्गत सकलें खुसी जुल ।

ज्यावला यात्रा छन्हु थ्व प्वाकलँ या प्रनर्शन
यायेगु थिति देंदसं रथया प्यकुने-प्यकः ज्यावला जा-
त्राय् प्रदर्शन यायेगु थिति वर देब महाराजं दय्का
बिल । थ्व कयनेगु थिति थौं तक नं अटुटं चले जूगुदु ।

बुंगःद्योया अखंदित सत्य नागया तिसाया खँ
छगू थथे दु- छन्हु लगं जात्राया भुज्याया न्हिने सिया
फिं निताःइले गुह्य नखुया सत्य नागराजा थः कलाः
यात धया थौं जि बुंगद्योया लगं जात्रा छक्वो स्ववने

त्यना धया छेँ पिहाँ वया छगू मनुष्य रूप कया स्वच्छ-
गु लँनं फिना छगू उच्च थासे चवना स्वया चववल ।

थुवले छह्य छगू भेषधारी गरूडया नये पित्या-
का अन वने थन वने मदय्का गुगु न्यखी नाग ज्वनेया
निंति स्वो जुलं मखन । थवया कलाः नागिनीयाके न्यन
हे ! नागीनि छं भात थौं नन वनथें, छक्व नाप लाये
धकं वयागु खः । छगू बुखँ छगू ल्हाये माःगु दु । की
की छगू थः थिति हे खः । थौं वयां लिपा वये थाववी,
नाप लाय् दःसा ज्यूगु खः । जि अन वना स्वो वंसां
ह्यसिके फैं मखुला ? नाप लाय्फैं मखुला ? यदि छं ह्यसिके
फैंगु छुं खँ दःसा छक्वो धया दिसँ, नाप हे लावने, फःसा
छिं स्यूगु खँ सीके फैंगु खँ धया दिसं ।

थ्व खँ न्यना नागिनीनं छगूखँ थथेधाल
हे ! मानव जिमी स्वांमी नापलाये हे माःसा अनवना
स्वो हुँ । गुजोगु रूप गुगु ढंग रंग वसः लँ खः छं अपुक्क
सीके फैं, स्वरूप तोतानं वसः तुयुगु स्वच्छगु खः, सकल
लोकया हुले दक्के च्वे चवना च्वनि, छ्यो छगो थें
थ्याःह्य ज्वी इत्यादि थाक्क खँ कन । अले थ्व छेँ पिहाँ
वन । अनथ्यकं वन, भेषधारीं अन तरुन्त थ्यंका चाक-
मकं स्वया भाग्यवश मनंतुना छह्य तय ज्वींका थवया न्होने

च्वना, छगू खँ थथे धाल-हे भेषधारी मानव छंतः जि
 माःवया, जिथाय् छक्क वनेनु धकं धाल यदि छ मान-
 वति मवोसाः वलात कारण याये मोलेफु। धया छगू भेष
 तोताथःगु स्वरूप वयन । भेषधारी नागनं धाल छगू
 तःधंगु संका ज्वीका कलाःनं थःगु व्याक्क रूप वसः
 स्वभाव इत्यादि ब्वाक्कं धया हःगु खँ त सीकल, जि
 छथाय् वयेमाःगुनं छुं कारण मदुथेंचवं । ददि भवोसें
 मज्यू धैगु जूसा जि छगू खँ सत्य वाचाया खँ ह्लाये
 थ्व हां छु धाःसा जि छक्क जक कलाःयात खँन्वनावये।
 छंथाय् थथें पक्का वये । सत्य ३ वये । छं अले
 माःमाः थें या । फुथे छं यायेगु स्व । थ्व हाँ जि
 तोहःतया धयागु मखु ।

थ्व हाँ सत्यगु खँ खना गरुडं छक्क सत्य वाचा
 दुला मदुला ? धकाः परीक्षा यायेया निंति नागयात
 त्वता छवत ।

सत्य नाग कलाःया थाय् वना छगू खँ न्वात,
 हे ? निर्बुद्धि छं जित भक्षक याईतयात छं परिचय
 बिया जित ज्वंके हल । छव जिव सदांया निंति बाये
 मालीगु जुल । बायेमाःगु जुल । छं लियातक नं थ्व
 न्यखुई च्वना त्यखुथें हाला ख्वया च्वंसां जि नापलाय्

दैमखुत धका न्वाना गुम्ह गरूडया थाय् वना आः छं
माःगु ज्याया धकाः ह्योने बल ।

गरूडं थ्व नागया सत्यता दुगु खना तचोतं हर्ष
जुया नागयात छुं मयासैं गुम्ह श्रीआर्यावलोकितेश्वरया-
त दुन्ता याथे हल । थबलेंनसैं श्रीबुंगद्योयात थौंतक
अछांदित रूपं थ्व नागया तिसा रूपे प्रचलने वैचवन ।

बुंगद्योया न्हवं स्नान यायेगु हेतु थथेदु फी
नेपाल मण्डलया छगू दुगु संस्कृति थें श्रीआर्यावलोकिते-
श्वर लगंछ्यले बा बुंगया न्हवंगाले अधिस्थित भूमी
बिज्याका पंचामृत जलघट प्यंगलं व गुरु आचार्यया
अमिशेक शंख लखें महास्नान याना बिज्यायु । हानं
बहनीनिया चान्हे गथे सीवले थेंतुं तुयुगु द्यवंतं फायका
तोपुया प्यहसैं कुविका काहा सीबाजा थाना गुगु तःबाहा
ले यंका च्वंगु घटना छन्हु माया राक्षसीपिसैं खना
स्वोया थ्व थःकायेयात थथे याःगु व्यवहारं छगू तचोगु
अपशोचयात ।

अले थ्वैत धैर्यया निंति देव देवता पिसं हय्-
कल—हे ? माया राक्षसीपिं थ्व गुगु घटना संस्कृतिया
पाखें खःछुं अपशोच यायेमाःगु मखु। यदि थ्व मखुथें च्वंसा
गुगु अधिस्थित भूमी द्वलमे च्वना व अति श्रद्धाभाव तथा
पूजा भक्ति व हर्षखतं गीत वाद्य, म्ये' हाला च्वंगु पत्या

मजूसा छको अनवना स्वो हूँ । हानं थनि च्यान्हु खुन्हु
 थव गुगु मूर्तियात तृपंचाशतकलशाभिषेक व दशकर्म
 माक्व क्रिया लँ पुलि छायेकेगु सिद्धयाना हानं यज्ञ होमा-
 र्चन याना, देदँ वैशाख शुक्ल प्रतिपदा खुन्हु सहर्ष पुर्व-
 क रथारोहन रथ यात्रा यायुगु थव प्रख्यात प्रसिद्ध प्रच-
 लन स्वोया गुपि माया राक्षशीपि व मेमेपिनं छगू
 तचोगु हर्ष या:गुया दसि थव खः ।

फिनिदेँ छको द्यो बृंगंसाला ह:या इवला
 ख्यले दिकेगु व इवला ख्यलं शुन्यं बाजं, ह: पा ईत्यादि
 मव्यूसेँ हासः मदेक सालेमा:गुया छगू धापू थथेदु । उव-
 लेया छगू रथ यात्राया इवला ख्यले गुमि भुज्या वल
 अपालं भूत प्रेत लाखे ल:सिते चान्हेसिया इले थ:थ:गु
 रीतंभुज्याले बौया,द्योने गुलिसियां छ्योँतया,ला,हि तया
 गुलि सियां म्ये, न्हाय्पं, मिखा,ल्हा:, तुति ईत्यादि दुम्ह
 सिया दुदुगु जोलं थथे तया थ्वहे नया तोना मस्तं द्यना
 च्वन। थव खना द्योयागुलि पांजु,ज:ला ख:ला पांजु,भायो:
 पांजुत सकलें अचम्म अत्भूत जुल थव भूल ला? भ्रमला
 धार्थेला ? धका तचोगु धंडा, ताप, त्रास ज्वीका म्हे-
 ज्यू मदेका केकेकुना: न्ह्यो मवसां न्ह्यो वो पहलं भोसुना
 च्वन ।

अले नसंचा इले भैरब प्यम्ह प्रतक्ष प्रकत जुया

खिचाया भेषधारी रूप जुया गुगु खिपते प्यह्मं च्वंवन
तुति खिपते भेषधारी नागरूप जुया खिचाया तुतीक्यंकाः
बिल । अनं नसें सालाहया पूचोया दुवाते थ्यंसेलि थुपि
व्याक्कं अलपत जुल । मनुया आवा-गमण जुल । थ्व
खिचा प्यह्मसें अतभूत व अचम्मखतं गुम्ह द्यो सालाःहःगु
स्वया क्यना सकलें आश्चर्य व विश्मय ज्वीका च्वन ।
उक्त भूत प्रेत लाखे लःसिं तसें वा मचाक्क भैरव रूप
धारी खिचा तसें सालाः हःगु जुल । थनंनसें थ्व थासं
सालीबले शुन्यं बा छुं शब्द मवय्क द्यो सालेगु व नसं-
चा इले सालेगु चलन जूगु कारण थथे खः ।

बुंगद्यो बुंगंसालेवले भावी ग्वाखच्चे म्वाकं दिकेमज्यू
गु खँ छगू थथेदु छन्हु श्री लोकनाथया बौ शशी राक्षषी
या थःकाय प्रति अति माया ममता प्रेम प्रीति छन्हु बुलना
थौं जिं थःगु व्याक्क शक्ति ज्याख्यले अवश्य काय यात
हरण मयासें गन तोते धका मनयाना च्वन । थुगु अव-
स्थाय लाक संयोगवश तःचोतं बहनी नसें वा गाना
चान्हे तकनं तचोतं बर्षा जुयावं च्वन । हानं ङिनिदँया
रथ यात्राय छगू गुगु भावी ग्वाखच्चेलाक बुंगद्योया रथ
यात्राय् छन्हु संयोगं दिगु त्वाक्क पाःलाना च्वन । थ्वहे
मौका सीका गुम शशी राक्षषी गणपिं वया न्यखुया लखे
शशी राक्षषी वसीलः रूपधारी जुया न्यखुंनसें गुगु

ग्वाख च्वे च्वंहा रथारोहन लोकनाथ हरण याये निंति
गाः म्हु म्हुं अन थ्यंक वल । लःया तरङ्ग वेग वढेयाना
लखं म्हु म्हुं रथ क्वे थ्यंक वन । चाया निगूगु प्रहार
जुल ।

थ्व अवस्था सीका पक्का नं गुहा शशी राक्षषी
तसें श्री लोकनाथ (बुंगद्यो) अवश्यं यंकीन, हरण याई
नं धैगु छगू मौका सीका, मौकाय् लाक्क गुगु गोंखयल
स्थाने च्वंहा गुहा उहा महेश्वर छगू खतं गोंगः हाली
थें हाला विज्यात अले मखुथें जुल- खा हाल नंसन
धैगु छगू भय कया थःगु गुप्तज्यास्यन हानं लोकजनया
थ्व थासेनं वैवने याईगु जुल ईत्यादि भयं शशी
राक्षषीपि भयभीत जुया विसे वन । अवले नसें थ्व
ग्वाख च्वे बुंगद्योया रथ दिके मज्यूगु छगू चलन जूगु
खः ।

गुगु दीला द्यो काःवनेजु धाःसां बुंगद्यो क्वदु-
वाले काःवने माःगु छगू पूर्वज संस्कृति खँ खः । मनूया
थें द्योयानं मां बौ व थःगु छेँ प्रति प्रेम दु । छन्हु हर्ष
पूर्वक श्री लोकनाथया दच्छिया रथ यात्रा सिधेका छधू
थः मां बौयाथाय् वनेगु इच्छा यात । क्व दुवाल थ्यन ।
अनं अखे थःगु छेँ वनेगु लँलोमन, लँमसिल । छुं भति
विश्राम यान वं च्वन ।

अले छगू लः लिसें न्याया रूप ववंहां वनेगु
 विचार जुल । न्याया रूपं लः लिसें वन । थवले लाक
 त्वाक्क कर्कोटक नागया कलाः नागिनीनं थ्व भाबी खँ
 सीका काचाक्क नाग कन्या रूप धरेयाना छगू पूजा
 भाव व भक्ति पूर्वक ह्येका श्री लोक नाथयात लिखतं
 गुगु नेपाल मण्डलया छगू थःगु थासे तुं लिखल ।

थौं थ्वया प्रति रूप स्वरूपं छह मालीनी नं
 स्वां छफो कलसे दु पवना गुगु कलस थ्व ज्वना मेमेपिं
 थ्व ज्याय् माः माः पिं सहितं जाना छगू थिति प्रचलने
 वोगु थथे खः । थ्व रथ यात्रा ऐतिहासिक पृष्ठ भूमि
 युक्त प्रसिद्ध मनोरंजकगु सर्व श्रेष्ठ लोक प्रिय रथ
 यात्रा थ्व खः ।



बुंगद्योया रथ जात्राय् गबले, गन, गुख्तं रथ स्यंगु जकया धलःपौः—

३२० साले अरि मल्लया पर्याय

शुभ संवत् ७१९ चैत्र शुक्ल एकादशी पर
द्वादशि थ्व खुन्हु श्री स्वयम्भु चैत्यस मलः जूगु
निभाः- वीन्ह्यो श्रीश्रीशिवसिंहदेवया पर्यायस शुभं
श्रोयोस्तु संवत् ७२३ श्रीजयसिंह देवस्य विजय राज्य ।
८३६ वैसाख कृष्ण अमाई पर जेष्ठ शुक्ल पारू बृह-
स्पतिवारे थ्व खुन्हुया रात्रीया प्रथम पहर जाव वेलस
श्री जटाधारी लोकेश्वरया रथः मिनल थँति तोलस
श्री २ ऋद्धिनरसिंहया पर्यायस थ्वखुन्हुया रात्रीस
राजा उपाध्या परमाण पनिदक्कं छाया चितायाक
जुल । २३९ जय महिद्रसिंह देवस्य विजय राज्य शुभ ।
श्रोयोस्तु ८९६ सालं बुंगंसागु ज्येष्ठ शुक्ल पारू खुन्हु
बुंगदेव रठस विज्यात ७४७ सिद्धिनर सिंहय १०पर्याय ।
श्रोयोस्तु संवत् ८४६ आषार शुक्ल चौठि ४ बुधवार

खुन्हु लगंजात्रा न्यायकल थुगुसाल वुंग देशनं यलदेश
 लगंजात्रा तकया आकसि १० तोधुल वुंगे जावला जात्रा
 तकया जंमा २३तोक धुल आःसि थुगु साले ननानं वाः
 पिपेमफु वा धु गाना पुवामला जय योगनरेद्रमल्लया
 पर्याय जुल्ल शुभं ।

संवत् ९१९ मिति वैसाख कृष्ण दशमि शुक्ल-
 वार थुखुन्हु रात्री ८ घौः जाःवले रथ मिनलः देव समेतं
 आषार कृष्ण द्वादमि पर त्रयोदशी बुधवार देवलस
 विज्याकल वुंगंसाःगु जुल शुभं ।

संवत् १००९ श्री करुणामयया रथजात्रा
 वैशाख शुक्ल ७ सप्तमि खुन्हु माःपाःकालस थ्यंसैलि रथ
 तोधुल । अनंतुं दयका ज्येष्ठवदि १० दशमि खुन्हु श्री
 करुणामय रथे विज्याका जात्रा सीधयका दिलावदि ५
 पंचमि खुन्हु ज्यावले पिसाल षष्ठमि खुन्हु अनंतु ग्वतुल
 दिलावदि १० जतन जुगति याना रथ थँना दिलावदि
 १३ रथे विज्याका गुंलाथ्व ३ खुन्हु वुंगदेश विज्याकल ।

मैपाल संवत् ९०४ वैसाख शुक्ल पारुखुन्हु
 श्री करुणामय विज्याकल थुखुन्हु तुं मंदल फले चास
 थ्यंकल । अक्षय तृतिया खुन्हु सा दान चौठि खुन्हु
 गाःवाहा जात्रा न्यायका पंचमि खुन्हु पुजाभाव सिधयका

माःपाःकालस थात षष्टमि खुन्हु सालाहया हःखुछिका
वह पताः छाय धुंका अनंतुथात साले मफत सप्तमि खुन्हु
याःन्याका अष्टमि खुन्हु भुज्यायाना साःगु वखतस रथ
चाःतुलावन नवमि खुन्हु लगंख्यले थ्यंकल दशमि खुन्हु
वलिवीया एकादेशि खुन्हु लगंजात्रा न्यायकल द्वादशि
खुन्हु भुज्या सिध्ययका ननिचायाः न्यायकल थ्वयां
फिनिन्हु १२ खुन्हु ज्यावल पिसाला यान्यात प्यन्हु
खुन्हु ज्यावल पुजा याना श्री करुणामय वुंग देश
विज्याका प्यन्हु खुन्हु विचा पुजा श्री ३ रणवादुर
महाराजाया पर्यायस शुभं ।

श्रोयोस्तु संवत् १४३ साले चैत्र महिना २ निला
दु चैत्रे अनालादु थिला महिना सुलं टुट खः

श्रोयोस्तु संवत् १४८ साले श्री करुणामय
रथ जात्रा याना हया वैशाख शुक्ल अष्टमि खुन्हु नुगले
भुज्या सिधेका साला हस्यंलि थईना थ्यस्यंलि रथ
यतिनावना साले मजिया थईना फलेचा श्री करुणामय
विज्याका म्येकथं रथ दयका लगं जात्रा न्यायका
ज्यावले पुजा जुल शुभं ।

श्रोयोस्तु संवत् १७१ वैसाख शुक्ल पारू खुन्हु
श्री करुणामय रथे विज्याका जात्रा सकता सिध्येका

जेष्ठ शुक्लया दशमि तिथि दशहडा खुन्हु ज्यावल
 पिसाला हःगु बेलस तव पुखुलि थ्यसेलि आःसि तोधुला
 श्री करुणामय तवपुखुलि फलेचास बिज्याका रथपिया
 रथ दयका सालायंका ज्यावले पुजा याना मालको
 कर्म सिधयका श्री करुणामय वुंग देशे विज्याकल ।

श्रोयोस्तु ९७९ वैसाख शुक्ल पारू खुन्हु श्री
 करुणामय वुंगदेशे रथे विज्याका भति सालेवं आःसि
 तोधुला मेगु आःसि तया साल अनंतुं हानं अक्षय
 तृतिया खुन्हु मालको कर्म सिधयका सादान याना
 सासेलि रथया आःसि व रथ चाःतुला वना श्रीकरुणामय
 रथं कोकया हाकनं रथ पिया मेगु रथ दयका फले
 चास विज्याका शांति स्वस्ति याना रथे विज्याका अन
 नं साला हया ग्वाखंचोसंयाःन्यायका सखुन्हु साला
 हया ईउलाख्यलेयाः न्याय कल वयां सखुन्हु नसंचास
 साला यंका पूचो मण्डप फलेचास थ्यन अनं प्यन्हु
 खुन्हु साला हया गाःवाहा जात्रा न्यायका वया सखुन्हु
 भुज्या सिधयका नुगः जात्रायायाः न्यायकल । वयां
 सखुन्हु नुगः जात्राया पुजाभाव सिधयका लगं ख्यले याः
 न्यायका व वैसाख कृष्णया दशमि खुन्हु रात्रीस रथ
 मिनया श्री करुणामय समेतं मिनल, देव विचाः मयासें

पाजुपिं निम्हं प्याहाँ वया चवन । वल्ल तलं देवमाला
 हया छगू थास जगाः फलेचास तथा जीर्णोद्धार याना
 व माको कर्म सिधयका व शांति स्वस्ति याना न्हूगु रथ
 दयका प्रतिस्था याना आषाद कृष्णया अमाई खुन्हु रथे
 विज्याका वया सखुन्हु लगं जात्रा न्यायकल । सखुन्हु
 पुजाभाव सिधयका ननिचा जात्रा न्यायका च्यान्हु
 फिन्हु दुखुन्हु ज्यावल पिसाला ज्यावला जात्रा न्यायका
 ज्यावला पुजा याना प्यन्हु खुन्हु थननं साला वुंगे
 ज्यावल छयलेस यंकल ज्यावलाजात्रायाः न्यायका प्यन्हु
 दुखुन्हु ज्यावला पुजा याना श्री करुणामय देवलस
 विज्याक जुल । थुगु वर्ष थथ्ये तक्क जुयावन ।

श्रोयोस्तु संवत् १८१ वैशाख शुदि पारु खुन्हु
 रथे विज्याका साला हया मंदयः फलेचासयाः न्यायकल
 अक्षया तृतिया खुन्हु सादान याक जुल चौठि खुन्हु
 गाःवाहा जात्रा न्यायका पंचमि खुन्हु पुजाभाव सकतां
 सिधयका नुगः जात्रा न्यायकल सखुन्हु पुजाभाव सकतां
 सिधयका लगंछयले माजु सिमा चाहयकाःतल सखुन्हु
 वलिविया सखुन्हु लगंजात्रा याकजुल । वया सखुन्हु
 पुजाभाव सिधयका ननिचा जात्रा याक जुल । हानं
 ज्यावले पिसालाः ज्यावला जात्रा न्यायेका व प्यन्हु

खुन्हु ज्यावला पूजा भाव सिधयका श्री करुणामय वुंगदे
सविज्याक प्यन्हु खुन्हु वियाः पुजा जुल शुभम् ।

श्रोयोस्तु संवत् ९८९ वैसाख शुक्ल पारु खुन्हु
श्री करुणामय रथे विज्याका साःगु वखते हामुकि
लंक्वहां विज्याप्वं धःमास च्वंगु नंयागु चुक तोकधुल
साले मजिया अनंतुं थात । मेगु चुक तया सखुन्हुसाला
हया मंदः फलेचास जात्रा न्यायकल , सखुन्हु, सादान
चौठी खुन्हु पुखूसिथे थ्यंसेलि नंयागु आःसि तोधुल ।
अनंतुं पंचमि खुन्हु मेगु नं यागु आःसितया सासेलि वनं
तोधुल फेरेयात मेगु आःसि मदया सियागु आःसि तया
साला हल गाःबहा जात्रा याःन्यायकल । अष्टमि खुन्हु
गाःबाहा जात्राया पुजा भाव सकतां सिधयका सरकारिया
पलतनं चाउयका देव साला जन, वैशाख शुदि नवमि
खुन्हु माःपाःकाले थ्यंनेवं खःजला कुतुंवल, खःजला मदुसां
साला यंका हःकु थ्यन, उखुन्हु सालेहे मजील । थुखुन्हुया
चान्हे अकस्मातं रथ मिनल । थुगु खँ सकल लोकजनं
सिया स्वोवल ख्दयाव च्वन । थुगु वखतस थापाथलि
च्वंम्ह जंगवाहादुर फगत थःछम्ह सलगया सवारि जुया
समस्त खँ बुळयेयाना श्री करुणामय रथंनं व्वकायेका
चाछेंया फलचास विज्याकल । घचाः प्यचाकलं भति

भति मिनया च्वन । हानं श्री जटाधारी लोकेश्वर यागु
 रथनं मिनल, चकवाहा देवयातनं रथनं कोकया हखासंतु
 तल । सखुंहु दक्वं सुचूका रथ दयकेत सिंकायेके छ्वत ।
 पौकायेके छ्वत माक्व सरकारं खर्च विल । रथ दयका
 हल धलवतया आःसि छपु दयका हल । घःचाः प्यचालनं
 नया तान चिना हल । केंयागु मिखा दयका विल ।
 निम्ह सिगुं रथ दयका सिधयका प्रतिस्था याना जेष्ट
 शुक्लया दशमि दशहडा खुन्हु रथे विज्याका शांति
 स्वस्ति याना सखुंहु जुगले साला यंकल याःन्यायके
 मफु । सखुंहु याःन्यायकल । सखुंहु पुजाभाव सिधयका
 लगंजात्राया देव साल, चकवाहा देवया न्हपनं दाया मनू
 छम्ह तचोतं विरामि जुल । अन नं साला यंकुगु वेलस
 थईना थ्यस्थेलि वुंग देवया घचालं वयला मनू छम्ह
 तचोतं विरामि जुल । थुखुन्हु अनंतुं जुल, सखुंहु लगंख्यले
 थ्यंकल । सखुंहु वलिवीया सखुंहु लगंजात्रा न्यायकल
 थ्वयां सखुंहु मालको पुजा भाव सिधयका ननिचा जात्रा
 न्यायकल । सखुंहुतुं साईत स्वत । प्यन्हु खुन्हु ज्यावला
 पिसाल । प्यन्हु खुन्हु ज्यावले पुजा याना देव वुंगं
 विज्याकल प्यन्हुखुन्हु विचा पुजा जुल दीला द्यो कावंगु
 नं जुल शुभम् ।

श्री सुरेन्द्र महाराज जंगवाहादुरया पर्यायस
 संवत् ९९७ वैशाख शुदि पारू खुन्हु रथे विज्याका
 वर्षवन्द जात्रा स्वंगुलि सिधयका थति तोले ननिचा
 जात्रा न्यायका तल ॥

वैसाख कृष्ण औंसि आदित्यवार खुन्हु लगंख्यले
 थक्षे श्री महालक्ष्मीया न्होचोने पुर्वपत्ति ऊचाल छगू दु
 थन कःनि पिनातवगु थासे वुई धुं छह्य वया च्वन अन
 च्वंपि लिंवु तस्यं खना नाराहिति वना रणोवदिपसि
 महाराजायात जाहेर याना रणोवदिपसि सवारी जुया
 छचाखेलं पलतनं घिरे याका रणवदिपसि राजां तुपनं
 कयेका किशिया म्हेतया नारांहिति यंकल जें, यलया पिसं
 स्वोवल ।

संवत् ९९८ वैसाख महीनाया रथ जात्रां सुविस्ता जू ।

श्रोयोस्तु ९९९ साले वैसाख शुक्ल पारू खुन्हु
 रथे विज्याका मंदफलेचास याःन्यायका तृतिया खुन्हु
 साः दानयाकजुल । चौठी खुन्हु गाःवाहा जात्रा न्ययका
 पंचमि खुन्हु पुजाभाव सिधयका सालायंका माःपाःका
 थ्यस्यंलि रथ चाःतुला वन, केरामास भोसुना च्वन
 थथे जुस्यंलि श्री करुणामय रथं क्वकया माःपाःकाले
 फलेचास तल रथ दक्वं पिया हानं मेकथं दयका रथे

विज्याका पतिस्था याना सालायंका नुगः जात्रा, अननं
लगंख्यले विज्याकल सालको कर्म सिधयका लगंजात्रा
ननिचा जात्रा सहितं सिधल । ज्यावलाजात्रा समेतं
सिधयका वुंग विज्याकूगु जुल । प्यन्हु खुन्हु विचाःपुजा
१००० सालं श्री करुणामयया जात्रा सुमंगलनं सिधवगु
जुल शुभम् ।

श्रायोस्तु १००१ वैसाख शुक्ल पारू खुनु श्री
करुणामय रथे विज्याका साला हया मंदः फलेचास
याःन्यायका अक्षय तृतिया खुन्हु सादानयात चौठी खुन्हु
साल, घःचा छचातुला वनेवं रथ चाःतुला खवे पाखे
भोसुना वन गोतुंलिथ्यं चवन जंगलः सायकल घौछि
निघौ अडे जुल लोकपिनि मिखाँ खवि हाकका चवन ।
जंगलः जम्मा प्यपु ४ तथा साला हल पुखु ऊंगल हायका
हया क्वाथ गणेशया थास थ्यन सालेहे सजिल अनंतुं
थात । चकवा देव सालाहया गाःवाहाले थ्यन याःमन्या
कुस्येंतल । सखुन्हु रथस गुनाःकया रथ तप्यंका साला
हया गाःवाहाले प्यकालें भौ फलेचास वल्लतल्लं थ्यन ।
पाँजु निहसैं श्री करुणामय घयपुना हल । सालेहे
सजिल । छार कसिमो फुकं स्वाःहाया वल रथ
पोलच्चे भोसुना चवन अनंतुं । सखुन्हु नाराँहिति सकरि

जाहेर याना श्री रणोवदिपसि महाराजां हाकीम यानामे
 पुर्जी छवया हल। मंगल भक्त कचहरिया लिक्क विचा-
 रित सकलें वया गाःवाहा दबुलिसं चवना जंवात वारा-
 हीत सुवात्त तया सत सल्हा जुल।जंवा तस्यें वित्ति यात
 हे? साहेब जिमि निम्हस्यें श्री करुणामय न्हवं याये धुनेवं
 रथ दयकेत पौ पवया तयेमाःगु रीत खः प्यन्हु च्यान्हुनं
 पौ हया मव्यु, प्यन्हुहे पौ पवयेमदेयेकं रथ दयके-
 मास्येंलि गनं रथ बाँलाई । उकयं थव रथ याकनं
 स्यंगु । धका जंवाः तस्यं वित्तियात । सुनानं छुंधाय
 मफत । थनंलि गाःवाहा जात्रायापिसें वना धाल आम
 खं फिनिद ल्हाःसानं सिधैमखु द्यो सायकेला मसायकेला
 साय्के मखु धयागु जूसा जिमिसं मस्यू न्हां धका सकसिनं
 धास्येंलि देव सायकल बल बल्लं गाःवाहा जात्रा
 न्यायकल । सखुन्हु पुजा भाव सकतां धुनका सालाहल
 हवाहा पुला वस्येंलि रथ चाःतुला वन । अथेनं साला
 यंका भिलाकु मथ्यवं साले हे मजिल । सखुन्हु सालेवं
 नकिंऊयाले पोलच्चे भोसुना चवन, थथिंगु रथ स्वया
 लसकर सकसियां नुगः मछिका मिखास खववी तया
 लिहां वन । थुगु अवस्था स्वया सुवाःया ख्वाः खिउँका
 चवन। सखुन्हु सर्कारं सुबायात नाराहितियंका म्हति२५
 नीन्यातका दां जरीमना याना हल । श्रीकरुणामय रथनं

क्वकया दौवाहा द्वाहां वनेथाय् पूर्व स्वका फलेचास
 विज्याकल । वैसाख शुक्ल नौवमि खुन्हु जुल । दशमि
 खुन्हु श्री ३ सुरेन्द्र महाराजा विरामि जुया आर्याघाटस
 विज्याकल ।

एकादशी खुन्हु हामुकि स्वाना रथ दयका हल,
 नाराहिंति ३०० तका खर्च वियाहल रणोवदिपसि राजा
 वैसाख कृष्ण चौठि मंगलवार खुन्हु घटि १४ घौ वाकी
 स्वर्गारोहन जुगुजुल, सुरेन्द्र महाराजं श्री पृथ्वी दीर
 विक्रम साहदेव सिंहासने विज्याकातिनि सहरे हुकुम चले
 यात । थव प्रजा लोक सकल यातं आशिर्वाद वियाव
 विज्यात । प्यन्हु तक देव देवी पित पुजा बन्ध याना
 न्यान्हु खुनु फुकेयाना विल । श्री करुणामयया रथ
 सिधयेका ज्येष्ठ शुक्लया द्वितिया अदित्यवार खुन्हु रथे
 विज्वाका चान्हे वलि विया न्हिने जज्ञ याना वज्रा-
 चार्य ब्राह्मण जनपि आचात थवपनि स्यनं जप पाठ
 याका शांति स्वस्ति याना रथ साला यस्येलि न्हापा
 थ्येतुं रथ भेग गुला वन । अथे जुसां साल वल्लतल्लं
 माहापाकाले थ्यन । मलांसि घःचाले दिना सालेहे
 मजिल । सखुन्हु नं ज्यु ज्यु थें याना साला यंकल हःकु-
 या सतके थ्यन वयां सखुन्हु नुःग जात्रा न्यायकल सखुंभुया
 पुजाभाव सिधयका साला हस्यंलि थेंपा हितिस थ्यनेवं

घःचायास्वासा पंहुया साले मजिल सखुन्हु मेगु घःचाः
 तया साला यन तंगहिति थ्यन सखुन्हु साल यंका लगं
 माजु सिमाया थासेथ्यन सखुन्हु वलिविया वं सखुन्हुलगं
 जात्रा न्यायकल सखुन्हुया पुजा भाव सिधयका ननिचा
 याःयायकल । ज्येष्ठ कृष्ण सप्तमि शनिश्चरवार खुन्हु
 श्री करुणामय ज्यावलापि साल । रथ प्रतिष्ठा याना
 शांति स्वस्ति पाठ पुजाया दक्षिणा थुखुन्हु तिनी विया
 हल । ज्यावलापि साला यंका तफाल्हं पुलेवं लिक्थंचाः
 तुला वना मयो मयो कचां किसिम्हे च्वना न्ह्यायदुगु
 जुल । श्री करुणामय बातेलाक तोधुलिथ्यं थःसःपाया
 च्वना विज्यात । थथिगु विपरित स्वया सकल लोकया
 अद्भुत आश्चार्यचाया नुगमछिका, मिखास खोविहाय-
 का लिहां वन । थुखुन्हु निस्यं चछि छिछि तसकं जल
 वृष्टि जुया सालेहे मजिल । सखुन्हु श्री करुणामय रथं
 कोकया ज्यावलाख्यले फलेचास विज्याकगु जुल ।
 रथ पिया हानं दयका आषाढ शुक्लया पारु खुन्हु
 दीला देव ह्खुन्हु रथ प्रतिस्थायाना शान्ति स्वस्तियाना
 रथ सायका ज्यावले जात्रा न्यायकल । प्यन्हु खुन्हु
 ज्यावलापुजा भाव भक्तियाना श्री करुणामय बंग देशे
 विज्यात प्यन्हु विजा पुजा जुल ।

१००२ साले बैसाख शुक्लपारु खुन्हु श्री करुणामय रथे
 विज्याका साला हया मण्डले फलेचासया न्यायकल ॥
 अक्षयतृतिया खुन्हु साःदान ॥ चौठी खुन्हु गाःवाहा
 जात्रा पंचमि खुन्हु नुग जात्रा न्यायकल षष्टमि खुन्हु
 लगंखेले थेन सप्तमि खुन्हु वलि विया अष्टमिलग जात्रा
 नवमि खुन्हु ननिचा जात्रा न्यायका ज्येष्ठ सुल्कया पंचमि
 खुन्हु ज्यावलेपि साला जात्रा न्यायका प्यन्हु खुन्हु या
 भाव भक्ति याता वुंगदेशवि ज्याक जुल पेन्हुखु न्हुवि
 चापुजा ॥ १००३ साले श्री करुणामययागु देवले न्हापा
 यागु वजले पवजंमां लिकया मेक थं वांलाक वज्ज लेपतया
 विल प्राण प्रतिष्ठा समेतं याता व्युगु श्री जंगवाहादुरया
 काय कांछा जर नेरं थुलि धर्म याक जुल ॥ १००३
 चैत्र कृष्ण पारु खुन्हु श्री करुणामय यात वुंगदेशे लाय
 कुया सुवापिं सकलें वना वर्षादियाय मालगु न्ह वया
 गुजुल ॥ बैसाख सुल्क पारु खुन्हु सकल वुंगदेशे वया
 श्री करुणामय दैवल पिकया रथे विज्याका देव साल
 हा मुकिल व्काही मव सखुन्हु वलनं पुखु सिस थ्यन
 वं सखुन्हु मंदफलेसं थेन वयां सखुन्हु तंचाफुसे थात-
 सखुन्हु तिखेले थेन ग्वाखांचो थेन कोयना वनेलें न्यखु
 फुसे थेन वृष संक्राति न्येखु छिकल मेला भरेयाक थत
 हया यपा व्वहां वनेगुलें जधुंफले चासं थात ॥ पानि

धकिया धःपं म्हुया घचा तुनाच्चन । वं सखुन्हु सास्यैलि
 घचा वाचा जक थाहां वया सालेहे मफया अनंतुं ॥
 सखुन्हु साला हया यपादे वया थासं थ्यन ॥ वयां
 सखुन्हु इग त्यागले यान्यायका तल ॥ वं सखुन्हु ईयुला
 खेले याः न्यायका तल ॥ वयां सखुन्हु नसति साला
 हया पुचो मण्डफलेचास न्यायका थनया परिवंइना दान
 दातव्य याना धमाख्वाः खजला लस्वांतया चकवाहा
 देवयात नं माक्व छायापाः गाःवाहा जात्रा न्याय कल
 सखुन्हु युजा भाव सकतां धुनका साल मापाकाले थात ।
 सखुन्हु थापाथलि चोंम्ह माहिला जरनेरं लुंसियागु
 ध्वांः निपु श्री करुणामययात छाया विल अनंतुं वया
 सखुन्हु हःकू छिका तल वया सखुन्हु नुग जात्रा
 न्यायकल सखुन्हु पुजाभाव सिधयका साला हया ज्या-
 वहावही न्ह्योने पिगंदेव श्री वाल कुमारीया थास
 थात व सखुन्हु चकवाहास घःचा पंम्हुया साले मज्यू
 सखुन्हु मेगु घःचा तया सालायंका माजु सिमा छचात्या
 चाउयका तल ॥ सखुन्हु वलि बिल ॥ त्रयोदसि खुन्हु
 माजु सिमा चाहयकुगु वेलस घःचा पंम्हुया साले मजिल
 अथ्यं चतुर्दशि चन्हे खुन्हु मेगु घःचा तया साला लगं
 जात्रा न्यायकल अमायी खुन्हुभुज्याया परिवन्द सिधय
 का ननिचा याः न्यायकलज्येष्ठशुक्ल द्वादशि खुन्हु ज्यावले

पुजा याना श्री करुणामय बृंग देशे विज्याकेत साल
 घःचाः निचा तुलेबं तुनावन अनंतुं चकवाहादेव लिहां
 विज्याकल ॥ त्रयोदशि खुन्हु तंचा फुसंतु थात ॥
 चतुर्दशि खुन्हु यपा दे वया थास ज्येष्ठया पुन्हि खुन्हु
 धले तुना वन सालेहे मफत ॥ बल तल साला यंका
 न्यखु छिकल लसकरया मेला भरे याय मखं लिवाना
 ल्याहांवन थुखुन्हु न्येखवीतुं तयातल चछीं ॥ सखुन्हु
 सुथंनसे न्हिछि मेला भरे यार्वपि थेकाना मडु हिसाप हे
 मडु ॥ ये, यल खवप नरे बुरे थ्यमि वरेगा सुनगु वादे
 बृंग खोना भाज्यां फंपि वलंवु सतुंग केपु किशिप्येलि
 नगां छुगां पांगा स्यावजि गां थक्वा गांगांयार्वि सकल
 पारु खुन्हु मोल्हुया वया वं चोन वनावं चोन ॥ थुखुन्हु
 साला न्यखु फुसे थ्यंकल । द्वितिया खुन्हु अथ्यं ॥ तृतिया
 खुन्हु भतिचा जक साले फत ॥ चौठि खुन्हु अनंतुं
 पंचमि खुन्हु सालेहे मजिया लिसाल अथेनं साले मफया
 पाणि धकीज्या याना चोपि कालिगद म्हं १०० सछि
 म्ह ग्वाहाली वया तिनि सालेफत न्यखुफुसे धलेयागु
 लखं चुलुया थिक काय मफया साले मफुत अनंतु
 थात ॥ षष्टमि खुन्हु भुखायवोल प्यन्हु तक अथ्यं
 नौमिखुन्हु साले वं ल्हेंदना वल अनंतुं सखुन्हु मुग त्याल
 पि वया देव सायकल ज्यापु छम्हसित घः चालं केल

अथ्य जुस्येलि माक्व विचार याना साल यस्येलि थुचा
वाहा थेन अन पापुलेत सल्हायात ॥ मुगत्यारं आमज्या
आ पाः पुलेम्बानि धका गन अननं भति साले व थात
लसकल सकलें ल्याहां वन ॥ थुगु बखते सलगया वन्ह
सलं कुतका सल विस्युं वंबले ज्यापुमि छम्हे सित सलं
प्येका खवाले ला चोतुका बिल न्हुयावन खवाया ला
लावा २ वयका वन मिसात निह्मसियातं प्येका वन ॥
एकादसि खुन्हु सास्येलि घचा संकेहे मफया अनंतुं ।
द्वादशि खुन्हु कोयन्हा वनेलें वरमा वंगल सिमा पिना
तव थास फलेचा नापं थात ॥ त्रयोदशि खुन्हु थैमाख्यो
थेन ॥ चतुर्दशि खुन्हु चन्हे खुन्हु सिमास तकेना रथ
गोतुलीथ्ये चोक हे साला यंका ज्यावली खेले थ्येकल
हीयके मफुत अथें । निन्हु स्वन्हुनं हियके मफया वलतलं
आषार शुक्लया चौठि खुन्हु बंगे ज्यावले जात्रा यातः
सप्तमि खुन्हु ज्यावले पुजायाना देव गठसं विज्यात
किनिदया मेला जुया तमान लसकरया थव २ दुथ्य
फुथ्ये जोरे याना श्री करुणामय दर्शन यानां लिहांवन
जुल शुभं ॥

१००४ चैत्र वदि पारू खुन्हु न्हवं

वैसाख शुक्ल पारू शनिवार खुन्हु देव रथे विज्याका

सालाहया मण्डफलेचास यान्यायकल अक्षय तृतिया
 खुन्हु सा दान याना चौठि खुन्हु साला हया यान्यायके
 मफया पंचमी खुन्हु जात्रा न्यायकल ॥ षष्टमि खुन्हु
 पुजाभाव सिधयका साला यंका नकिंऊयाले थेंकल ॥
 सप्तमी खुन्हु माःपाः थेन अष्टमि खुन्हु हःकु छिका वह
 पाता छाया माक्व रितयाना यंकुगु वखतस नुगले वछि
 हियकेय वं घःचा पंम्हुया वन सखुन्हु म्येगु घःचा छोला
 याः न्यायकल ॥ १० दशमि खुन्हु भतिचा जक साले
 फत एकादशि खुन्हु थपा हिति फुसे थेन ॥ द्वादशि
 खुन्हु चकवाःही थेन त्रयोदशि खुन्हु माजु सिमा चाहुयी
 कुबले घःचा पंम्हुया साले मजिल ॥ चतुर्दशी खुन्हु
 मेगु घःचा तया सालनं पंम्हुया वना साले मजिल ॥
 पुन्हि खुन्हु हानं मेगु मेगु घःचा तया जात्रा न्यायकल
 पारु खुन्हु वलि विल बृष संक्रांति खुन्हु साला हया
 द्वलंमाजुया न्ह्योने थेन वं घःचा पंम्हुया साले मजिया
 मेगु घःचातया साल वहे घःचाया खासा पंम्हुया तज्यात
 तृतिया खुन्हुया न्यायकल चौठि खुन्हु लगंजात्राया पुजा
 भाव सकटां सिधयका ननिचा यान्यायकल ॥ श्री
 करुणामयया ख्वाले जवधिके मनचा प्येलांगु तःज्याना
 कुतुंवगु जुल ॥ चकवाहा देवयात खःजला लिपा तगु
 दिन जुल ॥ तग्वगु धरवतया गं छग्व तवगु

दिन, जात्रा २ पतिं थांत ज्येष्ठ शुक्ल द्वादशी बृहस्पति-
 वार ज्यावले पिसाला याः न्यायकल ॥ ज्येष्ठ पुन्हि
 खुन्हु ज्यावलेपुजा याना श्री करुणामय बृंगदेस विज्याक
 जुल श्री जटाधारी लोकेश्वर थवथानसं विज्यात
 १००५ आश्विन वदि एकादशी खुन्हु राते कांछ्रा जरनेर
 स्वर्गे जुगु ॥ जंगवादुरया काय माहिला जरन्यर
 खानकि विया तिति सहरया कम्पाडर ईन चिफ दर्जा
 व्युगु कार्तिक शुक्लया मुखोष्टमि दिने चैत्र कृष्णया
 पारु खुन्हु न्हवंगागु दिन ।

१००५ वैसाख शुक्ल परेवा रथे विज्याका
 साल हामुकिलं क्वाहां विज्याना उत्र दिशासं मस्वत ॥
 द्वितिया खुन्हु मण्ड फलेचास थ्येन तृतिया खुन्हु सादानः
 चौठि खुन्हु गाःवा जात्रा न्यायका पंचमि खुन्हु पुजा
 भाव याना साला यंका हःकु छिकातल । षष्टमि खुन्हु
 नुगले थेंकाः हीयके मफु सप्तमि खुन्हु हीईकेतेन वेलस
 घःचा पंम्हुया साले मजील अष्टमि खुन्हु मेगु घचा तथा
 साल पंम्हुया वन स्वचा प्यन्हुनं हियका याःन्यायके
 मफुत जोवाना बलतलं नुग जात्रा यान्यायकल ॥
 एकादशी खुन्हु पुजा भाव याना सायकल घचाः पंम्हु-
 सानं साला हया निकु २ स्वकु ३ साला हल अनंतुं द्वादशि

खुन्हु त्रयोदश खुन्हु घःचा पंम्हुईका गथे सालेगु धका
 ल्वापु जुल देव विजा मया धका सुवायात बोविल वाः
 बल रथ गोतुली धका ग्यात ॥ थुखुन्हु परिवन्द जक
 याना ल्याहाँ वन ॥ चतुर्दशी नं अथें पुन्हि खुन्हु न्हुगु
 घःचा तया साल हानं लिउन्ये चोगु घःचा पंम्हुया वन
 सालेहे मजिल ॥ पारु खुन्हु म्येगु घःचा तया साला
 हल चकवाही थेनकल ॥ द्वितिया खुन्हु लगंखेले थेन ।
 तृतिया खुन्हु वली विया चौठि खुन्हु लगंजात्रा यागु
 वखते वछि थेस्येंलि न्हुगु घःचा पंम्हुया हः प्यह ४
 खासा छगु स्वहा यावल सकलें अचंम जुल न्हुगु घःचा
 हे थथे जुस्येंलि पुलागु गुवले वलाइ धका धाल गुलि-
 स्येनं धालकि पुलागु हे बला धका नं धाल अथेंतुं घचा
 लिकया साहा सि मिलेयाना लगंजात्रा न्यायकल ॥
 वेलस हाकनं जवे पाखे लिउने घचाया खासा पंम्हुया
 हः स्वहाया वल ॥ थथे जुस्येंलि सालेहे मजिल सखुन्हु
 पंचमि खुन्हु मनुतसे धाल थुगु पतकेथ्यें जागु विघ्न
 गुवलेहे मजुनि धका ७० वर्ष दुपिं बुधा बुधि तस्ये
 धाल ॥ घचाः ल्होना वलतलं ननिचा जात्रा न्याय-
 कल ॥ वैसाख कृष्ण एकादशि खुन्हु घचायात सिंकायके
 छोट चासि विया अमाई खुन्हु थेंके हया न्हुगु घःचा
 दयके विल ॥ ज्येष्ठ शुक्लया दशमि खुन्हु ज्यावले

पिसाल तफाल्वहं थ्यस्येलि घःचाया खास पंम्हुया नवा
लिवल खासा साहा मिले याना नकिं ताना मिलेयाना
साला यन घचाःया खासा हे मदेकं सालायंका ज्यावला
खेले यान्यायकल ॥ स्वन्हु खुन्हु सुथे च्याघौ जावेलस
भुखायवोल सर्खुन्हु ज्यावलेजात्रा याना श्री करुणामय
बुंग देव विज्याकल श्री जटाधारी लोकेश्वर थव थानस
विज्याक जुल ॥

१००६ चैत्रशुदि तंगल वाहालस विज्याकम्ह श्री
जटाधरी लोकेश्वरया देवल दक्षिण दिसा पोल अकम्मात
नं दुनावल ॥

१००६ चैत्र कृष्ण पारू खुन्हु न्हवं ॥

चैत्र वदि द्वितीया रोज ३ स श्री ३ पृथिव वीर
विक्रम साहदेव राजा धिराजया विवाह यायत सकल
प्रजालोक पिनी दुथ्य फुथे वाजं थाना प्याखुं हुयका
जंति वनगु जुल शुभं ।

१००६ चैत्र कृष्ण त्रयो दशि खुन्हु श्री करू-
मय यागु रथ दयका चोंवले ग्वफे वया रथहे त्वधुलीथें
चवन जेंगवा छम्ह कुटुं वयेत यातां प्यातां खाया बल-
तलं थामेयाना क्वाहाँ वल वेसाख शुक्ल प्रतिपदा खुन्हु
रथे विज्याका सास्येलि फजक हियका घःचा स्यन अथें

द्वितीया खुन्हु मण्डफलेचा थेन । अक्षय तृतीया खुन्हु
सादान चौठी खुन्हु साला हया सिवाहा थेनेवं घचासेना
साले मजिल ॥ पंचमि खुन्हु गाःबाहा जात्रा न्यायका
षष्टमि खुन्हु पुजा भाव सकतां धुनका साला थंका
मापा काले थात ॥ थन धिराज सवारी जुल ॥ जेसी
देवया थाथेसेलि घःचा लःथात सप्तमि खुन्हु नुगलेसनं
थेन घःचा छोम्हुत अष्टमि खुन्हु मेगु घःचा तथा सासॅली
हानं निचा घचानं सेन ॥ नवमि वुन्हु स्योगु घःचा
निचाकं ल्होना याः न्यायकल ॥ दशमि खुन्हु पुजाभाव
सकतां धुनका सागु वेलस भतिचा सालेवं वावया साले
मजिल अनंतुं ।

एकादशि खुन्हु चकवाहाही थेसॅलि घचा तुना
साले मजिल ॥ द्वादशि खुन्हु जधुंयाथास थेनेवं रथ
चातुला वना मयो २ कचां पोलचे थील छत्र हे कुतुं
वयीथें चोना पतानं चिना साल सालेहे मफु ॥ त्रयोदशि
पुन्हि तकं रथ ल्होना वैसाख कृष्ण पारू खुन्हु भूमि
कम्प जुल सुथे घौ १२ घटिजा ववेलस सकसिनं चागु
मखया द्यो सावल सर्कार खवर छोया हल द्यो साले
मजील धका होकम जुल थुखुन्हु कोंटि सर्वेश्वर महा-
देवया शिरे हीः फुटि छफुटि दया चोन जलधारा हाय-
केगुलि न्याः छह्य चोना चोन ॥ चैत्र महिना दोलखाः

पुखुलि लः फुकं हि जुया चोन खः मखु सियकेत रुमार
 छकु थुना स्वत रुमार फुकं ह्याउँस्य रगं छीथ्य जुल ।
 धका दोलखाँ चिठी छोया हल ॥ चकवाहा देवया
 देवले गृद्ध जूना चोन ॥ शाँति यात । सुनगु देशे
 महादेवया देवले नं गृद्ध जुना चोन हनं कोयन्हा गणेश
 या देवले नं गृद्ध जुना चोन । सकोस श्री वज्रयोगिणी
 या ल्हाते चोंगु खङ्ग कुतुं वया च्वन थ्व वेलस श्री वीर
 समसेर महाराजा बना श्री वज्रयोगिणी यात खङ्ग
 स्थापन याके बिल अकस्मातं भुमि कंप जुल । यल
 देशे श्री करुणामय रथ जात्रा यायत तयार जुयाव
 चोन ॥ गंके हल प्यन्हु तक तया शाँति स्वस्ति याना
 साला यन । वलतलं रथ साला यंका लगंखेले थेन ग्वतु-
 लिथें चोना माजु सिमाया लिउनेथेनेवं सालेमजिल ॥
 बैसाख कृष्ण पंचमी खुन्हु सालेवं घःचा पंम्हुल ॥
 षष्टमि खुन्हु नं भतिचा सालेवं सेन सप्तमि खुनु रथ
 चातुला लिकथं ग्वतुली थें चोन बायमोले बज्रसत्वध्धां
 छत्रं बै कुछी जक मथ्युनि साले हे मजिल ॥ अष्टमि
 बुद्धबार खुन्हु सर्कारिं जाहेर याना रथं कोकायगु
 वन्दोवस्त यात सकल लोक वया स्ववल तसकं वावल

गुलि लसकर ल्याहाँ वन गुलि २ स्वयावं चोन जें, यल,
 खवप यापिं समेतं वया स्वया चोन श्री करुणामय रथं
 कोकया थासे विज्याकल ॥ ज्येष्ठ शुक्लया पारु खुन्ह
 लगं खेले ही वा गात ज्येष्ठ शुक्ल द्वितिया खुन्ह सर्कारं
 ५०० न्यास दांया पौः कायके छोट २०० निसया घचाः
 दयकेत खचं विया हल ॥ कोंटि श्री महादेवया शिरे
 लछि यंकं हिवया चोंगु मदिः ज्येष्ठ कृष्ण पारु खुन्ह
 रथ सिधयका श्री करुणामय रथे विज्याका शांतिकर्म
 याना वज्राचार्य २५ ब्राह्मण २५ आचार्य १२ भर्जि
 १ थुलि तया यज्ञकर्म याना वलिविया जप पाठ याका
 श्री करुणामय साल जात्रा न्याकल द्वितिया खुन्ह वलि
 विया तृतिया खुन्ह माजु सिमा चाहयका यान्यायकल
 चौठि खुन्ह लगंजात्राया पुजाभाव सिधयका ननिचा
 यान्यायकल ॥ आषार शुक्ल पारु खुन्ह ज्यावल
 पिसाल इति थेन साले मजील द्वितिया खुन्ह ज्यालखेले
 सम्म थेन । तृतिया खुन्ह देवया खःजला फुकं सेन
 सहा सी फुकं सेना जवे पाखे भोसुनो चोन सकसेनं थ्व
 रथ जीमखु मेकठं देयके माली धयावन ॥ चौठि खुन्ह
 ज्युज्युथे साला वलतलं ज्यावलेजात्रा न्यायकल ॥
 प्यन्हु खुन्ह ज्यावला पुजा याना श्री करुणामय बंग देशे
 विज्याकल । प्यन्हु खुन्ह विचा पुजा जुल ।

छन्हुया दिने मुकुंडसेन धैम्ह राजा छह्मसें
थान थानांतरे चाचा हिला जुजुं चैत्र कृष्णया पारू खुहु
लगंखेले थ्यंकवल थुम्ह राजाखना सकलें त्राही जुया
ग्याना छुंयाईला धका न्हवं सिधयका सकलें विस्युवन
गुलिं २ सुला स्वया चोन थुगु अवसरे थुम्ह मुकुंडसेन
राजानं श्री करुणामय एकांत नं दबुलि बिज्यागु खना
थमं गया वयाम्ह सल याके चोंगु वहया सिखलिमा
लोकया श्री करुणामय यात दोहलपा नमस्कार यात ।
श्री करुणामय नं थुगु सिखलि माला कोखाय् कुगु वेलस
शिर कोछुना विल थुगु सिखलिमाला थौंया अद्यापि
ईश्वर याके दनी मेमेगु तिसा फुकं न्हवं याईवले तोकिगु
थुगु माला तोके मज्युगु जुल ।

-:○●○:-

ॐ नमो श्री मदार्यावलोकिते श्वराय ॥

श्रेयोइस्तु संवत् १००७ मिति माघ शुक्लया
सप्तमि सोमवार थ्व खुन्हु श्री करुणामय बृंगदेशनं यल
देशे तःबाहाले विज्याकुगु जुल ॥। थ्वहे साल फाल्गुण
कृष्ण चउथि मीन संक्रांति खुन्हु श्री बीर समसेर मंत्री
यात श्री पृथिवीर महाराजाया प्रतापनं सकल दुनिया
उद्धार जुल ॥ थनंलि चैत्र कृष्ण प्रतिपदा खुन्हु वर्ष
पतियाय मालगु पंचामृत नं महास्नान याकगु वखते
शंघ्याकलस तवबाहानं पितहया लंगंखेलस श्री योगांवर
या संधि महा मंदले मत च्याका न्हवं याकगु जुल
न्हापा २ थथे गुवलें लीवागु मढुगु जुल ॥ थ्व हे दं
वैसाख शुक्लया पारु खुन्हु आदित्यवारे श्री करुणामय
रथस विज्यातकाव देव साल साःसानं लहेहे मदं थुखुन्हु
अथ्यं ॥ सखुन्हु द्वितिया खुन्हु सालनं हामू किलनं

क्वाहाँमव वं सखुन्हु अक्षय तृतिया खुन्हु नसति साला
 हया मण्डफलेचास जात्रा न्यायकाव सादान इत्यादि
 याना सखुन्हु चौथि खुन्हु साला हया पुखु ङंगल
 हायका बलतलं क्वाथ गणेशया थास थ्यसेलि रथ धेः
 चुलावन अथे नं साला हस्येलि छेस भोकसुत थुखुन्हु
 अनंतुं ॥ वयाँ सखुन्हु पंचमी खुन्हु साले जीला मजीला
 धका पोलचे वना जंगल साल ङन २ रथ चातुला
 मयो २ कचा व वायमो पोलचे दिनाव संकेहे मजीया
 रीत परमना याना सकले ल्याहाँ वन ॥ थन गाःबाहा
 जात्रा यात माम लसकल वया खःजलास चोम्ह दिथा
 यात कोकया ग्लेथ २ नका मंगले अदास कुना थकल ॥
 वयाँ सखुन्हु षष्टमि खुन्हु क्वाथ बाहाया न्ह्योने चोंगु
 दबुली चोना देव कोकायगु साईत स्वतः घौ १२ ऊँ-
 निघौ बाकीस श्री करुणामय रथनं कोकया व गाबाहा
 यातुंथि द्वाहाँ वने थाय् जवे फलेचास बिज्याक जुल ॥
 वं सखुन्हु सप्तमि खुन्हु रथ पिया हल ॥

वैसाख शुक्ल दशमि खुन्हु हामोकि स्वाना रथ
 दसकाव हल ॥ वैसाख वदि पंचमि वृहस्पतिबार सुथे
 न्हापन न्यागु घटिस देव रथस बिज्याकगु थुखुन्हु शांति

स्वस्ति याना गावाहाः जात्रा न्याँकल वया सखुँन्हु
 षष्टमि खुन्हु पुजा भाव सिद्धयका द्योसाला यंका
 मापाकाले थेंकल ॥ चक्रवादेव हिजक हियका तल साले
 मफु ॥ थनंलि सप्तमि खुन्हु द्योः सालायंका हतखुछिका
 लायकुया पुजा याना वहयपटाछागु वखते त्वादला वन ॥
 थथे जूसानं सालायंका सौगले गणेशया थास भति
 मथ्यवं थात वयाँ सखुँन्हु अष्टमि खुन्हु नुगजात्रा
 न्यायकल ॥ नवमि खुन्हु पुजाभाव सिद्धयकाव लगं
 जात्राया देव सायकल वल दशमि उवाः हिले जक थेन
 वयाँ सखुँन्हु थईना थेन ॥ रथ चातुला वन अथ्य जूसा
 नं साला यंकल नौद्व तँचाँ व्वे थास्यंलि केवया पखाले
 न्याईथ्य चोना मसाल वं सखुँन्हु द्योसाले मछाला योसि
 छपु हया वाँ मोतुईका तल ॥ वया सखुँन्हु त्रयोदशि
 खुन्हु सुथे न्हापा नं घौँछि जागु वखते द्योः कोकया
 ज्यावा बहि हचोन्हे पूर्व स्वका फलेचा विज्याकल ॥
 चंद्रमा १६ फौँखुम्ह दान विल ॥ सखुँन्हु नसें रथ
 पिया हया घःचा लिमकास्य ज्येष्ठ शुक्ल तृतिथा खुन्हु
 नसें रथ दयकाव हल ॥ ज्येष्ठ कृष्ण पंचमि खुन्हु श्री
 करुणाम रथस विज्याकल षष्टमि खुन्हु वलिविया व

शांतिकर्मयाक जुल सप्तमि खुन्हु साला यंका लगंखे-
 लेजक थ्यन माजु सिमाचा हुयके मफु !! अष्टमि
 खुन्हु माजु सिमा चाहुयका जात्रा न्यायकल नवमि
 खुन्हु वलिवीया दशमिखुन्हु लगं जात्रा न्यायकल !!
 एकादशि खुन्हु भुज्यायाना श्री वीर समसेरया
 किजा देव समसेरयात मुगत्यार खानकि विल !!
 श्ववेलस सकल काजी भार्दारसकसेनं दां-तया दर्शनयात
 अनंलि श्व सदां जम्मा जोना थापा थलिप्याहां
 बिज्यात देव देवी सकसीतं छायाव् श्री करुणामययात
 ५ न्यातका दक्षिणा छाया वचकवा देवयात श्री
 योगवर द्वलं द्योयात कोमारीयातनं दक्षिणा छाया
 लिहां बिज्यात थनलि देवसा यका ननिचा जात्रा
 न्याकल !! थनंलि ज्येष्ठ कृष्ण औंसि खुन्हु कोदु-
 वाले दिल द्योकाःवन अन माको पुजा बिधियाना व
 आषार शुल्क परे वाखुह्लु दीला देवहल घौ न
 वाकिस थेन काःव रथे सुतुं माक्क कर्मयानाव नाम
 संगीतिवोना देखे चायेका नित्याचार संपूर्ण सिधयका
 व थुगु वर्षे लगं जात्रा मन्यावहे सि ह्लाज्या वापि
 नाव हल !! आषाढ शुल्क द्वितीया खुन्हु द्यो पिसा-
 लेत साइत स्वत !! आषाढ कृष्ण द्वितीया खुन्हु द्यो
 पिसाल बृहस्पतिबार खुन्हु श्री करुणामय ज्यावले

पिसाला ह्या तवः पुखुलि कुमारी विज्यागु फलेचाया
 न्होनेतुं थातः वयां सखुन्हु तृतिया खुन्हु ज्यावले जात्रा
 न्यायकल, चौठि खुन्हु जंगवाहादुरया थः कार्यापि
 सकलें नेपाले दुहाँवल, श्री करूणामयया ज्यावलेजात्रा
 या चाने खुन्हु रथे अकस्मातं गृद्ध छह्य जुना चोन ,
 चुकवा देव याथाय् छुनं म्वाक लपते छपातं खवाले तोपुया
 चोन फे वगुनं मखु थुलितकया उपद्रव जुया वन ,
 थुगु समाचार न्यना सकल दुनीया तये मने दुःख ताया
 चोन अथ्य जुसानं बर्ष पतिं यायेमाक्व रात्रीया कृया
 नकिंभु समेतं सिद्धया वन, थनंलि दिद्वा सुबा विचारी
 सकलें थापाथली जाहेर यावन :, वयां सखुन्हु श्री ५
 पृथ्वि वीर विक्रम महाराजाधिराज सवारी जुयाव
 श्रीकरूणामय दर्शन यानाव लिहाँ विज्यात हानं श्री देव
 शमसेर मुखत्यार सवारी जुयाव खः जलास थाहाँ
 बिज्यात खव ल्हातं तरवार जोना जव ल्हातं न्याससाही
 दाँ गृद्ध जूगु शांति यात धकं शंकल्प याना विल अनंलि
 श्री करूणामय रथनं कोकयाव बृंगदेश बिज्याकल
 चुकवाहा देवता निग्ल तोल टंगले लिहाँ बिज्याकल ,
 स्वन्हुतक पूःतया बृंगदेशे महावलिया शांति स्वस्ति
 याक जुलः, प्यन्हु विया पुजा जुल थुगुदँ थथ्य जुल
 शुभंः ।

संवत् १००८ चैत्र शुक्ल दशमि खुन्हु श्री
 करुणामय यात न्हूगू धःमा हाथिबने कया हल, चैत्र
 कृष्णपारु शुक्लवार खुन्हु श्री करुणामय यात पंचामृत
 स्नान याक्सु जुल थुखन्हुया रात्री केपु देशे धुंछम्ह वया
 प्येन्हुतक हाला जुल, हानं नक्वाते देंय दसं पुजाया
 बले न्हयह्य बाहाँ मागु जुया बाहाँ स्यागु बखते ही
 छफुटिहे मव मभिगु जक वया च्वन थथ्य जुल धका
 म्ये छह्य हया स्याय त्यंवले म्ये नं सीबा हे वन, थध्य
 उपद्रव जुया भेल द्यो तंहे चालः ।

बैसाख शुक्ल पारु शनिश्चरबार थ्वखुन्हु श्री
 करुणामय रथस विज्याकल, सालाः हस्यंलि फलेचास
 भति मथ्यन द्वितिया खुन्हु सालाः हया पुचो मंदफले
 चास थ्यंकल अक्षय तृतिया खुन्हु सादान यात, थुखन्हुया
 दिने फटापोलाया श्रेष्ठ श्याम सुंधम्मरनं सहस्राहुति
 यज्ञ याना नव व्याकरण गुरुजुपित पाठ याकल चौठि
 खुन्हु सालाहया नःबाहा भति मथ्यवं रथ चाःतुला
 मलांसि घःचाले दिना सालेहे मजिल । पंचमि खुन्हु
 साला हःबले जंगबाहाबुरं छाया तवगु वहया छत्र
 कुटुंवल, जात्रा न्यायकल षष्ठमि खुन्हु भुज्या जुल ,
 नुगः जात्रायात सालाः यंकस वनबाहा न्होने थात ।
 सप्तमि खुन्हु सालाःयंका हखु छिका वहपता छाया

माको पुजा याना यंकल । हःखा थ्यन । चाकवा देवं
 माःपाकाले थात । अष्टमिखुन्हु नुगः जात्रा न्यायकल ।
 नवमि खुन्हु भुज्या जुल । लगं जात्रा पिसालेत माको
 सिधयका सालाहस्यंलि बुंगदेवयागु छत्र चूकवादेवया
 गुछत्रनिगुलि ल्वातः यथ्य संमजु या रथ थचाः तुल,
 अथे जूसानं द्यो साला हया अनतुं थात । दशमिखुन्हु
 नुगलं उवाहाः स्वकातक । एकादशिखुन्हु घःचा स्यना
 मेमेगु घःचा छोला साला हल छचा जक तुला वनेवँ
 वहे घःचाःपंम्हु यावनं रथ लिकथं चातुला वनं ।
 न्ह्यावने पाखे वामो छत्र छुंहे खने मदु, थुखुन्हु अथ्यं ।
 द्वादशि खुन्हु पंम्हुगु घःचा लिकया मेगु तयासाला यं-
 कुगु महाबौद्ध भतिचा मथ्यं रथ चाःतुलाहेवना मयो२
 कचा मचातस्यं न्ह्यायदु थथेजुस्यंलि सालेमछाला
 लिहांवन ।

थ्व वेलस अज्ञात छहस्यं छत्रे थिया अनियाना
 विसेवन । थनलि जोगि छह्य वया अनियात । थुगु
 वखते सुनां हे छुं धायेमफु । पुह्लीखुन्हु चान्द्रमा १६
 वह्या लुंया सूर्य तुयुजाकि फंछि संख १६ मुति १६द्या
 हाचा १६ कपाय श्रीखन्द१६तोला तुयु हामो विहिवःह
 माको दान याना व श्री करुणामय रथं कोकया, उवाहा

होलया पश्चिम सोगु फलेचास विज्याकल । थुखुन्ह
 रात्री ईन्द्रानन्दं १०८ सछि च्यापु त्वाःदेवा च्याकुगु
 बैशाख कृष्ण षष्ठमिखुन्ह वुरुमां वैद्यं गुरुपिं छे खा
 छह्माऽ सताः ताराधर्म व रक्षाभगवति पाठ याक
 जुल । बैशाख कृष्ण दशमि खुन्ह रथ दयकेत हाः
 मुकी स्वाकगु द्वादशिखुन्ह वीर समसेर सवारी जुया श्री
 करुणामय दर्शन याना मोह७मोह दक्षिणा छाया सिठिनख
 न्ह्यो देवसायकेमा धका होकम जुया लिहा विज्यात ।
 ज्येष्ठ कृष्ण प्रतिषदा आदित्यवार खुन्ह श्री करुणामय
 रथस विज्याका व श्री प्रज्ञापार मिता पाठयात चान्हे
 महावलिविया शांति स्वस्तियात कन्हेखुन्ह द्वितिया शुथे
 छफन्जालनं सिमधनी थुखुन्हया दिनस श्री ५ पृथ्वी वीर
 विक्रम शाहदेव महाराजाधिराज विज्याना श्री करु-
 णामय दर्शन याना दक्षिणा दोहलपा देव सायकल ॥
 घचाः वाचाहे मतू सालेहे मफु । तृतिया खुन्ह उवाहीस
 तग्व त्वोहफात पुजायाना दुगु छह्मा भोगविया साला
 यंकल नौद्व बाहा न्ह्योने थात चौठि खुहु साला यंकल
 चकवाःहीस थात ॥ पंचमि खुन्ह साला तंगबाहा
 न्ह्योने थात षष्ठमी खुन्ह भतिचा जक साल अनंतुं
 टंगलेनतुं ॥ सप्तमि खुन्ह थसिख्यले लगंखेले मतिक्व
 मस्वं द्दलमा जुयाथासथेकं चालकि थ्यंजापि कीःणात

दनावया वदो उपद्रव जुल ससकल छम्हं चोने मछालाः
 द्यो मसाल अष्टमि खुन्हु लगंजात्राया माजु सिमास
 थ्यन नवमि खुन्हु महाबलित्रिया दशमि खुन्हु द्यो साल।
 हस्ते २ धका हःपा वियवं वंगलखिप च्वोबुना स्वात,
 अथ्यनं चोजकबुना ७ न्हेकसंम नखिप चोबुगुलि
 सकस्यांतःप्वा हालेया दिथायात बोलविया खजलाचोंह
 सित खिपतं भारा २ दाथा कयका छोट थुखुन्हु लगं
 जात्रा मन्यात एकादशि खुन्हु याःन्यायकल ॥ वन्हिब
 हौगत्वायापिसें गणेशया थासंनिसें लंया सिथे थातं थाय्
 सिस्वाना श्री करुणामय चुकबाहाद्यो सम्मेतं थ्यंक
 ३६० स्वस व खवीप्वाः खादलुखाया मत छोयकल
 द्वादसि खुन्हु लगंजात्राया भुज्याया सिधयका साल संकेहे
 मफुत त्रयोदशि खुन्हु ननिचायाः न्यायकल । शुक्लवार
 खुन्हु जुल ॥ ज्यावलेपिसालेत साईत स्वत आषाढ
 कृश्या सप्तमि खुन्हु ज्यावले पिसाल । अनतुं ॥
 अष्टमि खुन्हुनं संकेहेमफु ॥ नवमि खुन्हु सालाःयंका
 कुलखोचास थात । दशमि खुन्हु साःगु वखते गथांमुग
 चन्हे खुन्हु ज्यावलापुजा पाःमलाकेयानिति याःमन्याकुस्बं
 तल एकादशि खुन्हु याःन्यायकल गथांमुखचन्हे खुन्हु
 ज्यावलेपुजाभाव सिधयका श्री करुणामय बुंगदेश
 विज्यात ॥ चुकबाहादेव ढंगलसं लिहाँ विज्यात ॥

प्यन्हु खुन्हु विचा पुजा जुल शुभं ॥

श्रोयोस्तु संवत् १००९ मिति पौषशुदि त्रयो-
दशि सोमवार थ्वखुन्हु श्री करुणामय बृंगदेशनं यलदेश
तःवालसं विज्यात ॥ चौत्र कृष्णपतिपदा खुन्हु पंचामृत
नं महास्नान याकगु दिन जुल ॥ वैसाख शुक्ल प्रति
पदा खुन्हु श्री करुणामय रथस विज्याक थुखुन्हुहे
मण्डफलेचासं यान्यायकल द्वितिया खुन्हु सहश्राहुतिया
अधिबासन अक्षय तृतिया खुन्हुस वा लाख पिडपात्र लख
छाया पूर्णायाकगु दान पति मुनीराज बज्राचार्य ॥
तारा धर्म समेतं जुल ॥ पाठयार्कपि १३० गुरुज्जुपि ॥
चौठिखुन्हु बलतल्लं गाबाहाजात्रा न्यायकल घचा
पंम्हुया वन । पंचमि खुन्हु भुजायासिधयका सालाःयंका
नकिंऊयाः संम थ्यंकल । षष्टमि खुन्हु महापाःका
थ्यंसेंलि रथ चाःतुलावला सुकपौलीथीथेंचोन ॥ अथ्य
जुसानंसार धमाखा भाता २ सना चिना तगु खिपःचो
बुना धमाखापा कुतुंबन द्यो मसायकल ॥ सप्तमि
खुन्हु सास्यलि महापा थ्यस्यंलि रथ लिकथं चातुला
वन कुत्याजक बेंमथ्यु थथेजुसेंलि साले मजील धका
सकसेनं धास्यंलि रथं कोकाय त्यन सकस्येनं धाल
न्हापा २ गुंवलेसं साईत मसोस्य रथं कोमका; उक्यं
साईत मस्वस्ये कोकाये मज्यु धका दिथायात धाल

धासानं स्वयागुं खंमन्योस्बं अथ्यं जित्तियाना श्री कस्-
 णामय मङ्गलबार खुन्हु रोग व काल बेलास रबं
 कोकया मंगले उत्तर सोगु फलेचास विज्याकल तचोतं नं
 न्यात वदो तचोत वागात पोंमुधांतवल । रथेचोंगु मूलगु
 छत्र जक लिकया हय वं लेंतोधुलेथ्यं रथ तोधुला वन ॥
 अठमि खुन्हु निस्यं रथ पिया हल वन्हिथं पों वया
 उपद्रव जुल । नवमि खुन्हु मंगल भत्त कचहरी अछाया
 दिथा विचारि यल देशया वतिस ३२ कोठ महाजन
 मुंकास लहाजुल न्हापा२थथ्य जुयावंगु दुला मदुला धका
 न्यसेंलि मुनानं स्यु धापि मदु ॥ हानं यंग्वात बाराहीत
 सकले सता न्यन थुमिसंनं मस्युधका कन ॥ थनेंलि
 यल देशया भलादमिपि मुंका थान दारितसें न्यसेंछि
 यंग्वातस्यं धाल जिमित न्हापायागु वमोजिम दस्तुर
 व्युसा जिमिसं न्हापाथ्येतु बांलाक रथ दयकाःबी शुकी
 हानं नोक्साव जुसा जिमिसं फय धका यंग्वातसें
 धास्यंली जमान बमोजि भोंचोया सही छाप याना
 विल ॥ थुगु कथं कचहरी जुया वन थुगु खवर
 नारांहिती वितिपत्र चोया छोटं वैसाख कृष्ण चौठि
 खुन्हु रथ दक्वं पीधुंका शनिश्चरवार खुन्हु धमाया
 साहा लिमकास्यं जोंजक वाना हामोकी स्वाना न्होने
 यागु जवे खवे चोंगु घःचा जक लिकया रथ दयका हल

थुगु कथं रथ दयकुगुजा सछि नीदं दुपिं बुढा बुढी
 तस्यें मस्युनी धका धाल रथ दयका हहं वछि जाःगु
 बखते कोखँ स्वलाया चोन ॥ अथ्यनं विचाहे मयास्य
 रथ चिना हया सिद्धयका ज्येष्ठ शुक्ल दशमि आदित्य-
 वार खुन्ह १४ कींप्पेंघौ जाःगु वखते श्री करुणा-
 मय रथस बिज्याकल ॥ थुखुन्हतुं रथ प्रतिष्ठा यांना
 गुरुजुपिं ब्राह्मणत जयसि आचाजुत सःता शांति स्वस्ति
 जज्ञादि जप पाठ पुजा याका बन्हीथं महाबलि विप्रा
 एकादशी खुन्ह वल्ल तल्लं हखु तक थ्यंकल ॥ द्वादशी
 खुन्ह सौगले भच्चा जक मथ्येन ॥ घःचा पंम्हुया घःचा
 लिकाये मजिया ज्यामछिना छेंहे पीमाललाः धका धाल
 थ्व वेलस थ्व दिथा यात सकस्येनं धाल देवयागु हेर
 विचा यांना कटपिगु छें पिगु छंगु कर्तव्य खःला छेंजा
 पीहे मज्यु धाल दीथां धासा छें पीयाहे घःचा छोलेगु
 धका बाजी जुल ॥ थुखुन्ह अथेंतु ॥ त्रयोदशी खुन्ह
 भतिचा जक सालेवं घःचा पंम्हुया वन ॥ सालेहे मजिल
 थापाथलि मुखत्यारयाथाय् खवर छोट थुकिया खँ छल-
 फल यांना दिथायात छें पिगु धागु वारे ५० न्येतका
 जर्मना यांना थ्वहे दामं चाछि घःचा चोला चतुर्दशि
 खुन्ह नुगः जात्रा न्यायकल पुन्ही खुन्ह भुजायाथाय् पुजा
 भाव सकतां धुंका द्यो साला हया थपा हितिफुसे

थात ॥ ज्येष्ठ कृष्ण पारु खुन्हु चकवाहाही पुला वना
 जधुंयाथा थ्यन द्वितिया खुन्हु सालायंका मांजु सिमा
 चाहयकुगु वेलस लंख मुना चोंगुलीं तुनावना याःन्यायके
 मफुत ॥ तृतिया खुन्हु याःन्यायका चौठि खुन्हु वलि
 व्युगु बुधवार खुन्हु पंचमि खुन्हु लगजात्रा याःन्यायकल
 षष्टमि खुन्हु ननिचा यान्यायकलः आषाढ कृष्ण पंचमि
 बुधवार खुन्हु श्री करूणामय ज्यावल पिसाला यने मफु
 फःजक हिकेवं वावल अथेनं सास्यंलि घःचा पंम्हुया
 साले मजिल रथ चाःतुला तधंगु सतले भोसुना चोन ।
 जवेचोंगु घःचा निचालं आकाशेलाना छत्रं कुईकेथें
 महाभयंकरः सकलें त्राहि जुया ग्याना चोन । मिखासं
 खोवि हायकाव वित्तियानाव चोन ॥ उतना घरिसं.
 श्री करूणामय रथनं कोकयाव दबु न्हेच्यागु फलेचासं
 विज्याकगु जुल ॥ षष्टमि खुन्हु नाराहिती थापाथलि
 वित्तिपत्र छोट ॥ सप्तमि खुन्हु अथ्यं अष्टमि खुन्हु
 थ्वहे रथ तःप्येंका जीक्यगु सल्हा याना वन ॥ यल
 देशया छेंखां छह्म मनुत यें देशया न्हेसम्ह मानंधरत
 ७०० ग्रामे चोपिन्त उर्दि वियाव नवमि खुन्हु सुथे
 न्हापां सकल लोक वयाव चोन ॥ थुखुन्हु दिनस
 श्री ५ पृथ्वीवीर विक्रम साहदेव वीर सप्सेर सवारी
 जुया व रथ तप्येंका सालाः यंकेगु तहकीत ठरेयात ॥

दशमि खुन्हु खःगोयत थातंथाय् यागु आलुमताबागु पोसी
हया फलेचा नापं द्योया जवे योसिप्यपु ४ स्वाभा ॥
गोया हल स्वाने दयका रथ तप्यंका विल ॥

एकादशि खुन्हु १२ फिनिघौ जागु दयत्तस
श्री करुणामय रथसं विज्यातकाव शांति स्वस्तिमात ।
साला यस्यंलि थति बाहाचा पुलेवं न्हापाभ्यंतुं रथ
चःतुला वनं ॥ सकलें ग्याना त्राहिजुया च्चब जुल ॥
जंगलः न्यापु तया साल अथेनं साले मफया द्वादशि खुन्हु
वलतल्लं तःफाल्हों संम थ्यंकल ॥ त्रयोदशि खुन्हु
ज्यावले जात्रा न्यायकल ॥ श्रावण शुक्ल पारु खुन्हु
ज्यावले जात्राया पुजाभाव सिधयका वुंगदेश बिज्बास
चकुवाहादेव स्वस्थान गमन शुभं ॥

श्रोयोस्तु संवत् १०१० माघ शुक्लया एकादशी
खुन्हु श्री करुणामयया वुंगदेशनं यलदेश विज्याक
जुल । थुगु सालं घःचा दयकेत त्वाल २ यापिं सकलें
मुंका सींकायके द्योत चासिबी न्यायका सकले वन जुल ।

श्रोयोस्तु संवत् १०१० चैत्र शुदि द्वितिया
खुन्हु पुचो श्री वज्रयोगिणी देवी यागु प्रासाद जिर्णो-
द्धार चैत्रवदि प्रतिपदा खुन्हु वर्ष वंधया माक्वहानं

गुगु वैसाख शुक्ल पक्षे प्रतिपदा खुन्हु श्री करुणामय
 रथसं बिज्यात सास्यंलि ल्होमदं हामूकिलं बदांहे
 मवल द्वितिया खुन्हु फःहेमहू तृतिया खुन्हु नसंचासं
 सालनं साले मफया अनंतुं सखुन्हु अक्षय तृतियाखुनु सा
 दान विल ॥ लोक पिनि सकल अदभुत चाया धाल
 गुलसं मजुगु धका हालाचोन ॥ थुखुन्हु सास्यंलि भति
 फःहिका तल चौठि खुन्हु गाःवाहायापि वना सुथे
 जंगल साला घःचा तुनाचोंगु लेंहेथना मण्डफलेचास
 थ्यंकातल । न्हिने सालाः हया नवाहा भति मथ्यं पंचमि
 खुन्हु गाःवाहा जात्रा न्यायका षष्टमि खुन्हु भुजायाया
 पुजाभाव यांना द्यो साल यंके मफत सप्तमि खुन्हु
 वछुत्वा यापि सकलें वया साल मवपिके जाकी बउकया
 साला यंकुगु हखु छिका तल । चकुवाहादेव गाःवाहाले
 नतुं अष्टमि खुन्हु नुग,जात्रा न्यायकल । नवमि खुन्हु
 पुजाभाव सकतां धुंका सास्यंलि फःहिलिथ्यं चवन
 दशमि खुन्हु सालायंका थपाहिति फुसे थात ॥
 चकुवाहादेव यागु घःचालं ज्यापु छहसीगु ल्हाः
 छपानं चुकुले लावन ॥ एकादशि खुन्हु चकुवाहीले
 थात । द्वादशि खुन्हु लगंखेले याःन्याल त्रयोदशि खुन्हु
 लगंजात्रा याःन्यायकल पुन्हि खुन्हु भुजायाःया पुजाभाव

सिद्धयका ननिचा याःन्यायकल । वैसाख कृष्ण चौठि
 खुन्हु श्री वज्रयोगिणीया जीर्णोद्धार पूर्ण प्रतिष्ठा दिन
 जुल ॥ वैसाख कृष्ण चतुर्दसि खुन्हु भुमिकंप जुगु
 अकस्मातनं ॥ अमाई खुन्हुनं भुमीकम्प सध्याकालस ।
 ज्येष्ठ शुक्लया पारु खुन्हु ज्यावल पिसाःगु लसकल
 असंख्य वया ज्यावलखेले थ्यंकं छस्वा जुया चोन ॥
 ज्येष्ठ शुक्ल द्वितिया खुन्हु ज्यावलेयाः न्यायकल स्वन्हु
 खुहु चाःचोना भक्तिजन पिनी पुजाभाव याना चोन ।
 स्वसल खवीप्वा मत ३६० पिडपात्र तया चिछि जार्तना
 याकगु जुल ॥ पंचमी खुन्हु ज्यावले जात्राया पुजाभाव
 सिद्धयका श्री करुणामय बृंगदेश विज्याक श्री जटाधारी
 लोकेश्वर टंगल टोलसं लिहां विज्याकजुल, प्येन्हु खुन्हु
 विचापुजा जुल शुभं... ।

१०११ साल व

१०१२ साले नं थुकीया ह्नापा खतंतुं थुकीया
 विधि तं सुमंगल याक्व ज्या सिधल ।

१०१३ पौष कृष्ण चतुर्दशी खुन्हु श्री करुणा-
 मय बृंगदेशनं यल देश तःवाहाले विज्याक जुल शुभं ।
 वैसाख शुक्ल प्रतिपदा खुन्हु रथे विज्याका सागु बखते
 हामूकिलं त्येहें थने मफु बांमोले चोह्य बज्रसत्वयात
 कवीका तवगु लुंयागु ३ स्वत छत्र त्वधुला कुटुंवल

द्वितिया खुन्हु साला हया मंदःफलेचा कथ्यंल अक्षय
 तृतिया खुन्हु वर्ष वंधयागु दान प्रदान याना चौठि
 खुन्हु सालाः हया नवाहायाथाय् थ्यन पंचमि खुन्हु
 गावाहाजात्रा न्ययकल षष्टमि खुन्हु भुजायाया पुजा
 भाव सिधयकाव सालाहया माहापाकले थात ॥
 सप्तमि खुन्हु नुगले थ्यन फःहीके मफु अष्टमि खुन्हु याः
 न्यायकल । नवमि खुन्हु माको पुजाभाव सिधयका साल
 नुगले हीलसंतुं थात ॥ दशमि खुन्हु उःबाहाहिले
 थ्यन । एकादशि खुन्हु चुकवाहिले थ्यन ॥ द्वादशी
 खुन्हु लगंखेले याःन्याल त्रयोदशि खुन्हु महावलि
 चतुर्दशी खुन्हु लगंजात्रा न्याल पुन्ही खुन्हु भुज्या नैक्यालं
 लुना ननीचा याःन्याल ज्येष्ठ कृष्णया पारु खुन्हु न्याघौ
 ५तक आकाळाकां आकाशे न्यंक कोःबुईचा वया उपद्रव
 जुल । थुगु बर्षे तुयुगु जाकी छमनाया ९ ध्यवा गुंग तक,
 काल । हाकु जाकी छमनाया ९१ ग्वीग माय् छमनाया
 ७न्हेग ध्यवा, मुस्या छमनाया १४ क्कीप्यंग धेवा, दुसि
 फछिया छमो । १५०, भुति मनां । १०, पंमाय् । १०, मी । १०
 कयगु । १२२, मल्टा छमानाया । १०, वाउँ मल्टाया । ८,
 आलु धान्नी । १२०, । १३०, पालु धान्नी । ६०, चि । १२०, चीकं
 छमनाया । ६४, कनी छमनाया । १०, छुचुं मोहया ९,
 माना कनीचुं धामी जूसा । ३९, खें छग्वया । ६, प्याज धाःसा

यक्वहे दु ॥ थनतक व्यसा जुया वन ॥ ज्येष्ठ कृष्णया
 तृतीया खुन्हु ज्यावले पिसाःगु वखते छन्हुतुं ज्यावलेखेले
 याःन्योयकल ॥ चकवाहादेव जक वहनी सिया ३ स्वंधौ
 जावले याःन्यायकल ॥ प्यन्हु खुन्हु ज्यावले पुजा
 सिधयकाव श्रीकरूणामय बृंगदेश विज्यात श्री जटाधारी
 लोकेश्वर थव थानसं लिहां विज्याक जुल ॥ प्यन्हु
 विवापुजा जुल शुभं ॥

थुगु साल भाद्र मैनाय् चि दुल्लभ जुया सकल
 दुनियापिनी चि छुना नय मखना सकरि जाहेर याना
 नारांहितियागु ग्वडामयागु चि हयामिल म्यू म्यू थाय् तक
 दांसाःथ्यं पंज्रांथ्यं हुलमुल जुया, ध्यबा १ निगया जक
 बिल कयां काय् मफु थुलिजुसां ऋी यल देशे मंमदुगली
 छथास जक दु, हनं गोडामसवना चि कया हया वालि-
 फले १ नःवहीली २ लायकुलि हप तले ३ स्वथास
 जक मिइगु जुल । सुथ ह्वापानं कावने मफुसा चि नं
 नयमखन जाकि तुयुगु मोहया निमना २ हाकु जाकी
 मोहया स्वमना ३ तक जुया वन । साह्या दुहां वस्यंलि
 प्यमना ४ जुल ४ । त्यात कजुल । लिपा न्यामनास-
 म्म जुल । चि जक न्यामना चकंछि दरं कयाहया पसलां
 चकंछि नाफा कयाः न्यासबासं सबिल । सम्बत १०११

साल विर शमशेर प्रधान मंत्रिया पय्यायस चि कावने
 थाय पसले पंजा दान थ्यं मो जुया गुलिसीयां लंचा मदु,
 गुलिसियां पतिंचा तोक धुल गुलिसियां लं गःतांगुलिसियां
 गा,लें गुत । गुलिसिया लंकुचा गुत थ्व प्रजा लोक सकलें
 चि नय मखना दुःखसिया च्वन जाकि थिके जुगुया
 धन्दा मखु चि थिके जुगुलि दुःख जुया वन । श्रावण
 महीनां नसें अनतक उपडव जुल । निह्य सिगुजालंछः ।
 निन्हु प्येन्हुं लं नसें तापाक वपितनं बिया मछो ।
 बला पिसें जक काय् फुः, बमला पिनी ज्युवे घाः पाः
 ज्वीकावन । खोया २ विन्तियात नं छ हुल २ जक
 बिया सकलयात थय्के मफु । चि तया तगु छेंस
 कूताःधंकाः बिल, कार्तिक शुल्कया पंचमि खुन्हु पसला-
 यात तिनिखेले यंका सकसेनं कसायायेत्यन थुगु बखते
 वगी छगुलि वः कया थाहां वगुलीं पसला बचे जुया
 विस्युंवन ।

श्रोयोस्तु संवत् १०११ मिति मंशिर शुल्क
 द्वितीया शुक्रवार मूल नक्षेत्र सुलयोग बृहस्पतिवार
 थ्व खुन्हु श्री करुणामय बुंग देशनं यले तःवाहाले
 विज्याकजुल । थ्व खुन्हु श्री५ पृथ्वी वीर विक्रममहारा-
 जाधिराज सवारी प्याहां विज्यागु जुल । मंशिर शुल्क

या त्रायोदशखुन्हु ग्वाखुँच्चे धुँ छह्ता वल थापा थुथि
याह्ता मुख्त्यार वया कयका यन पौष शुल्क चतुर्दशी
खुन्हु घ्यो चाकुशंलुहुखुन्हु हौबहाया व्यखाराज धूसनं
सम्यक न्यायका वाहाः वहि सकभनं निमन्त्रणा यात
बुंगदेसंस निमन्त्रणा मछोगुलिं श्री करूणामय बिमज्याक
तःबहाले वया कच २ यात । श्री करूणामय तःबहाले
दुगुलिं बुंग देशे धामवना धका धाल बुंगमितसें छुं
मधास्यं च्वन थनंलि पांजु व बुंमित त्वाना च्वन ।
थनंलि मंगले लुँऊयाया न्ह्योने स्वीस्वं स्कोटि देवतापिं
बिज्याका बहनि लायकु पुजायात न्हापां श्री
बसुंधारा देवी दोस्त्रा श्री आनदादि लोकेश्वर थन
बुंमितस्यं जिपिनी च्वनेमा धका चोभामिते नापल्वाना
बुंगद्यो मयंकुगु जुल । भाग जक तया सिधयका छोट ।
रात्रीयागु कर्म कांड सिधयका सखुन्हु श्री ५ पृथ्वी
वीर महाराजाधिराज सवारी बिज्याना च्वंगुली तर
वार जक कयाह्यालसकुसु याना सिंहासने तया रीत
परिवन्द सकतां सिधयका छोट । गुरु बज्राचार्य श्रावक
ब्रह्मचर्य चैलक भिक्षु सकलयात पुजा भाव यथाशक्त
दानदातव्य सम्यक भोजन याकुगु जुल । सम्पूर्ण
ज्या सिधयका देवता सकलें ल्याहां बिज्यात । पंच
तालवाजा ल्यू ल्यू थाना छें श्रृंग अले लशो वन भोजना

दि समस्तं धुस्यंलि जजमानं दयपौतया हगु जुल शुभं ।

थुगु वर्षे चैत्र शुल्क द्वितीया बुद्धवारखुन्हु
श्री सुरेन्द्र वीर बिक्रम महाराजाया स्त्री महारानी
स्वर्गारोहण जुल । चैत्र कृष्ण पारुखुन्हु न्ह्य व ।
१०१२ वैशाख शुल्क पारु खुन्हु श्री करुणामय रथस
बिज्याकल थुखुन्हु हामू कीलं ववहां बिज्यात । सति
खुन्हु भतिचाजक साला तल, तृतीया खुन्हु सालाहया
मण्ड फलेचासं थ्यंका सा दान बिल चौथि खुन्हु साला
हया सिवाया थान गणेशयाथासं थ्यन / पंचमि खुन्हु
गाःबाहाया जात्रा न्याकल षष्टमिखुन्हु सालायंका सौगले
थात । सप्तमिखुन्हु नुगः जात्रा न्यायकल । उखुनुया
भुज्याया पुजा भाव भक्ति जुल । अष्टमि खुन्हु
नुगःले सालं सालेमफु, अनेक उपाय यत्न युक्ति यात
कन्हे खुन्हु तिनि सालायंका उवा हिले थ्यन
दशमि खुन्हु टंगले थ्यन । एकादशि खुन्हु वा वया
साले मज्यु द्वादशि खुन्हु टंग हिति न्ह्योने थात ।
त्रयोदशिखुन्हु माजु सिमाया थाययाः न्याल, चतुर्दशि
खुन्हु वौ बिल । पुह्लि खुन्हु लगंजात्राया याः न्याल,
वैशाख पुह्लि भुज्या जुल । श्वखुन्हु वा वया साले मफु ।
द्वितीया खुन्हु ननिचाया न्याल । जेष्ठ कृष्ण पंचमि
खुन्हु ज्यावले पिसालाः याः न्याकल, छन्हुतु अष्टमि

खुन्हु ज्यात्रले जात्राया पुजा भाव सकतां धुनकाव
 श्री करुणामय बुंगदेश बिज्याक जुल । चकवाहादेव
 स्वस्थान गमन प्यन्हुखुन्हु विचा पुजा जुल शुभं

१०१३ मिति कार्तिक कृष्ण पंचमि खुन्हु महा
 सिद्ध पुरुर्बापिसं दयका तवगु न्हापायानु ज्यावल पुखु श्री
 ५ पृथ्वी वीर विक्रम महाराज प्रधान मंत्री वीर सम्शेरं
 बिज्याना लयकायेगु कल ३ स्वंग ४ प्यंग ह्यालः दक्वं
 छ्वना छ्वत बाछी, नोन्हु दुवले तिनि लः सुके जुल ।

मंशिर शुल्क द्वादशि बृहस्पति वार खुन्हु श्री
 करुणामय बुंग देशनं यल देश तःबहाले बिज्याक
 जुल चैत्र शुद्धत्रयोदशि बृहस्पति खुन्हु न्हूगु धंमा क-
 या हल । चैत्र कृष्ण पारु खुन्हु न्हवंयात । बैशाख
 शुल्क पारु खुन्हु रथे बिज्याकल हामु किलं जक कोहां
 बिज्यात । द्वितीया खुन्हु नं न्यायके मफु । अक्षयो
 तृतीया खुन्हु नंसँति साला हया मंदःफलेस या न्यायका
 सा दान यात ।

चउथि खुन्हु गाःबाहायायाः न्यायकल, पंचमि खुन्हु
 भुज्या सिवयका अनंनुं । षष्ठमि खुन्हु मंगले
 यात । सप्तमि खुन्हु नं याः न्यायेके मफु अष्टमि खुन्हु
 नुगःजाबा याः न्यायकल, नवमि खुन्हु भुज्या याना साल

चकवा बाहा हिले थात । दशमि खुन्हु लगंख्यले' याः
न्यायका एकादशि खुहु वलिबिल ।

द्वादशि खुन्हु लगं जात्रायाः न्यायका त्रयोदशि
खुन्हु भुज्या सिध याना ननिचा जात्रायाः न्यायकल ।
जेष्ठ वदि अष्टमि खन्हु ज्यावला पिसाला याः न्याल
प्यन्हु खन्हु ज्यावले पुजा धुंका बुंगे बिज्यात ।

१०१४ माघ शुदि अष्टमि खुन्हु श्री करू-
प्पामय बुंग देशनं यल देश बिज्याक । फागुण कृष्ण
द्वितीया खुन्हु श्री वीर शम्शेरं गुणागू वनेगुलं दयकल
लायकु छेनं दयकल थव दाजु किजा पितनं छे' दय-
कावील ।

लं दयकेत तमाम दुनिया सनागुथि हना लं
दयाक चलेयात । थुगु थासया नाम हेलापुर धका
नाम प्रख्यात यात ॥ चैत्रवदि पारु खुन्हु श्री करूणामय
यात महास्नान यात ॥ वैशाख शुक्लया पारु खुन्हु रथे
बिज्याका साल पुखुचिथाय् थ्यन द्वितीया खुन्हु मण्डफले
याः न्यायकल ॥ अक्षय तृतीया खुन्हु सादान ॥ थुखुन्हु
श्री जटाधारी लोख्यभरयात लाख पिंद पात्र छाया सह
श्राहुति होम याकगु जुल, दान पति श्री मुनिराज
वज्राचार्य- थुखुहु रजक छहस्यें वहपताः छःपु छगु

जुल चउथि खुन्हु गाःवाहा जात्रा मन्यात, पंचमि खुन्हु
 याःन्याल ॥ षष्ठमि भुज्या सिधेका मापाकाः थ्यन ॥
 सप्तमि खुन्हु सौगः हिति न्ह्योने अष्टमि खुन्हुयाःन्याल
 नवमि खुन्हु नुगः जात्राया भुज्या धुंका थपाहिति थ्यंके
 हल ॥ दशमि चकवाही थ्यन ॥ एकादशी लगंखेले
 थ्यंका द्वादशि वली विल त्रयोदशि लगंजात्रा यान्याय
 कल ॥ चतुर्दशि खुन्हु भुज्या सिधयका ननीचा जात्रा
 याःन्यायेकल ॥ ज्येष्ठे ज्यावल पिसाल ज्यावले पुजा
 सिधयेका बुंगदेश विज्यात, प्यन्हु खुन्हु विचाःपुजा
 जुल शुभं ।

१०१५

१०१६ चैत्र कृष्ण पारु खुन्हु पंचामृत स्नान
 ह्लवं ॥ वैसाख शुक्ल पारु खुन्हु रथे विज्याका साल,
 घःचा छचाया बोति न्ह्यां विज्याका द्वितिया खुन्हु
 मंदफलेचा याःन्यायकल अक्षय तृतिया खुन्हु सादान
 चौठि खुन्हु गावाहा जात्रास चुकवाहादेवया घःचा स्यना
 साले मजिमा पंचमि खुन्हुयाः न्यायकल । षष्ठमि खुन्हु
 भुज्या सिद्धयका सालायंका नकिळयाः थ्येन । सप्तमि
 खुन्हु हखुळिका कोट दबुलि थ्यन अष्टमि खुन्हु चालाछें
 न्ह्योने थात ॥ नवमि खुन्हु नुगःजात्रा न्याल । दशमि

खुन्हु भुज्या सिधयका साला हया महा बुद्ध मति
 मथ्यन ॥ एकादशि तूत, द्वादशि खुन्हु ज्याथां भतिचा
 मथ्यन ॥ त्रयोदशि खुन्हु रथ चाःतुला वना पोलचे
 भोसुना साले मजिल पूर्णिमा खुन्हु श्री करुणामय रथं
 कोकया ज्याथ गल्ली कुह्या तेथाय् न्होने पूर्व सोका
 विज्याका तल ॥ वैसाखवदि १० रथ पिय धुंका
 हामोकी स्वात, अनाला भरिं रथ सिधयका तल, च्वे
 चोंगु तंय् गृद्ध छह्य जुना चोन थ्वया द्योने को छह्य
 चोना गृद्ध यात क्वातु क्वाना चोन थथे जुगु सकस्यनं
 स्वजक स्वया शांति स्वस्ति छुं हे मयास्य शुद्ध ज्येष्ठ
 शुक्ल पक्ष पारु खुन्हु श्री करुणामय रथस विज्याकल ।
 सुथसिया न्हेगु ७ घटि न्हो ॥ शांति स्वस्ति पाठ यज्ञ
 होमयात द्वितिया खुन्हु मिथुन संक्राति खुनु साल,
 थपाःहिति फुसे थात ॥ तृतिया खुनु तंगले हथिः
 न्होने थात ॥ चउथि खुन्हु माजु सिमा चाहयका तल
 पंचमि खुन्हु दौविया षष्टमि खुनु लगंजात्रायाः न्याये
 कल सिठिनख खुन्हु ॥ सप्तमि तुतजुया अष्टमि खुनु
 भुज्याया नैक्यालं लुना ननिचा जात्रा न्यायकल ॥
 ज्येष्ठवदि षष्टमि खुन्हु ज्यावल पिसाल तव पुखु
 थ्यन सप्तमि खुन्हु कुलुख्येलस थ्यन । अष्टमि खुनु
 साःवले रथ चाःतुलावन खबधिके लिउने मलासि तोधुल

थांया साहाःदको तोधुल साले मजिल । नवमि खुन्ह
 प्रमाण जक याना दशमि आदित्यवार खुनु श्री करू-
 णामय रथं कोकया फलीचास विज्याकल ॥ वयां
 सखुन्हु रथे विज्याका साल एकादशि खुन्हु अथ्यं ॥
 द्वादशि खुन्हु साला यंका ज्यावलखेले थ्येकालि
 खवधिक गोतुल । वायमो छत्र चताःवात । घःचानिचा
 लं आकाशे छत्र थ्यं । लोक सकल ग्यानावचोन ॥ श्री
 करूणाश्रय रथणं कोकया ज्यावलाखेले ताहाकगु फल-
 चास विज्याकल ॥ थनंलि मुखत्यालया निह्यत्यपुलिं
 वया न्यासः व न्यियतका दक्षिणा छाया पाजु पित धाल
 हे ? पांजु थ्वरथ दयकेत पुलां२ गुलिसाहाःछता हे तय-
 मत्ये । जमा न्हुगु तयमाल वने वना माक्व सिमा ध्यना
 ह्येमाल मुनानं रोकेयावलसा जिथाय् वोनाही ॥ जि
 माक्व हेरविचारयाये घकं धया लिहां वन ॥ थनंलि
 रथ पिया हल वछि न्हुगु सितया वछि पुलांगु सितया
 रथ सिधयेका श्रावण शुक्ल षष्टमि खुन्हु रथे विज्याका
 यज्ञ याना वलि विये धुंका ज्यावल जात्रा न्यायकल
 प्यन्हु दुखुन्हु ज्यावले पुजा नवमि खुन्हु बुंगदेव विज्या-
 क ॥ प्यन्हुखुन्हु विजापुजा ॥ थुगु वर्षे जल वर्षा मजु
 या वा पियमदु गनं२ वछि वालि जुल गनं स्वव्वे छवो

जक गनं २ सुखाजुया छतिहे मवल उक्कं मुस्यापित गनं
२ तु होयकल माँय् पिकल म्वा पिना मुस्या तवथास
छाःकि दाया छाःकिलं नया भस्म जुया वन ॥ थथ्य
संम विघ्न व विपरीत जुल ॥ थनंलि ल्हासा कुटि देश
यागु चि कोकायेगु सल्ला जुल जाकि विया हिला कायेगु
वन्दोवस्त जुल ॥ भिगु मार्सिकि जाकि छमनाया चि
निमना २ तौलि जाकी जूसा छमनात्या जाकिया चि
निमना २ थुगुरीलं ची कोकायेगु वन्दोवस्त याना यल
देशया साहु स्वम्हस्यनं चलन चलति याकगु जुल ॥
श्रोयोस्तु संवत १०१७ मंशिर सुक्ल पंचमि बुधवारखु-
न्हु श्री करुणामय बुंगदेशनं यल देश तवाहालसं
विज्याकगु जुल ॥ चैत्र सुक्लया पारु खुहु पंचासृतनंम
हासनानं जुल ॥ वैशाख शुक्लया पारु खुहु श्री करु-
णामय रथस विज्याकाव साल ल्हयंदना धावा वाया जुक
फःहियेके मफुत जुल ॥ द्वितिया खुन्हु मण्डफलेचारं जा-
त्रा न्यायकाव अक्षयतृतिया परचौठि खुन्हु गाः बाहा
जात्रा न्यायकल ॥ पंचमि खुन्हु भुज्या सिधयेका साला
यंका महापाकाले थात ॥ षष्ठमि खुन्हु जात्रा न्यायकल
सप्तमि खुन्हु भुज्या सिधयेका सालाहल महावीरु थ्यन
अष्टमि खुन्हु चक्रवाहाहीले थात नवमि खुन्हु दलंमाजु
सिमाया ल्यूने थ्यंका साले मफुत ॥ थुखुन्हुया दिन

वितयेजुस्यंली चान्हयस वा फे वया रथ चातुलावन यल
 देशे चोपिं सकल जात दक्वं ग्वाहालि वना जंगलः साला
 चोन तचोतं हे वानं वल वां दायका हे चछि जंगल जोना
 चोने माल, वयां सखुन्हुलायकुलि वना किसिचीगु खिपः
 निपु हया सायका तल ॥ जंमा जंगल प्यपुंयखे साय-
 का तल दशमि खुन्हु याः न्यायेकल । एकादशि वृहस्प-
 ति वार वृषशंक्रान्ति खुनु महावलि विल ॥ द्वादशि खु-
 नु लगंजात्रा याःन्याल जेष्ठ शुक्ल द्वादशि खुन्हु घौ प्यघौ
 तक तसकं जल वृष्टि जुया मंगः माहापाः हखा हवातकं
 जलामय जुया मनु सुं हे वने चोने मजील दिनया घौ ६
 खु घौ वाकि दिनवले हनं अकस्मात भुमिकंपमान जुया
 व स्वीनिपला ३२ संभ भुखाय वोल । ज्येष्ठ कृष्ण दुनिया
 बुधवार खुन्हु श्री करुणामय ज्यावल पिसाल ईति तोले
 थ्येंस्यंलि साले मजिल । तृतीया खुन्हु ज्यावलेया न्या-
 यकल ॥ स्वन्हु खुन्हु चा चोन प्येन्हु खुन्हु ज्यावलपुजा
 याना श्री करुणामय बुंग देश विज्याक जुल ॥ १०१७
 सालं श्री करुणामय यले विज्याना रथ जात्रा संपूर्ण सि
 धयका विज्यासेंलि वा मवया ईल्हने नाग निह्य ह्यु का
 विस्यंलि प्रतक्ष जुईक वा वल ॥ ह्यन वाहाया पित मं-
 गले मंकाहा कोहां वनेत छे' नसे' माको सार्दाम जोना

प्यहां वयेवं वा वल खापा चायकेत पुजा यात तखा
 चायका माको विधि विधान यात तसकं वा वल ॥ खा
 पा तिना आश्विन श्रुदि नवमि खुन्हु मत च्याका
 क्वाहां वना चछि जागर्तन चोना नव नाग साधन याना
 दशमि खुन्हु थाहां वन देशे सकभनं जल वृष्टि जुल, श्री
 करुणामयया थानस लः फोंगु दानपति श्री ५ पृथ्वीवीर
 विक्रम शाह देव जुल, श्रोयोस्तु संवत १०१८ मंशिर सु-
 कल द्वितिया सुक्रवार मूल नक्षत्र धृतियोग सुक्रवार खुन्हु
 श्री करुणामय यल देश विज्याक ॥ पौष शुदिं अष्टमि
 खुन्हु मूठुवाले पंञ्जादान ॥ माघ कृष्णया चौठि खुन्हु
 मंगले धुं छह्ण वया चोन लसकल आपालं वया स्वया
 चवन मुखत्यार वया कयेका यंन । चैत्र कृष्ण पारू न्हवं
 वैशाख शुक्ल पारू खुन्हु श्री करुणामय रथे विज्यात
 दुतिया खुन्हु नं संकयहे मफु तृतिया खुन्हु सादान ॥
 चौठि गाःवहा जात्रा पंचमि भुज्या सिधयेका हवाः
 षष्टमि, दौवा सप्तमि नुगजात्रा अष्टमि भुज्यासिधयेका
 हियेका तल । नवमि खुन्हु महाबौद्ध दशमि चकवाही
 एकादशि तंगले थ्यंबले वा वल साले मजिल । द्वादशि
 खुन्हु टंगः पुलेवं वा फय वया साले मजिल । थुगु वख
 ते कोख न्याम्ह खुम्ह बोया वया बाय्मोले जुना क्यना
 चोन ॥ तचोतं वा फय वया पुंचलि पुखु सिथे चोंगु

चस्वांमा फसंकया वल्लि चः चः हिला वन, जे ध्वाखा
 नं पिने चोंगु सिमात दकों गो गो तुला वन ॥ गो फय
 वया गुलि स्यां छे' पोल समेतं स्यन जुल त्रयोदशि खु-
 न्हु नं वा फय वया साले मफुत । ॥ चतुर्दशि खुन्हु
 माजु सिमा चाहुयका याःन्याल पुन्हि खुन्हु महावलि वि-
 ल ॥ पारु खुन्हु लगंजात्रा न्याल ज्येष्ठ शुक्ल त्रयोदशि
 बृहस्पतिवार खुन्हु ज्यावला पिसाला तःफाः ल्हो
 थ्यंकल । चतुर्दशि खुन्हुयाः न्याल । प्येन्हु खुन्हु ज्या-
 वले पुजा याना श्री वीर शमशेर मंत्री सवारी जुया
 श्री करुणामय यागु हेरा माणिक या तुपुलं थमनं जोना-
 व सकल लोक यात क्यंगु जुल ॥ हानं सुवानं छक क्यन
 श्री करुणामय वुंगदेश विज्याक जुल ॥ श्रावण शुक्ल
 अष्टमि खुन्हु बू वाहाले पंञ्जादान ॥ भाद्र शुदि अष्ट-
 मि खुन्हु बू वाहाले पंञ्जादान ॥ श्रावण शुक्ल अष्टमि
 खुन्हु कम्पनि नायोया पंजादान । आशुन सुक्र पुन्हि
 खुन्हु बुवाहाले धरवतया चैत्य दयका अहोरात्र ब्रत प-
 चंदान ॥ जुगादि नवमि खुन्हु वाहाः पुजा याःगु जुल
 संवत १०१९ पौष शुक्ल पंचमि श्री करुणामय यल
 देश विज्कात ॥ चैत्र कृष्ण पारु न्हवं वैसाख शुक्ल पा
 र रथे विज्यागु ॥ द्वितीया खुन्हु मंदफले जात्रा

न्याकल । तृतीया खुन्हु साः सान चउठि खुन्हु गाःबहा
जात्रा याना पंचमि भुज्या षष्टमि व सप्तमि नुगः जात्रा
अष्टमि भुज्यायाना महाबौद्ध थाता नवमि चकवाः हीले
एकादशि लगं छयले थ्यन । द्वादशि बौ बिल । त्रयोदशि
लगं जात्रा न्यायेकल । चतुर्दशि भुज्या धुंका ननिचा
जात्रा न्यायेकल । ज्येष्ठ शुक्लया दशमि ज्यावल पि-
साल । एकादशियाः न्याना प्येन्हु ज्यावले पुजा याना
श्री करुणामय बुंगदेश बिज्याक । श्रावण शुक्लया
अष्टमि खुन्हु बुबहाले पंचदान ।

१०२० साले पीगं पुजा समेत फंवजिकँ ५०खे
२० घौ १५ थुकील्वेक धासा दुजुल । १०२०पौष कृष्ण
अष्टमि खुन्हु न्हवं वैशाख शुक्लया पारुखुन्हु रथेवि-
ज्यात जात्रा न्यायके मफुद्वितियाखुन्हु जात्रा न्यायका व
अक्षयो तृतीया खुन्हु सा दान यात चौउठिखुन्हु गाबा-
हा जात्रा न्यात । पंचमि खुन्हु भुज्या सिथयेका साला
यंका मंगःबजार थ्यन षष्टमि खुन्हु भतिचा साले वं
थचातुला खव धखेभो सुत ल्होंदेवले जुत घःचा निचालं
आकाशे थंल्लोगुलिं साले मजिल । सप्तमि खुन्हु रथं कोक
याः तगो गंया कोसं पश्चिम स्वकातल । अष्टमि खुन्हु
मुखत्यारपिं वया सल्हा जुल ज्यूसा रथ थनेत सन,

मजिस्येति रथ पीया हल । ज्येष्ठ शुद्धि सप्तमि खुन्हु
 श्री करुणामय रथे विज्याकदिन यज्ञ छगू यामा शांति
 स्वस्तियात । अष्टमिखन्हु नुगः जात्रा न्यायकल । नव-
 मिखन्हु भुज्या सिधल अनतुं जुल । दशमि खुन्हु
 चुकबहाले थ्यन एकादशि खन्हु घःचा स्यन द्वादशि खुन्हु
 माजु सिमास याःन्यात । सखुन्हुबौ बिल द्वादशि हेदिन
 जुल।त्रयोदशि खुन्हु लगंजात्रा याःन्यायका व चतुर्दशि
 भुज्या सिधयेका ननिचा याः न्यायकल । सखुन्हु पुर्णी
 खुन्हु जुजुया संखमोज तिर्थे मोल्हुया छलछिसा ब्रह्मा-
 णयात दानयाक जुल । ज्येष्ठ कृष्णया दशमि खुन्हु
 ज्यावला पिसाला हल, तव पुखुलि थ्यन । सखुन्हु
 ज्यावले जात्रा याः न्याल । प्यनु खुन्हु विचापुजा जुल ।
 शुभं १०२० सम्बत्

श्रोयोस्तु संवत् १०२१ थुगु साले श्री स्वयम्भु
 गले जम्मा चिभाःव २२२ दुगु जुल ॥

मार्ग शिल शुक्लया द्वितिया खुन्हु श्री करुणामय
 यल देश विज्याक ॥ फागुण शुदिपुन्हि मंगरबार खुन्हु
 श्री ३वीर शमशेर स्वर्गारोत जुल मंत्रीपद १६ वर्ष चले
 याना वन ॥ ॥ सुंदरिजोले पानिधकि दयका वंगु
 जुस शुभं । चैत्र पक्ष शुदि द्वितिया खुन्हु देवशमशेर

मंत्रि पद कया श्री ३ पृथ्वीवीर महाराज याके होकम
 कया लोके हर्ता कर्त्ता जुया हर्ष बढाई याक जुल ॥
 पंचमि खुन्हु देव शमशेरया कलाः विष्णु कुमारी यात
 वडा महारानीनं होकम चले याके ब्यूगु जुल थ्य यागु
 पर्याय न्हिने १२ वजे तोप तईगु थिति जुल ॥ वहनी
 छक वाचा ईले छक चछि व न्हिछिया ३ स्वक तोप
 तया हैगु जुल चैत्र कृष्णया पारू खुन्हु श्री करुणामय
 यात पंचामृतं स्नान याक जुल ॥ वैसाख शुक्ल पारू
 खुन्हु श्री करुणामय रथे विज्याका साल । जात्रा न्याके
 मफु सखुन्हु जात्रा याः न्याकल, अक्षय तृतिया खुन्हु
 सादान याक जुल । चौठि खुन्हु गावाहा जात्रा न्याकेत
 चकवाहा देवया घःचा स्यना पंचममि खुन्हु याः न्याल।
 षष्टमि खुन्हु भुज्या सिधयेका साला यंका हखाथात
 सप्तमि खुन्हु नुःग जात्रा । अष्टमि खुन्हु भुज्या याना
 साला यंका चकवाही थ्यन । सखुन्हु सालायंका माजु
 सिमास याःन्याल । सखुन्हु वलि विल। थुखुन्हु साला
 लंगजात्रा याः न्यायकल । सखुन्हु भुज्या याना देव यात
 सालेगु प्रमाण जक यात । सखुन्हु देव शमशेर कृष्ण
 कृष्ण कुमारी निह्यस्त्री पुरुष यात यल देशे सिंधुर जात्रा
 यात । थुखुन्हु निम्हतिपुया तासया जामा सिना त्वाल

२ पति छँस मत तथा लँधुछिसिगो, स्वाना घजां, हिना
 ध्वां वोयका थातंथाय् पौभाचोया ध्वाखादयका निह्य
 सिगुंनां चोया छेखापति तिकातल मंगल बजारे जक
 लीपातां भुना ध्वाखा धिखा देकातल जें खवपेयया वयसिं
 द्ववर तेवर बाँलाका तल, थन थ्यसेली वडा हर्ष बडाई
 जुया जू फके याना लिहाँ वन । थ्व खुन्हु तिनि ननिचा
 जात्रा यान्यायका चछि न्हिछि जू म्हिता वंतुं यात ।
 ज्येष्ठ शुक्ल या द्वितिया खुन्हु ज्यावले पिसाल, वल
 तल ज्यावले याः न्यायकल प्यन्हु खुन्हु ज्यावलेयाः ज्या
 जुल प्यन्हु खुन्हु, विचाः पुजा जुल । थनंलि देवशमशेर
 निम्ह तिपुंलि नगर कोटनं पितिना छोया किजाम्ह
 श्री ३ चंद्र शमशेर यात होकम चले याकल आषाढ
 वदि त्रयोदशी खुन्हु ।

संवत् १०२२ पौष शुदि अष्टमि खुन्हु श्री
 करुणामय यल देश विज्या । चैत्र कृष्ण पारू खुन्हु
 पंचामृतं स्नान । वैशाख शुक्लया पारू खुन्हु रथ
 विज्यात सखुन्हु मंद फलेचास थ्यन अक्षय तृतिया
 खुन्हु सादान चउथि खुन्हु नत्वाले थ्यन पंचमी खुन्हु
 गाःवाहा जात्रा न्यायकल षष्टमि भुज्या सिधयका
 साला यंका हखास थात । सप्तमि नुगः जात्रा अष्टमि

भुज्या धुंका साला यंका चकवाही थ्यन नवमि लगंखेले
 थ्यन दशमि वौविल एकादशि लगंजात्रा द्वादशि भुज्या
 सिधयका ननीचायाः न्याल । ज्येष्ठ कृष्ण चौठि खुन्ह
 ज्यावले पिसालायाः न्यायका प्यन्ह खुन्ह ज्यावलेपुजा
 सिधयका बुंगदेशे विज्याक । प्यन्ह खुन्ह विचा पुजा
 जुल शुभं ।

श्रावण शुक्लया सप्तमि खुन्ह नसें वा वया
 निन्ह निचातक दिपाःहे मदयक वर्षा जुया देशे उपद्र
 व जुल । न्यखुई ता पुलईके यन ह्यसीकाव वंद याना
 न्यखुस नाग ह्याताः सतक खुसि वंध जुया चवतिबुंस
 पचालिस छें न्याखा ५, ६ खुखा चुइका ववय नाता
 फुस्मेत चुईके यन, कनिबाहालस धलं लँ त्वाल्हाना
 ह्यसिकाप थें चोक गाः वना । देशे पखाः मदुंगु गनं
 हे मदु । शंखमोले ब्रम्ह च्वना च्वंगु छें नं दुनावनं ।
 सिमा प्यमा न्यामा कोदला वना जोदयाव, घात न्हय्गु
 स्यना तापुनं स्यन । देशे ग्रामे ज्यामिमनुत सछि व स्वी
 छह्य चुयके यःना सित । गुलि छेंहे प्यहांवेमला छें नापं
 चुईके यकंल ।

१०२३ मंशिरशुक्लया द्वितिया खुन्ह श्री
 करुणामय बुंगदेशनं यल देशे विज्यात । चैत्र कृष्ण पार

खुन्हु स्नान वैशाख शुक्ल पारु देव रथे विज्याका
 सति खुन्हु मंदफलेचा याः न्यायका अक्षयो तृतिया
 खुन्हु सा दान चउथि खुन्हु भुज्या सिधयका साला
 यंकल कोतया ह्नेवने थात ।

षष्टमि खुन्हु भतिचा साला ह्या नवमि
 खुन्हु उबाहा दशमि खुन्हु याः न्यायका बिल ।
 एकादशि खुन्हु लगं जात्रा द्वादशि भुज्या सिधयका
 ननिचा याः न्याकल ।

ज्येष्ठ शुक्ल षष्टमि सिथीनखः खुन्हु भिमश्मय
 शेरणं श्री करुणामयया वायमोले वह्या ध्वजा छाया
 पुजायात गुभाजु ३२ स्वीनीह्य ब्रम्हू १२ किंनिह्य
 आचाजु १० तथा पाठयाका म्हं दक्षिण छतका १ दरं
 विया भोजन जक क्वालख्वी कांछा जोसियाथाय् जुल
 जम्मा वहत्तोला २१२ निस व किंनितोला पंचरङ्गी पताः
 छाःगु जुल, अष्टमि खुन्हु ज्यावले पिसाल एकादशि
 खुन्हु ज्यावले पुजा याना श्री करुणामय बुंग देशे
 विज्यात प्यन्हु खुन्हु विचा पुजा जुल थुगु साले
 ज्यावल खेले चवह्य श्री २ युद्धशमशेरं सिथंयनेगु पुलां-
 गुलं तिना मूगुलं सिथंयकेगु गुधका होक मजुल छन्हु
 थःगु पतां गिरी ग्वंत सकलें सःताः हर्पति छतका दरं

धेबा विया धाल मूलं छिमिसं सिथंयकेगुला? यनेगु जूसा
 छिमित ह्राति स्वतका जरिमनायोये धका होकमजुल ।
 ज्यु ज्यु धका होकममान्य याना मूल हे सीथं यंकेधका
 सकल गोंतस्यें मधाः हसैं लिहां वल ।

१०२४मार्ग शिर षष्टमि श्रवणा न क्षेत्र बुद्ध-
 बार खुनु श्री करुणामय बुंगदेशे नं यल देशे विज्याका
 चैत्र कृष्ण पारु खुनु पंचामृतं स्नान याक ।

श्रोयोस्तु संवत् १०२५ चैत्र कृष्ण पारु चित्रा
 नक्षत्र व्याधातयोगे शुक्लवार खुन्हु न्हवं । वैसाख शुक्ल
 पारु खुन्हु रथे विज्यातकाव द्वितिया खुन्हु मंदफलचा
 याःन्यायका तृतिया खुन्हु सा दान याक जुल । चउथिखुनु
 गावाहा जात्रा न्यायेका पंचमि भुज्या याना माःपाःकाल
 स थ्यन षष्टमि खुनु नुगः जात्रा याःन्यायका शप्तमि
 भुज्या सिधेका साल । हितिया हिले तक जक अष्टमि
 खुनु नौद्वे थ्यन चकवाहादेव उभाहाही भति मथ्यं
 नवमि खुनु चकवही थ्यन दशमि खुनु माजुसिमा याः
 न्यायेकल । एकादशि मंगरवार दौविया द्वादशि बुद्धबार
 लगंजात्रा त्रयोदशि बृहस्पतिबारे मुज्या सिधयेका
 नैक्यालं लुना अनंतुं चतुर्दशी ननिचा याःन्यायेकल ।
 थन ज्येष्ठ महिना अनाला दुगुलिं वैशाख भरिहे देव

पिशाला वुंगदेशे यंकेगु सरकारया मति थन सकल लोक
नंधालकि न्हापा २ गुवलेहे वैशाख मैना भरि हे जात्रा
सिधये कुगु मडु धास्ये लि प्यथाया जोसिपिसनं थय्यजूगु
गुवलेसं मडु धका शुद्ध ज्येष्ठ शुक्ल पक्ष तृतीया वृह-
स्पतिवार खुनु ज्वावले पिसालेगु थयकाना विल ।
ज्यावल पिसाखुनु फःहे हीके मफया सखुनु चौटि खुन्ह
फःजक हिके फत घःचा स्यना पंचमि खुनु याःन्ययका
चक्रवाहा देव वहति फःतये धुंका वलतलं याःन्यायकल ।
ज्येष्ठ शुक्ल अष्टमि मंगलवार खुन्ह ज्यावलपुजा
सिधयेका श्री करुणामय वुंग देश विज्यात प्यन्ह खुन्ह
विचापुजा जुल शुभं ।

श्रोयोस्तु संवत् १०२९ मार्ग सिल शुक्ल चौठि
अदित्यवार खुनु श्री करुणामय वुंगदेशनं यल देशे तव
वाहाले विज्यात ।

चैत्र कृष्ण पारू खुन्ह पंचामृतनं महास्नान
वःन्हिथंवाफेवया वडा उपद्रवनं खिउया श्री करुणामय
खतेतया ह्येत्यंगु बेलस खः स्मेत तोफिया विघ्न जुल ।

वैशाख शुक्ल पारू खुनु देव रथे विज्यात
थुखुन्ह नं वाफे वया लसकल चोने मफया देवहे मसास्यं
प्रमाणजक याना सकले त्याहाँ वन । द्वितीया खुन्ह
नं घःचा बुना साले मफुत तृतीया खुन्हनं सालेहे मफया

अनसतुं सादान यात । चउथि खुनु गावाहाःयाःयाना सुथे
 न्हिने साला वल तलं मंदफलेचास थ्यन रथे लःस्वां तल
 चकवाहादेव साला हया पुचो मथ्यसां पुखुसिथे थ्यनेवले
 स्वांतया विल पुखु ँंगल हायका थात । पंचमि गावहा
 जात्रा न्यायका षष्ठमि भुज्या सिधयेका माःपाःका थ्यन
 चकवाहादेव अनंतुं । थुखुनु चकवाहादेवया धमाया
 न्हिपनं दाया मनु छह्य सिनावन । सप्तमि खुन्हु नुगः
 जात्रा अष्टमि भुज्या अष्टमि खुन्हु अनंतुं नवमि खुन्हु
 टंग पुईका तल । दशमि खुन्हु लगखेले याःन्याल एका
 दशि खुन्हु महाबलि द्वादशि लगंजात्रा त्रयोदशि भुज्या
 सिधयेका ननिचा याःन्याल । थुगु तर्षे श्री चन्द्रश्मशेर
 जुजुं दुदु पुखु यागु लःहया क्यपुः वनेगु खुसि नंताफु तया
 यल देशे त्वाः २ पत्ति धारा तया मंगः वजारे खः गोया
 भारी नकसां स्वां स्वांवागला वोया लयातामासा क्यना
 क्यना विल । रंगी चंगीया ध्वां वययेका हानं जें वनेगु
 न्हापायागु ताफू स्यंका न्हुगुजं ताफू दयका ताफुति अनेक
 छायपा छेया ऊयाः पत्ति मल तयेकल, छे खापत्ति चिकं
 अयताछि १ वियाव जें ताफुतिनसैं मतच्याका मंगल
 लुंध्वाखाया ह्योने दिल, मंदले श्री ३ पृथ्वीबीर महा
 राजा विज्याना व मंत्री श्री चन्द्रश्मशेर सकल भारदार
 चोना लः तोंका कलहितोया थकल, ज्येष्ठ शुक्ल द्वादशी

खुन्हु जुल । ज्येष्ठ कृष्ण पंचमि श्री करुणामय ज्यावले
 पिसाला याःन्यायका अष्टमि खुन्हु ज्यावले पुजा सम
 स्तंसिधया देव बूंग देश विज्यात, प्यन्हु खुन्हु विचा पुजा
 चकवाहा देव लित हःगु ईगःत्यागःतक थ्यन सखुनु बाह्नि
 जाःवले तंगल थ्येका भालको कर्मकाडयाना देवलस
 विज्याक जुल शुभं ।

१०२६ साले आधार शुक्ल नवमि हस्तापर
 चित्रानक्षेत्र परिघयोग शनिश्चरवार खुन्हु श्री ३ पृथ्वीव
 वीर विक्रम शाहदेव महाराजाया संतान श्री त्रिभुवन
 युवराज जन्म जूगु दिन ।

श्री संवत् १९६३ श्रायोस्तु १०२७ मार्ग शिल
 शुक्ल द्वाद ज्येष्ठा नक्षेत्र सुकर्मयोग आदित्यवार थ्व
 खुन्हु श्री करुणामय १२ किंनिदँया मेलाजुगुलिं सकल
 लोकया दुथ्यं फुथ्यें जोरेयाना यलदेश विज्यागु दिन
 धका साईत याना पुजाभाव याना ईश्वर दर्शन याना
 नयेत्वने याना सकलें थव २ थास लिहांवन जुल मंशिर
 कृष्ण द्वितिया मृगशिरा नक्षेत्र साध्ययोग आदित्यवार
 थ्वखुन्हु त्रिभुवन विक्रम साहेवया अनं प्राशन जुल । थुगु
 वर्षे चंगु दानास धःमा कया हया बूंग देश यंकातल ।
 चैत्र कृष्ण पक्षप्रतिपदा खुन्हु न्हयंयात थुखुन्हु मेघ

सक्रांती पर्व दिन जुल जटाधारी लोकाश्वरयात न्हवयात
वैसाख शुक्ल पारु खुन्हु रथे विज्याकल । मामुकील नं
क्वाहांवल थुखुन्हु अनंतु द्वितिया खुन्हु भतिचा फःहियेके
फत तृतिया खुन्हु माको कर्मक्रिया याना मंदफलेचा
तक थ्येन । चउथि खुन्हु तिख्यलै थ्येन । श्री जटा-
धारी लोकेश्वर रथे विज्याका साला हया माःहाःपा
काले थ्यन । पंचमि खुन्हु ग्वाखंचो थ्यन थ्वखुन्हु जटा-
धारी चकवाहादेव साहापाकाः पुल । षष्टमि खुन्हु
ग्वाखंचो साला हया डेखु छिका पानी धकि वनेथाय्
थ्यन । चकवाहादेव धिवांसिपिथाय् छें पुलावन ।
सप्तमि खुन्हु यपाः वनेगुलें धःया क्वसं थात । चकवाहा
देव नःवाहा न्होने थ्यन, अष्टमि खुन्हु यपाच्चे वनेगु
तंया फुसे थ्येन । नवमि मंगलवार खुन्हु इवलाख्य
याःन्याल । दशमि खुन्हु ईवलाखेले याःन्ययकल थुखुन्हु
रात साया हया नसंचास, मंदल फलेचास थ्यन ।
एकादशि खुन्हु लुंया कसिमो ध्वाखाजला लःस्वां
समस्त तया धमाःख्वाः पाताया श्री करुणामय गाःवाहा
जात्रा न्यायेका चकवाहा देवनं लः स्वांतये धुंका गाः
वाहा जात्रा न्ययेकल । बृहस्पतिवार खुन्हु जुल । द्वादशि
खुन्हु गाःवाहाया पुजाभाव सिधयेका नुगः जात्रा याना

त्रयोदशी खुन्हु याःन्यात चतुर्दशि भुज्या याना साला
 यंका चकवाहाहि भच्चा मथ्यं पुन्हि खुन्हु लगंखेले थ्यन
 बुधवार खुन्हु वौवी मालीधका भतिजक याःमन्याकुगु
 जुल । सखुंनु यान्यायका बृहस्पतिवार वैसाखवदि
 द्वितिया खुन्हु बौ विल । तृतिया शुक्लवार खुन्हु
 जात्रा याःन्यात । शनिवार भुज्या याना, ननिचा जात्रा
 याःन्यायकल । ज्येष्ठ शुक्ल नवमि खुन्हु बृहस्पतिवार
 ज्यावले पिसाला छन्हुहे याः न्ययकल । द्वादशि खुन्हु
 ज्यावला जात्रा याना सकल तमान दुनिया ग्राम नगर
 स चोंपि सकसियां फिनिदँया मेला धका सकलें वया
 पुजाभाव भक्ति याना चोन श्री करुणामय बुंगे यनेत
 साल सासँलि गाले थात थत काये मफु त्रयोदशि खुन्हु
 साला यंका यपादेवया तने थात, चतुर्दशि खुन्हु गावा-
 हा व बुवाहा यापि वना साला यंका पानि धकिया
 धले थात ॥ थनंलि पुन्हि खुन्हु या दिनस नेपालया
 चक्रवर्ति श्री ५ पृथ्वी वीर माहाराजा मंत्री चंद्रस्मशे
 र काजि भारादार कर्णेल कपतान सकल दुनिया चो-
 ना सास्यंलि न्यखुस थन्न मेला भरेयाकल लसकल वि-
 थ्यकानानं मोल्हुया मेला भरे यात सखुंनु तकनं मे-
 ला भरेयाना मोल्हुया श्री करुणामय दर्शन यानालोक
 पानि लिहां वन ॥ थुखुन्हु साला यंका धः जकः पुइके

फत ॥ सखुंहु काजी भारदार पवटन प्यंगु चोना साल
 यंका ज्यावले खेले भतिचा मथ्यन घःचाः द्यागिमे न्याना
 साले हे मजिल ॥ थ्व खुन्हु जुजुं देवसाःपित ५०।
 न्येतका दां वकस विल । घःकु तयतनं १०। कीतका दां
 विल यलेतुसाले चियेकाहल, कंस खुन्हुसुथे सिया १०
 घरिजाःवले भुखाय बोल थुखुन्हु साले मजिल थ्व खुन्हु
 दयावाहाले श्री बुद्ध भगवानथा द्वार लुंयागुलि कवा
 यहना धवाखा तवगु जुल ॥ वं प्यन्हु खुन्हु शांति स्वति
 याना ज्यावले जात्रा न्यायेकल ॥ ज्येष्ठ कृष्ण या न-
 वमि खुन्हु ज्यावले पुजा यात थुखुन्हु न्हिछि वा वया
 न्यखु बाः वया चुइकेगुलि मणू सित ।

संवत १०२८ मार्गशिर पंचमि सोमवार खुन्हु वंगदेशनं
 यल देश विज्याकगु जुल ॥ चैत्र कृष्णया पारुखुन्हु श्री
 करुणामय यात पंचामृत नंस्तानयाक दिन जुल ॥
 वैशाख शुक्ल पारु खुन्हु श्री करुणामय रथस विज्याक-
 जुल ॥ हामुकीलं नं को हां मवल सखुंहु साला हया
 मंह फलचास थ्यन । अक्षय तुतिया खुन्हु सा दान याक
 गु जुल ॥ चउथि खुन्हु गाःवाहा जात्राया पुजाभाव
 धुंका अनंतुं । सखुंहु नुगले यंकल याः न्याल॥सप्त-
 मि खुन्हु नुगः जात्रा याः पुजाभाव यात अनंतुं जुल

अष्टमि खुन्हु चकया ही थ्यंकल । नवमि खुन्हु माजु सि
मा थ्यन दशमि खुन्हु वौ विल एकादशि मंगलवार
खुन्हु लगं जात्रा न्यायेकल ॥ द्वादशि खुन्हु भुज्या सि-
धयका ननिचा जात्रा न्यायेकल ॥

ज्येष्ठ सुक्ल द्वादशि बृहस्पतिवार खुन्हु ज्यावले जात्रा
न्यायेकल । पूर्णी मिथुन शंक्राति खुन्हु ज्यावले जात्रा
याका श्री करुणामय बुंगदेश विज्याक जुल । थुगु वर्ये
छुं विघ्न वाधा मदु जुल ॥ प्यन्हु खुन्हु विचा पुजा
ज्येष्ठ कृष्णया पंचमि खुन्हु वू वाहाले श्री वज्रसत्त्व
श्री त्रिरत्न देवता प्रतिष्ठा दिन जुल ॥

संवत १०२९ मार्ग शिल सुक्ल पंचमि घनिष्ठानक्षत्र
वक्रयोग सोमवार थव खुन्हु बुंगदेशनं श्री करुणामय
यल देश विज्याक जुल ॥ श्री चन्द्र श्मशेर मंत्रिया थव
स्त्री स्वर्ग जुयाव थव कलायाः सालीक दयेकाव मंगल
वजारया दथुस पुखु दयका दथुई सालीकतया जवया
पतिनं लख धारा पिकया प्रतिष्ठा यात काजी भारदार
सकल लोक पलटनं वयाव छ्वाळयलं धोजा वोयका
छायपा तल अं देश खोंपदेश यल देशयानं लोकपनि वया
व सोया चोन मंशिर कृष्ण तृतिया खुन्हु कृष्णकुमारी
सालीक स्थापना यागु जुल शुभंजू म्हितकल प्यन्हुतक ।
श्रोयोस्तु संवत १०२९ चैत्र कृष्णया पारू मंगलवार

श्व खुन्हु श्री करुणामय महास्नान याक जुल ॥ वैशाख
 शुक्ल पक्ष पारु खुन्हु श्री करुणामय रथसं विज्याकगु
 रथ साल फाःजकहिके फल दितिया खुनु नं नसंचाससा
 ला यंका मंद फलेचास थ्यन अक्षया तृति खुन्हु सा दा-
 न याना वं सखुंन्हु चौठि पुन्हु गाः वाजात्रा भतिचा
 सालेवं घःचा तुना साले मजिल पंचमि खुन्हु गाःवाहा
 जात्रा न्यायकल ॥ षष्टमि आदित्य बार खुन्हु भु ज्या
 सिधयेका नुगः जात्रा यान्यायकल ॥ सप्तमि सोंमबार
 खुन्हु भु ज्या याना अनंसंतुं ॥ अष्टमि मंगलबारखुन्हु
 लगं खेले थ्यन वयां सखुंन्हुमाजु सिमाचा याः न्यायका
 वयां सखुंन्हु नवमि पर दशमि बृहस्पतिवार खुन्हु वौ
 विद्या सुक्ल वार एकादशी खुन्हु जात्रा न्यायेका तल ॥
 द्वादशि खुन्हु भु ज्या याना ननिचा जात्रा न्यायेकल
 वैशाख कृष्ण नवमि खुन्हु वृष शंक्रांति खुन्हु म्हेपि वना
 वोचा हया भारी जात्रा याना रथे प्यन्हु तया ज्येष्ठ
 शुक्लया द्वादशि ज्यावल पिशाला याःन्यात प्यन्हु खुन्हु
 ज्यावले जात्रा याना देव बुंगे विज्यात प्यन्हु खुन्हु वि-
 चा पुजा जुल ॥ श्रोयोस्तु संवत १०३० पौष खृष्ण
 पंचमि आदित्य बार खुन्हु श्री करुणामय बुंगदेशनं
 यल देश तः वाहाले विज्यात । चैत्र कृष्ण पारु खुन्हु

महास्नान याक जुल वैसाख सुक्ल पारु खुःहु रथे वि-
 ज्याका साला हया मंद फलेचास थ्यंकल ॥ तृतिया
 तूत जुया द्वितिया खुन्हु सा दान याना चौठि खुन्हु नाः
 वाहा जात्रा याः न्यायकल ॥ पंचयि खुन्हु हःखासं थ्यन
 षष्टमि खुन्हु नुगः जात्रा सप्तमि खुन्हु सिकुचो वाहा
 थ्यन षष्टमि खुन्हु चकवा ही थ्यन । सखुःन्हु लगं खेले
 थ्यन । दशमि बुधवार माजुसिमासं याःन्यायेकल ।
 एकादशि बृहस्पतिवारं वलि विल । द्वादशि शुक्लवार
 लगंजात्रा याःन्यायेका त्रयोदशि शनिवार खुन्हु पुजाभाव
 सिधयेका ननिचा याःन्यायेकल । ज्येष्ठ शुक्लया
 नवमि बृहस्पतिवार ज्यावले पिसाल याःन्यायेका तल,
 चकवाःदेव यंके मफु थतिसंतुं सखुःन्हु तिनि साला यंका
 याःन्यायका तल द्वादशि आदित्यवार खुन्हु ज्यावले
 जात्रा सिधयेका श्री करुणामय बृंग देश विज्याकल ।
 थुगुदं हैजा छेरोपति मचे जुया जें देशयापि छह्महे यले
 वने मडु धका नार्याखि चोयका महाराजया होकमं नं
 जें देशयापि छह्महे ज्यावले पुजा वीपि मडु ।

श्रोयोस्तु संवत् १०३१ पौष कृष्ण षष्टमि
 शुक्लवार खुन्हु श्री करुणामय बृंगदेश नं बल देश

तःबाहाले विज्याकगु जुल । चैत्र कृष्ण पार खुन्ह
 महास्नान वैसाख शुक्ल पार खुन्ह श्री करुणामय
 सागु दखते हामुकिल कोहाँ मवल । द्वितिया खुन्ह
 मंदफलेचासं थ्यन । अक्षय तृतिया खुन्ह सादान चौडि
 खुन्ह बुबाहा १ गाःवाहा २ सिःवाहा ३ नःवाहा ४
 वला वाहा ५ हौःवाहा ६ थानेया युवक पिसँ समोहनं
 ताय् छमुरी अभिर ५ धानीं फिःपौ तथा जवं खवं
 चोना धुं धुपाय च्याका सिंधुर जात्रा याना गाःवाहा
 जात्रा न्यायेके हल । पंचमि खु ह पुजाभाव याना साला
 यंका हःकु छिका कोले दबुन्होने थात षष्टमि खुन्ह
 नुगः जात्रा याःन्यायेका सप्तमि खुन्हया पुजाभाव
 सिधय्का अनंतुं अष्टमि खुन्ह लगं खेले माजुसिमास
 याःन्यायका नवमि आदित्यवार खुन्ह दलिविया दशमि
 खुन्ह लगंजात्रा याःन्यायका एकादशि खुन्ह भुंज्यायाना
 नैक्यालं लुना मालको कर्म याना ननिचा जात्रा याः
 न्यायेका तल । वैसाख कृष्ण द्वादशि बृहस्पतिवार खुन्ह
 जे नारांहिति रानी पोखरी सिंहदरवारं त्रिपूरेश्वरं
 निस्यं पुचो जावल खेल थ्यनकं विजुलि मत च्याकुगु
 जुल निचा निन्हु तकं जू ह्यितका तल । फंपि भाज्यां
 नंस्यं लथा स्वाना ह्या विजुलि मत फुके यागु जुल ।

ज्येष्ठ कृष्ण पंचमि वृहस्पतिवार खुन्हु ज्यावले पिसागु
छन्हु नतुं याः न्यायका अष्टमि आदित्यवार खुन्हु
ज्यावले पुजा याना श्री करुणामय वुंग देश विज्यात
श्री जटाधारी लोकेश्वर लितहया तंग थ्यंके मफु
वावो गुलि वंयां सखुन्हु थाते थ्यंका देवले बुत यंकुगु
जुल । प्यन्हु खुन्हु विचापुजा जुल शुभं ।

श्रोयोस्तु संवत् १०३२ मंशिर कृष्ण पंचमि
तिष्यनक्षत्र शनिश्चरवार थ्व खुन्हु श्री ५ पृथ्वी वीर
महाराजा स्वर्गारोहन जुल फिस्वन्हु तक पुजा आज्ञा
व्यवहार दक्क वंद याकं जुल । कींप्यन्हु विवाह कर्मज
मांकुकेयात वाजं थाये मज्यू दिशिपुजा सम्मेत वंद
लत्यातक मां वौ मदुपित ग्वाय् मिखाफुसि शंखाका
शोक माने याक जुल ।

चैत्र कृष्ण यारु खुन्हु महास्नान न्हंव्याकगु
वैसाख शुक्लया पारुखुन्हु श्री करुणामय रथे विज्याका
साल हामुकिलं क्वाहां मवः द्वितिया खुन्हु फःहीयेका
हयेमफु । अक्षय तृतिया खुन्हु साःदान अनंतुं यात
द्योसायेक वल, घःचा तुनावना साले मफु चौथि खुन्हु
सालनं साला हये मफुत । पंचमि खुन्हु साला गाःवाहा

जात्रा न्यायेका षष्टमि खुन्हु भुज्या सिधयेका साल
 वलावाहा द्वाहां वने थासथ्यन। सखुन्हु सालायंका नुगः
 जात्रा न्यायकल नवमि खुन्हु भुज्या सिधयेका साल
 भतिचा न्होने साले वं घःचा तुना साले मफुत दशमि
 खुन्हु चकवाही थ्यन । एकादशि खुन्हु लगंखेले माजु
 सिमास थ्यन । द्वादशि खुन्हु महाजलि विल त्रयोदशि
 लगंजात्रा चतुर्दशि खुन्हु भुज्या पुन्हि खुन्हु ननिचा
 जात्रा न्यायका तल । ज्येष्ठ शुक्ल षष्टमि सिठिनखः
 खुन्हु ज्यावले पिसाला ईगः त्यागः जक पुल सप्तमि
 खुन्हु तःपुखुलि थ्यन । अष्टमि खुन्हु ज्यावले जात्रा
 न्यायका प्यन्हु खुन्हुया पुजाभाव सिधयेका श्री करू-
 णामय बूंग देश विज्याक जुल ।

थुगु सालनसैं श्री ५ त्रिभुवण विर विक्रम
 साह देवया पर्य्याय जुल शुभं ।

श्रोयोस्तु संवत् १०३३ माघ शुक्ल ८ गते
 तिष्य नक्षत्र सौभाग्ययोग बुधवार खुन्हु देश देशांतर
 राजा वाछा वया चोन शुभ लग्नस राज्याभिषेक विया
 हनुमांश्वाखा निस्यं तिनिखेले थ्यंकं अनेक वाजा थाय्का
 ध्वंजावोयका भारी सिधूर जात्रा राज्याभिषेक जुल ।
 स्वंगू शहरयापि लावा लसकर तमाम् भारीं दुनिया
 तामासा स्वया चवन ।

श्रायोस्तु संवत् १०३३ चैत्र कृष्ण पारु खुन्ह
वर्षादियाये मालीगु महास्नान याकेत हवगु वेलस स्वां
यागु मुखः कुतुं वन, दबुलि थ्यंका तिनि पुयकल । अले
तिनि महास्नान याकगु जुल ॥

१०३३ वैसाख शुक्ल पारु खुन्ह श्री करुणामय रथे
विज्याकल साले मफु ॥ द्वितीया खुन्ह मंदः फलेचास
थ्यंकल अक्षत तृतीया खुन्हसाः दान याकगु उवाहाः
न्ह्लयोने नरां न्यागु चौठि खुन्ह पुचो साला हव वेलस
खिपःचः वुना स्वपुतक चोबुगुलिं ल्वापु जुल। स्वम्ह मनु
जोना थंका तल अथेनं साला हया गाःवाहाः जात्रा
न्यायेकल चुकबाहादेव सि वाहाया तंचा थ्यसेलि तंग
वाहाया पांगु छह्मेसित घमाया चुकलं काना घाः जु-
यीका वन ॥ पंचमि खुन्ह पुजा भाव सिधयेका पल-
तन चाह्नु वया ल्याहां वन ॥ चकबाहा देव लिसाला
बुंग देव साला भति वयवं थात । षष्ठमि खुन्ह भति
सालेवं घःचा स्यना साले मफुत । थुगु वखते ल्वापु जुया
मेगु घःचा तया सप्तमि खुन्ह नुगः जात्रा न्यायेका
अष्टमि खुन्ह पुजा सिधयका साले मफुत अनंतुं नवमि
खुन्हनं चांगल व्वाना अनंतुं । दशमि खुनु लगं खेले
थ्यन द्वादशि खुनु महावलि विया त्रयोदशि खुनु लगं

जात्रा न्यायेका चतुर्दशि खुनु भुज्या यानो ननिचा
 जात्रा न्यायेका तल । ज्येष्ठ कृष्ण्या पंचमि खुन्ह
 ज्यावले पिसाला ईग त्यागलं पुईका तल । षष्टमि
 खुन्ह तव पुखलि थंकल । वंसखुन्ह ज्यावले खेले
 थंका प्यन्ह खुनु ज्यावले पुजा याना लोकसकसेनं
 पुजाभाव याना चोन श्री ३ चन्द्र श्मशेर महाराणी
 सकल भारदार सवारी जुया किसिम्हे चोना ज्यवल
 खेले वया दां होला स्वक तक दां होला बुंगदेवया
 खते चोना छकेका हौला व्छोत फलेचास छकेका होला
 व्छोत हानं कुमारीयात छकैका होला व्छोत । हानं
 महाराणी छकैका बुंग देव यात होला व्छोत, भउम्हं
 छकैका द्योयात होला व्छोत कार्यपिसनं छकैका होला
 व्छोत । थनंलि महाराजां लिफः स्वया पुजारीपित दां
 ह्वला वन । हानं चकवाहादेव यातनं छकैका २ ह्वति
 २ होला वन, थननं चाहुला दां होला २ वंव ले हुल
 जुया मधि पसनं स्यन ल्हात । प्रजागर्णपित दां पास २
 कया होला वंबले गुलि मिसातसें गाःचो फया च्वन
 गुलि मिसातसें कुसा चायेका फया च्वन । थुजागु
 वखते दांया लोभं हुल मूल जुया गुलिसियां मिसातये
 पतासी मद्रु गुलिसियां गाःमद्रु गुलिसियां तपलि मद्रु

गुलिसियां लकां मडु । गुलिसियां लँकु मडु थुगु कथं
घाता घुतु जुया संगु खना जुजु न्हिना वन । बूंगदेशे
यंकल प्यन्हु खुन्हु विचा पुजा जुल । श्री जटाधारी
लोक्यश्वर थव थासं विज्याक जुल शुभं ।

चुकः बाहाः या वर्णन

श्रीयोस्तु संवत ७६७ साले श्री सिद्धिनर सिंह
राजा ललितपुरे महानगरे श्री कृष्ण देव स्थापना
याना कोप्याहुति यज्ञ यात काशि कैहर यापि व्राम्हण
जुहु ~~मन्त्र~~^{मन्त्र} छम्ह निसन्त्रणा याना जज्ञ आरंभ यात
अनेक पुजा भाव वेद पाठ याना होम यायां लछि दया-
दयानं पूर्ण याये मफया मन अंदोल जुया व्राम्हण गण-
पि सकल चवना ब्रहन सोगु वखते थन छगू विघ्न जुया
चवनथुगु विघ्न शांति यायेत थवहे देशे अनेक शास्त्र मंत्र
स्वयाचोपित तारण तयका थुगु जज्ञ पूर्ण याये मालि धका
ब्राह्मणपिसं राजायाके वितियात थवते ब्राह्मण पिनिगु
वचन न्येना राजां विचार यात थव वेलस दुत पनि सल-
ताव राजां आज्ञा दयेकल ॥ हे दुत गणपि छिपि थथे
न्याखाचुके वना कुलपादया सन्तान मणि देव वज्राचार्य
यात सःताही धका आज्ञा दयकल ॥ थनंलि दूत गणपि

न्याखाचुके वना मणि देव वज्राचार्य यात सःतके हल
 मंगले महाराज सिद्धिनर सिंहयाथास थ्यन थन मणि
 देव आचार्य नं श्री सिद्धिनरसिंहया न्होने विज्याना
 व वित्तियात । हे! महाराज छलपोलया वचने जि थ्यंकः
 वे धुन आज्ञा छु, छु ज्या याये माल धकं न्यन थ्वते मणि
 देव गुरुजुया वचन न्येना राजां आज्ञा दयेका विज्यात
 भो आचार्य जिनं कोत्या हृति यज्ञ याना चोनगु लछि
 दैन अध्यनं यज्ञ मजानी यज्ञ पूर्ण याये यात छलपोलं
 विचार याना थुगु थास तारण मंत्र प्रयोग याना
 थुगु कार्य सिद्ध याना विज्याहुँ सिलपाउ विये धकं
 आज्ञा दयेकल । थ्वतेराजाया वचन न्येना मणि
 देव गुरुजुं मालको विचार याना थातंथांय तारण तथा
 मंत्र प्रयोग याना थुगु यज्ञस पुजा आज्ञा याना होम
 कर्म याक जुल । थुखुन्हु निस्यं यज्ञस छुं विघ्न मडुगु
 जुल थुकथं नं यज्ञ पूर्ण यागु दिन खुन्हु अनेक प्रकारया
 स्वाँ धुं सिंह नैवद्य फलफुल मधिचधि धुपदिप संयुक्त
 यानाव शुभलग्नसं यज्ञ संपूर्ण यानाव विज्यात थन
 गुरुजु मणिदेव ब्राह्मण गणपित यथायोग्य प्रमाणनं
 दक्षिणा वियाव प्रदवी मणिदेव गुरुजु यात आज्ञा
 दयेकल । भो आचार्य छलपोल यात थाँया दिने छपित

जिनं सिलपाउ विये त्येना छुमाःखे जिके दुगु यःगू
मासां जिनं विये धाः धकं आज्ञा दयेकल श्वते सिद्धि
नरसिंहया वचन न्यनाव मणिदेव आचार्य नं वितियात
ओ राजन् जिमित छुं माःगु मखु गुरु जुजुया जजमान
पिन्त उपकारयाना पुजापाठ यायेगु जिमिगु कर्तव्य खः
उक्ये जितापुर नगरे गुरुजुपि मद्रु थुमित जिमिगु
शाखा संतान माक्व पुजा पाठ कर्म काड जिमिसं
यायेगु १ छगु, हानं जिमि शाखा संतान दतले श्रीमान
देव राजां दयेका वंगु विहार चुकः वाहाले जिपि चोना
थुगु विहारे माक्व नित्य पुजा याना परउपकार याना
मनुष्यगण पित शिक्षा दिक्षा विया च्वने थुलि दतसा
जितगाः धकं पवन थुलि गुरुजुया वचन न्यना राजा
सिद्धि नर सिंहनं खुसि जुया तत्कालं वकसपत्र चोया
थुखुन्हु नित्से राजाया होकमं मणिदेव गुरुजु चुकः
वाहाले चोवल । श्री रत्नपाणि बोधिसत्व यात नित्य
पुजायाना ह्लिह्लि श्वहे विहारया कुलदेवता सेवा याना
व चोन जुल । थनंलि कथंथे दिन दिन वितये जुयाव
वनं थनंलि छन्हुया छुं छुं संतान छह्य जन्म जुल
गथिङ्ह्य धालसा श्री महामंजुश्रिया अंश अति ज्ञानीह्य
लक्षण संयुक्तह्य मचा जन्म जुल थुह्य वालक यात थवगु
कुलाचार थे जताकर्म यानाव नाम कर्ण यात । मंजुदेव

धकं नाम कर्णयानाव न्हिथं २ विचार यानाव प्रति
 पाल यानाव तल । थुह्य बालख कथनं त्तिह्तिह्ति छिकथं
 तधिक जुयाव मास पूर्ण जुयाव अनं प्राशन याक जुल
 थव बालक जाःनयेगु मन मदयाः वर्ष दिन विते जुया
 वननं जाः नःगु मखु उक्कयं थव बालख यात धौ दुरु
 मधि चढी पंचामृत फलफूल नका प्रतिपाल याना तल
 थ्यादँ दस्यंलि थव पुरखां ददेकातवगु श्री हिरण्य वर्ण
 महाविहारे यंका चूडाकर्म याना थव कुलाचार थ्यं
 बज्राचार्याभिषेक बिया आखः स्यनॐ नमोवागीश्वराय
 स्वर व्यंजन सारस्वति व्याकरण गणित जोतिष कोष
 शास्त्र वैद्य शास्त्र आदि षट्शास्त्र स्येनाव हल, थव
 मचायात स्येनेव फुकं लुमना ज्ञान गुण संयुक्त जुया
 चोन पुनर्पार द्वितीय पुत्र जन्म जुल मंजुराज नामकर्ण
 यानातल तृतिया पूत्र भारदेव चतुर्थ पूत्र महामणि
 पंचम पूत्र सिद्धिमुनि थवते ह्य न्याह्य संतान् नसंयुक्त
 जुयाव चोन जुल थनंलि मंजुदेव जौवन अवस्था जुया
 वस्येंलि मंजुना धयाम्ह कन्मा छह्य विवाह यानाव
 बिल । निदँ प्यदँ दयावस्यंलि स्त्रीया गर्भनं पुत्र जन्म
 जुल । थवयात विश्वदेव धकं नामकर्ण यानाव मालको
 विचार संचार यायाव तल । थनंलि छन्हुया दिने थव
 किजा प्यम्हे सितनं आखःस्यना मेमेपितनं अनेक शास्त्र

स्यने कने याना चो चों छन्हुया दिनस विदेशी मनु छह्य
 मंगले वया हपतले चोना मचाह्य स्याना छल कपत
 याना लाफः पिया स्य स्वं मुगःचु समेतं वयना लोक
 पित मोहे भुलेयाना तल गुलिं २ मनुते ज्यावने माःपिनि
 ज्यावने लोमना स्वया चोन । गुलिं २ मचातये
 आखः बोंवने माःपिनीनं मवंस्य थ्वहे चतक स्वया चोन
 थुगु कथं अपालं लसकलत मुंका ध्यवा कया ईन्द्रजाल
 याना चोंगु जुल । थनंलि मचात निह्य प्यह्य आखः
 वोंवने धका वन गुजुसैलि गुरुह्यस्यं धाल थों छिपिं वःगु
 लिवात छाया गन वना वया धका न्यन थन मचातसे
 धाल हे गुरु थों मंगलवजारे हपतले बिदेशीयाह्य मनु
 छह्यस्यं मचायात लाफः पिया स्य स्वं फुक वयना चोन
 थन आखवों वैंपिं फुकं अनहे स्वया चोनतिनि जिपिंजक
 थनवया लीवासां उक्यं क्षमायाना विज्वाहुं धका
 थथे विति याना चोन थन गुरुह्यस्यं थ्व मचा तेत
 आज्ञा दयेकल हे मचात अथ्यजूसा छिमित अनौथागु
 चटक स्यनाबी मनुते सकले छक्क जुया छिमिथाय् स्ववै
 आम विदेशी यागु चटक सुनानं स्वैमखु उक्यं आः
 थथ्यं छिमिसं धाकः छगः जोनाहुं मंगले गाः हिति व-
 ना लः फया हिं हुं धका धाकः छगः विल, मचातसें
 धाल हे गुरु थ्व धाकले लः चोनीमखु ज्वयावनी धका

धाल थ्व खं न्यना गुरुम्हेसिनं आज्ञा दयेकल, हे? मचात
 जि थुके मंत्रं प्रयोग याय् धुन लः ज्वैसखुत हुं हुं याकनं
 वना लः कया हि धका धाःगु गुरुयागु वचन न्यना मचा
 त सकस्येनं धाकः जोना लःका वन मंगले या हिति
 वना लः फयाहल सकल मचातसें लः लः याना हया
 चोन हपतले थ्यंवले विदेशीया थाय् चोपि मनुत फुकं थ्व
 मचा तेथाय् वयां स्वःवल विदेशी मनुष्यया लाज जुल, थ्व
 मचातसें याना जिगु ज्यास्यंकस धका बोविल थ्व मचातेत
 जि थथे वना लः फुकं ज्वेकावी धका धाः धां बना धु
 कया मंत्र प्रयोग याना छ्वाका विल छ्वाकेवं ल. फुक
 जोयावन मचाते सकसिया गुरु बोवीधका ज्ञाना थ्व
 विदेशी यात बोबिया गुरुयापालिकाय् वया खोःवल ।
 थन गुरुम्हस्यं छाँय् ख्वयागु लःकया महयाला धका
 न्यस्यलि मचातस्यं विती यात । हे गुरु छलपोलया
 वचन थ्यं जिमिसं मंगःहिति लःकया हया हपतले
 थ्यंनेवं विदेशी वया धुलं व्छाका लः फुकं ज्वेका विल
 धका दको खँ कन थ्वखँ न्यना मचा तेत धाल हे मचात
 आमथ्य जुस्यंलि छिमि सकसेनं आखः ब्वनाचों जित
 लेछक वने धकं धयाव ईमाथा पाछपा जोना तले वना
 इमाथा रुप कया व्वया वन । मंगले हपतले थ्यंका

आकाशाकां चटक याना चोंगु मचायागु स्वंपाय् दाया
 हल थन विदेशी मनुया तःसकं फसात ज्वीका मचायात
 म्वाके मफुत जीव चोनीगु स्वंला मदया थ्व विदेशी
 मनुष्य नं मने पसताप चाया धाल न्हाच मचातसे लः
 का वोवले जिं स्यंका विथा उक्थं जित ध्वका विल धका
 मनंल्वीका लोर्कपिंके न्यनः न्हाच धाकले लःकावर्पिं
 गन यापिं मचात धकान्यन लोर्कपिंसें धाल भो परदेशी
 ईपिं मचात चुकवाले आखः वोंवनीपिं धका कन । हे
 साहु जिं धासाः चुकःवाहा धैगु थांय मस्यु छको क्यनाब्यु
 धका विंति यात लोर्कपिं वया चुकवाहाः क्योंवल्य् थन
 गुरुजुया ईमारूप तोता स्वंला पाँ सुचका थवस्त्री यात
 धाल । हे स्त्री थन सुं गुम्ह वया जिमाःवःसा लगंखेले
 माजु सिमायाथांदु धका धयाहिं छनं छगू पुरुषार्थया
 ज्या यानाचों धका प्याहाँ वन लगं खेले थ्यंका माजु
 सिमाया सूलगु कचायात आकर्षण मंत्रं प्रयोग याना
 कोछुका हयाँ जवगु तुति न्हुया ल्हातं ज्वना तल थनंलि
 साः म्ये फैं दुगु चोले दोहत सकले वया थ्व सिमायागु
 हःन वया चोन जुल । विदेशी मनुनं चुकवाले वया
 मंजुदेव गुरुया छें द्वाहां वना सःता चोन तले चोंम्हसें
 धयाहल कुनेसु हाँ धका न्यन जिछ्मह विदेशी मनु धका
 कन अले तले चोंम्हस्यं धयाहल जिधाःसा मिंदुया च्वना

कवाहाँ वयेमज्युनि आस्य छुधाये माःगुथ्यं धका न्यन
 कुने चोम्हसैं धाल जिगु खँ छगु आखिरगु ज्याहु उक्क्यं
 वयागु धका धाल अथ्य जूसा तलेहेवा जिकने धका
 सःतल तलेवना स्वोगु वखते थवगु तुति दुया मिदुया
 चोंगुखना विदेशी मनु छक्क जुया मने लुलकी मिसाम्हे
 जा थुलि तक पुरुषर्थम्ह जुस्यंलि थुया पुरुष गुलि तक
 न्ह्यामज्जी धक मनेतया न्यन गुरुमां थन गुरुजु छको
 नापलाय धका वया गुरु गन विज्यात धका न्यन थव
 परदेशीया वचन न्येना गुरुमांनं धया विज्यात नक
 तिनि लगंखेले विज्यात छुधाये माःगु धका न्यना
 विज्यात थुम्ह मनुनं धाल जि अनहे वना नापलायेका
 अन कवाहाँ वया लगं खेले वना स्वोवंगु बखते थुम्ह गुरुजु
 यागु पुरुषार्थ खना सकस्यनं स्वया तारिफ याना चोन
 धन्य २ चुकवाया गुरुजु धका प्रसंसा याना स्वया चोन
 थुगु थासे विदेशी मनुष्य थ्यंका गुरुया पाली भोसुना
 विन्ति यात हे गुरु जिगु अपराध दक्क क्षमा याना
 विज्याहुं जि थनिनसे थव नेपाले वया छलकपट यावे
 मखुत धका सत्यवाचा यात । थव खँन्यना गुरुधया
 विज्यात आमथ्य जूसा थव सिमा छं कवत्यला जोनाति
 थव पशुते नयेमगानी थौंकन्हे चिकुला जुगुलि घाँय नयगु
 मबुः उक्क्ये थव पशुते प्वाः अजानी उकें छँ थव ज्याया

धका धया बिज्यात थुगु अवस्था थवप रदेशीया मने आः
 गथ्ययां याय्ला धाःसा थमं सगु मखु मयांयला धाःसा
 थःत अर्के जुया विति यावःया । हे गुरु छलपोलया बचने
 जियायेगु जुल। धका वयाश्री गुरुं आज्ञा धका मनेतया ।
 थव भाजु सिना थव ल्हातं ज्वना ग्यांग्या तुति न्ह्या
 तल । थन मंजुदेव गुरुजुं थव छेपाखे स्वया बिज्यात ।
 लोकपिनि मने लुलकी थव ज्या यांयकं मखु धका मने
 ल्वीका स्वया च्वन । गुरुजु जक चुकवाले द्वाहां वनेवं
 माजुसिमा थोकःनोया थाहावनं परदेशी मनु लगं खेले
 च्छतावाना वाथाः २ कना वल्लतलं दना आयांम २
 धका हाला बुलुहुं २ गुरुयाछें वन गुरुयात यथाश्रद्धा
 दक्षिणा बिया स्वला पांय कया हपतले वना मचायात
 स्वंतया म्वाका बिल । धन्य २ चुकवहाया मंजुदेव
 गुरुजु धका प्रशंशायाना थव २ छें लिहांवन थुगुखें तिनि
 सहरे जाहेर जुया वन ।

संवत् ७७८ साले श्री निवास मल्लया पर्याय्

७७९ साले श्री जटाधारी लोक्यश्वरया मूर्ती
 न्ह्यापायागु मजीया अष्टधातु यागु मूर्ती स्थापना याना
 तःगु संवत् ७८६ मंजुदेवं क्रिया समुच्चय चोगु ७९६।
 ७९८ कारंडव्यूह चोयावंसु मणिदेवया काये विश्वदेव

श्री करुणामय थतितया तवबले प्रियाग पुखु (प्यापुखु)
 या द्वापातया भूत यागु दोषं रथेचोना चान्हे द्दनाचोपि
 भायोजु छम्ह अथेतुं सिना चीन मेम्ह पलेसा चीना
 दिन यागु ज्या तिधयेकल हाकनं सर्खुन्हु यागु राते नं
 अथेहे भायोजुत सिना चीन आश्चर्यचाया चुकवाहाले
 मंजुदेव गुरुजु क्यता स्वगु वखते प्याःपुखुया द्वापातया
 भूतवान लगेजुल धका सीदेका श्री विघ्नेश्वर गणेश
 स्थापनाया विल । थौंया अद्यापि थति तुंया नायं
 पश्चिम स्वया गणेश छोपिसालि थायं जवे चोम्ह थुगु
 साले श्रोयोस्तु संवत् ८३९ श्री ललितपूरी महानगरे
 द्वितियराज्याधिपति श्री जय महिन्द्र सिंह देवस्य
 विजय राज्य । ८२६ जयवीरयोग नरेन्द्र श्वहे साले
 चुक वाहाले दुने नं पिनि नं चिकं अयां वंसिया दश्वी
 चोंगु चैत्य जिर्नोद्वारयागु जुल मुलाचार्य मंजुदेव
 उपाध्याय थव पूत्र विश्वदेव दानपति दुःख हर्णलावतया
 स्त्री विश्णुमति सहीतनं जज्ञयानाब प्रतिस्था याक जुल
 शुभं । ८४८ विश्वदेव चोगु विश्वदेया पूत्र कुलदत्त
 ८९२ कुलदतया पूत्र विद्यादत्त विद्यादत्तया पुत्र लक्ष्मी
 दत्त लक्ष्मीदतया पूत्र जिनदत्त कारडव्युह ८३९
 ८२६ श्री जय योगनरेन्द्र मल्ल

संवत् १०३ गुण सागरे चोंगु सं १२९ वीरदत्त
 चोंगु १५२ शुभदत्त चोंगु ८५५६ बिशुभहल चकबाहा
 देव यात वहयायाँच दुंता श्री २८३३ साले वैसाख
 शुक्लपारु खुन्हु रथे थना बुंगद्यो ज्यावले पिसागु भाद्रव
 तृतिया खुन्हु जुल ।

श्री संवत् २०३४ साले वैसाख पारु रथेथना श्रावण
 कृष्ण तृतिया आषाढ महिना २ निला दुगु जुल । न्याला
 तःफाःल्होते धखतया आसि तोल्हुल प्यन्हु न्यान्हु अनंतुं
 तया मेगु आसितया ज्यावल जात्रा न्यायकल शुभं ।

श्री संवत् २०३५ साले बुंगद्यो पिसागु ज्येष्ठ
 शुदि द्वितिया सिथिनख खुन्हु ज्यावले पुजा जुल
 आषार संक्राति खुन्हु बिचापुजा जुल शुभं—

श्री संवत् २०३६ साल फिनिदया मेला वैसाख
 शुक्लपारु खुन्हु बुंगे द्यो रथे थंगु बाचालिसु रथ सिधय्के
 मफया बाय्मो रथे विचेयाना तल द्वितिया तृतिया
 अनंतुं चौठि खुन्हु भतिचा साल पंचमि षष्टमि ज्यावल
 खेले थ्यंकल । सप्तमि खुन्हु ग्वाखंच्वे थ्यंकल । अष्टमि
 खुन्हु यपा तंने थ्यन । दशमि खुन्हु इउलाख्योतँ फोचा-
 यका हःबले ल्वापु जुल एकादशि खुन्हु ईउलाखेले थ्यन
 थुखुन्हु बहनी दश १० बजे नसँ साला हल वाचा इलेहे
 पुचो थ्यम । द्वादशि खुन्हु गाःबाहा जात्रा न्यायेकल

त्रयोदश अनंतं । चतुर्दशी खुन्हु नुगले भति मथेवं
 रथ चातुला वन । साले मजिया चतुर्दशी पर पुन्ही
 खुन्हु देव रथं कोकाल । नुगले हिति फुसे फलेचा तल ।

ज्येष्ठ शुक्ल द्वादश खुन्हु रथे विज्याका शांति
 स्वस्ति याना त्रयोदश खुन्हु नुग जात्रा न्यायेकल
 चतुर्दशी खुन्हु भुज्यायाः पुजाभाव सिधयेकल अनंतं ।
 पुन्ही खुन्हु नुगलं निस्यं साला हल जंगल जोने स्वाक
 लगंखेले माजु सीमोस थ्यंकल पारु खुन्हु लगंजात्रा याः
 न्ययेका तृतीया खुन्हु भुज्याः चौठि खुन्हु सुथे ननिचा
 याः न्यायेकल चकवाहाद्यो याः न्यायेके मफु ।

आषाढ कृष्ण द्वादश खुन्हु श्रावण ४ गते
 चकवाहा देवयागु पुलांगु घःचा लिकया न्हुगु घःचा
 फेरेयाना त्रयोदश खुन्हु द्यो पिसाला ईगःत्यागले घःचा
 तुना थात । आषाढ चतुर्दशी गठांमुगः चन्हे खुन्हु
 ज्वावले याः न्यायेकल । औंसि निन्हु खुहु गुंलाथ्वपारु खुन्हु
 ज्यावले पुजा सिधयेका देव लिसाला प्येकालें थ्यन
 दक्षिणपति स्वकेवं खव पाखे घःचा तुना वना साले
 मजिल अनंतं । द्वितीया खुन्हु भनिमंदले थात । तृतीया
 खुन्हु इउलाख्यो तंचा ववध्याये वं थात लसकल आपालं
 स्वः वया जोन न्यखवी मेला भरेषायेगु आसां चौठि

खुन्हु भतिचा साला यंबयवं खवपाखे घःचा तुना रथ
 ग्वतुवन जवया घःचा निचाकलं आकासे लात स्वया
 चोंपिनि नुगः मछींका गुलिं २ खोया लिहाँ वन ।
 श्रावण शुक्ल चौठी खुन्हु पुचो चोंह्य बज्रजोगिणी
 यागु ल्हाः छर्चो राते खुया यंकल । नागपंचमि खुन्हु
 द्यो कोकाया न्यख्वी चोंगु फलेचास तया तदगु जुल ।
 शुगु साले ननानं वापी मदु गुण पुन्ही बले तिनी
 वा पी सिधयेकल ।

भाद्रव शुक्ल सप्तमि पर अष्टमी खुन्हु न्यख्वी
 फलेचाँ चोंम्ह रथे थना गुराः बौ बिया जज्ञ होम पाठ
 पुजा याना रथ प्रतिष्ठा याना अष्टमि पर नवमि खुन्हु
 न्यख्वी मेला भरे याका नेखु पुईकुगु बखतस घःमाया चुक
 तोधुला घःमा लिवल । घःकु तैह्य सित तुतिक्यलः सखुन्हु
 सिद्धवन । सखुन्हु दशमि शनिश्ररवार खुन्हु त्याकतरं
 साला ग्वाखच्चे, याः न्यायेकल । एकदशि खुन्हु नं
 त्याकटरं साला थैमातं फुसे थ्यंकल । द्वादशि खुन्हु
 ज्यावल खेले याः न्यायकल, यंयाः पुन्ही खुन्हु बुंगे
 ज्यावले पुजा जुल शुभं ।



लेखकया पाखे प्रकाशित सफू

✦ मीन नाथको वंशावली

✦ बँगद्योया रथ यात्राखँ

पुस्तक प्राप्तिस्थान

रत्न राज बज्राचार्य

लगंख्यल, माजुसिमाया न्ह्योने